

Seini se Mèpiya Indan Insolat i Mateo

Menge kemonaan i Jesus

Mat. 1:1-17; Luc. 3:23-38

¹ Seini se ngadan te menge kemonaan i Jesu Cristo. Si Jesus se sebad diyà te menge bowad-bowad i David, aw menge bowad-bowad i Abraham.

² Si Abraham se amay i Isaac.

Si Isaac se amay i Jacob.

Si Jacob se amay i Juda aw menge kedowa din.

³ Si Juda se amay i Fares aw si Sara. Si Tamar se inay dan.

Si Fares se amay i Esrom.

Si Esrom se amay i Aram.

⁴ Si Aram se amay i Aminadab.

Si Aminadab se amay i Naason.

Si Naason se amay i Salmon.

⁵ Si Salmon se amay i Boos, aw si Rahab se inay din.

Si Boos se amay i Obed, aw si Ruth se inay din.

Si Obed se amay i Isai.

⁶ Si Isai se amay te selotan si David.

Si David se amay i Solomon, aw inay din se esawa i Uria inagaw i David.

⁷ Si Solomon se amay i Roboam.

Si Roboam se amay i Abias.

Si Abias se amay i Asa.

⁸ Si Asa se amay i Josafat.

Si Josafat se amay i Joram.

Si Joram se amay i Usias.

⁹ Si Usias se amay i Jotam.

Si Jotam se amay i Acas.

Si Acas se amay i Esekias.

¹⁰ Si Esekias se amay i Manases.
Si Manases se amay i Amon.
Si Amon se amay i Josias.

¹¹ Si Josias se amay i Jeconias aw menge kedowa din.
Dinakep dan sipat menge doma dan Judiyo aw inibing dan doton te mediyò ogpeanan te Babilonya.

¹² Penga te peg-ibing kandan doton te Babilonya, migbatà si Jeconias ki Salatiel.
Si Salatiel se amay i Sorobabel.

¹³ Si Sorobabel se amay i Abiud.
Si Abiud se amay i Eliakim.
Si Eliakim se amay i Asor.

¹⁴ Si Asor se amay i Sadoc.
Si Sadoc se amay i Akim.
Si Akim se amay i Eliud.

¹⁵ Si Eliud se amay i Eleasar.
Si Eleasar se amay i Matan.
Si Matan se amay i Jacob.

¹⁶ Si Jacob se amay i Jose.
Si Jose se esawa i Maria inay i Jesus.
Si Jesus se ginulal Misiyas insogò te Timanem.

¹⁷ Nayan, lekat ki Abraham lamig ki David, sempolò teg epat kebelikwat se pamilya migpetondogay. Lekat ki David lamig te peg-ibing te menge Judiyo doton te Babilonya, sempolò teg epat heman kebelikwat se pamilya migpetondogay. Lekat te peg-ibing kandan doton te Babilonya lamig te pegtebaw te Misiyas, sempolò teg epat heman kebelikwat se pamilya migpetondogay.

Pegtebaw i Jesus

Mat. 1:18-25; Luc. 2:1-7

¹⁸ Nayan, seini se indan-indan tepad te pegtebaw i Jesu Cristo. Si Maria se inay din, aw doen salà din si Jose. Te wedà dan pa peipiday, netegahan i Maria te miglaman

sikandin pineokit te Espiritu Santo. ¹⁹ Mèpiya otaw se salà din si Jose. Pegketaga-taga din te miglaman den si Maria, mig-aneng-aneng sikandin te eked den ipid ki Maria. Ibeg i Jose osayen dan te wedad metaga-taga amon eked keyàya si Maria. ²⁰ Meneng dalem pa te peg-aneng-aneng din kenyan, doen anghil te Timanem migpekità diyà kandin pineokit te tegeinep, aw minikagi, “Jose, bowad-bowad i David, ikà eg-eked te peg-ipid no ki Maria, so miglaman sikandin pineokit te Espiritu Santo. ²¹ Doen batà meama tomebaw diyà kandin ingedanan no ki Jesus, so sikandin se megpelowà te otaw lekat te salà.”

²² Neinang iyan amon metoman se tapay inikagi te telekeliwat te kagi te Timanem gebii, kagi din,

²³ “Na, meglaman se laga aw tomebaw se batà meama ingedanan ki Emmanuel.” (Se kelebadan niyan, “Dini den se Timanem doma kenitadon.”)

²⁴ Pegkeloka i Jose, timolò sikandin te impunù te anghil te Timanem kandin, aw minipid sikandin ki Maria.

²⁵ Meneng wedà dan pegpeleyokay lamig timebaw se batà. Iningedanan i Jose se batà ki Jesus.

2

Peggemaw te menge otaw biyasa

¹ Timebaw si Jesus doton te lonsod te Bitlihim sakop te probinsya te Judiya dalem te peglowan te selotan si Herod.

Nayan, doen menge otaw dimateng doton te Jerusalem lekat te mediyò ogpeanan doton te eglibtakan te aldaw. Sikandan se ontò biyasa tepad te pengilala te menge bitoen. ² Mig-insà dan, “Kenan lay se deitek batà meinang Selotan te menge Judiyo? Kinità day se bitoen limibtak aw yan se pengilala te timebaw den sikandin. Dimini kay amon megsimba kay kandin.”

³ Pegdineg i Herod te doen meinang selotan somelilin kandin, ontò sikandin netetana sipat kedita te tege Jerusalem. ⁴ Penga niyan, impetipon din se kedita te pengolo te simbahan te Judiyo aw menenoladà te punù ingkeliwat i Moises. Mig-insà sikandin aw kenan tebaw se Misiyas. ⁵ Timaba dan, “Tomebaw sikandin doton te Bitlihim dini te probinsya te Judiya, so yan se tapay insolat te telekeliwat te kagi te Timanem, kagi din,

⁶ ‘Sikiyo munge tege Bitlihim, pengkey nedengeg se munge doma lonsod doton te probinsya niyo te Judiya, meneng labi pa medengeg se lonsod niyo, so lekat kenyo se Pengolo lomowan diyà te munge bowad-bowad i Israel pinemalli ko.’ ”

⁷ Penga niyan, impeangay i Herod se munge otaw biyasa te pengilala te bitoen. Netipon dan te wedad doma otaw netaga-tagà, aw ontò mig-insà si Herod aw kano dan kitai se bitoen siyan. ⁸ Penga niyan, insogò din dan, kagi din, “Doton kaw te Bitlihim, aw ontò niyo pemehai se batà siyan. Aw kitaen niyo sikandin, likò kaw dini aw indani a niyo amon domoton a heman aw megsimba a kandin.”

⁹⁻¹⁰ Penga niyan, nesayo dan aw todà dan kinità se bitoen tapay dan kinità limibtak. Pegkità dan te bitoen, ontò neluba se pedowan dan, aw yan se tinekingan dan lamig simagked iyan diatas te balay inogpaan i Jesus. ¹¹ Peg-awop dan kidoen te balay, kinità dan se batà aw inay din si Maria. Limongken dan aw migsimba dan te batà. Penga niyan, inokal dan se kekanà inibing dan, munge bolawan, aw metinadeg sonogen, aw bebolong te saka iningedanan mira. Tinigkan dan iyan imbowang diyà ki Jesus.

¹² Nayan, migpunù se Timanem diyà kandan pineokit te tegeinep te eked kepakay aw lomikò dan doton ki Herod.

Yan se doun te minokit dan te sebad dalan te peg-olì dan doton te kandan ogpeanan.

Pegkadas doton te Ehipto

¹³ Nayan, penga te pegkesayo dan, doen anghil insogò te Timanem migpekità diyà ki Jose pineokit te tegeinèp, aw minikagi, “Enaw ka. Ibingi se batà aw inay din, aw kadas kaw doton te Ehipto. Peg-ogpà kaw doton lamig te ipeolì ko sikiyo, so doen sondalo isogò i Herod amon mengemahà te batà seini aw imetayan.”

¹⁴ Penga niyan, pengkey tengà te delem, minenaw si Jose aw inibing din se esawa din aw si Jesus, aw simamsam dan pesalo doton te Ehipto. ¹⁵ Mig-ogpà dan doton lamig nematay si Herod.

Yan se neinang amon metoman se inikagi te telekeliwat te kagi te Timanem, “Ipeolì ko se batà ko lekat te Ehipto.”

Peg-igelà te menge deitek batà meama

¹⁶ Nayan, pegketaga-taga i Herod te inekalan sikandin te menge otaw biyasa tepad te pengilala te bitoen, ontò sikandin neopal so wedà dan likò doton kandin. Yan insogò din se menge sondalo doton te lonsod te Bitlihim aw menge ogpeanan medapag kidoen amon imetayan dan se kedita te batà meama lekat te kaling timebaw lamig te didowa se omay, so yan se kenamay netegahan din lekat te in-indan te menge otaw biyasa tepad te pengilala te bitoen.

¹⁷ Pineokit kenyan, netoman se inikagi te telekeliwat te kagi te Timanem gebii si Jeremias,

¹⁸ “Doen dinegen niyo kidoen te lonsod te Rama. Megkelag aw megmatay se menge bowad-bowad i Rakel, so melano dan te mengisù dan. Megkelag dan, aw eked dan kesinelayi, so inimetayan se mengisù dan.”

Peglikò doton te Nasarit

¹⁹ Nayan, penga te pegkematay i Herod, doen anghil insogò te Timanem migpekità diyà ki Jose doton te Ehipto pineokit te tegeinep. Minikagi se anghil, ²⁰ “Enaw ka. Ibingi se batà aw inay din, aw oli kaw doton te Israel, so nematay den se otaw mengimatay peden te batà.”

²¹ Penga niyan, minenaw si Jose aw inibing din se esawa din aw si Jesus, aw minoli dan doton te Israel. ²² Meneng wedà dan deleg doton te probinsya te Judiya, so nelemitan si Jose te pegdineg din te limowan den si Arkelao simelilin te amay din si Herod nematay. Yan insogò te Timanem si Jose pineokit te tegeinep, aw simoway dan doton te probinsya te Galiliya. ²³ Mig-ogpà dan doton te lonsod te Nasarit. Yan netoman se inikagi te menge telekeliwat te kagi te Timanem te tewalen si Jesus tege Nasarit.

3

Pegtoladà i Juan Memonyagay

3:1-12

Luc. 3:1-18; Juan 1:19-28

¹ Nayan, dimateng se aldaw te pegdoton i Juan Memonyagay te kebigtilan kidoen te probinsya te Judiya. Migtoladà sikandin, kagi din, ² “Pegselsel kaw den te menge salà ininang niyo, so agpet den lomowan se Timanem diyà kenitadon.”

³ Si Juan se tinedoan te inikagi te telekeliwat te kagi te Timanem gebii si Isaias,

“Dinegen niyo se otaw doton te kebigtilan aw dakel se kagi din, ‘Peketagad kaw te pegdateng te Pengolo. Peginang kaw te metòlid, so domateng sikandin.’ ”

⁴ Nayan, egpenaol si Juan te saol inabel lekat te bolbol te ayam-ayam kamilo aw egpengelen te kindal te ayam-ayam. Egpengànen din se menge dolon aw teneb eg-baten din doton te kebenesan. ⁵ Medita se otaw lekat te Jerusalem aw menge doma lonsod sakop te probinsya te Judiya aw medapag te wayeg te Jordan dimoton amon menenalan kandin. ⁶ Migselsel dan te menge salà ininang dan, aw binonyagan din dan doton te wayeg te Jordan.

⁷ Nayan, medita heman se egpengibing te simbahan te Judiyo dimoton ki Juan amon megpebonyag dan kandin. Sakop dan te menge Parisiyo aw Sadusiyo. Pegkità i Juan kandan, minikagi sikandin, “Tay law. Iling kaw te memokan egkadas te apoy. Eked kaw pekelowà lekat te pelumun te Timanem te modi aldaw singed aw megselsel kaw. ⁸ Aw migselsel kaw den, petega-tegahi niyo iyan pineokit te eg-inangen niyo. ⁹ Ikà niyo eg-aneng-aneng te eked kaw pelumuni so bowad-bowad kaw i Abraham. Eneng-enengi niyo se kagi ko seini. Pengkey se menge bato seini te lanto te tanà, mepakay iyan inangen te Timanem menge bowad-bowad i Abraham somelilin kenyo. ¹⁰ Iling kaw te kayo agpet pilayen. Aw kenà mèpiya se pongo te kayo, pilayen iyan aw sonogen. ¹¹ Egpemonyag a pineokit te wayeg, so yan se pengilala te migselsel kaw den te salà ininang niyo. Meneng doen pa domateng labi pa melangkaw diyà kanak. Kenà botong se kelangkaw ko amon megtelaban a kandin pengkey mengibing a te sepatos din, so ontò sikandin melangkaw diyà kanak. Sikandin se memonyag kenyo pineokit te Espiritu Santo aw pineokit te apoy. ¹² Iling sikandin te otaw egpepalid te trigo eggiyeken din, amon isawol din te buun aw ibingen din doton te balay. Meneng se ohot aw tipig, yan se sonogen din te apoy kenà egkepadeng.”

Pegbonyag ki Jesus

3:13-17

Mar. 1:9-11; Luc. 3:21-22

¹³ Nayan, dimateng si Jesus lekat te probinsya te Galiliya aw dimoton te wayeg te Jordan amon megpebonyag ki Juan. ¹⁴ Meneng wedà keibeg si Juan aw sikandin se megbonyag ki Jesus, so minikagi sikandin, “Eked kepakay aw siak se megbonyag kamno. Keilangan sikona se megbonyag kanak.”

¹⁵ Meneng minikagi si Jesus, “Tomani den se pegbonyag kanak, so keilangan tomoman ki den te kedita te ibeg te Timanem.”

Penga niyan, migbonyag si Juan ki Jesus. ¹⁶ Penga te pegbonyag din kandin, minanggin si Jesus lekat te wayeg. Pegketà, neowang se langit, aw kinità din se Espiritu Santo migpedanà diyà kandin iling te selepati, aw mig-ogpà diyà kandin. ¹⁷ Penga niyan, dinineg dan se kagi te Timanem lekat te langit, “Seini se Batà ko. Dakel se pedowan ko kandin, aw ontò a neluba kandin.”

4

Pegboyo ki Jesus

4:1-11

Mar. 1:12-13; Luc. 4:1-13

¹ Penga te pegbonyag ki Jesus, inibing sikandin te Espiritu Santo doton te kebigtilan amon boyowen i Satanas.

² Wedad palos kinaen i Jesus dalem te kepatan se aldaw, aw penga niyan binallos sikandin. ³ Dimateng si Satanas aw minikagi sikandin, “Aw ontò ka Batà te Timanem, inangi pan se menge bato seini pineokit te tolos no amon doen kànen nikaw.”

⁴ Meneng minikagi si Jesus, “Eked a, so doen kagi te Timanem insolat,

‘Kenà olò kànen se keilangan te otaw amon eked kematay, meneng keilangan kominawà se otaw te kedita te impunù te Timanem.’ ”

⁵ Penga niyan, inibing i Satanas si Jesus doton diatas te dakel simbahan doton te Jerusalem. ⁶ Minikagi si Satanas, “Nayan, aw ontò ka Batà te Timanem, kahang ka. Eked ka elegi, so doen kagi te Timanem insolat, ‘Isogò te Timanem se menge anghil amon meg-ipat dan kamno.’

Doen heman kagi te Timanem insolat, ‘Ewidan ka te menge anghil, aw engaten ka dan amon eked ka kesongkol te bato.’ ”

⁷ Meneng minikagi si Jesus, “Eked a, so doen heman kagi te Timanem insolat, ‘Ikà niyo egtandà te Pengolo niyo Timanem.’ ”

⁸ Penga niyan, inibing i Satanas si Jesus doton te ontò melangkaw bontod, aw impekità din kandin se kedita te ogpeanan te keneyonan aw kèpiya niyan. ⁹ Minikagi si Satanas, “Aw lomongken ka diyà kanak aw simbahen a nikaw, ibegay ko diyà kamno se kedita te ogpeanan siyan, amon lomowan ka diyà te kedita te otaw kidoen.”

¹⁰ Meneng minikagi si Jesus, “Satanas, kesayo ka. Eked a pegsimba kamno, so doen kagi te Timanem insolat, ‘Timanem se Pengolo niyo aw sikandin se keilangan simbahen niyo, so sikandin olò se mepakay tekingan niyo.’ ”

¹¹ Penga niyan, nesayo si Satanas, aw doen menge anghil insogò te Timanem amon meg-ipat dan ki Jesus.

Pegtebò i Jesus migtoladà

Mat. 4:12-17; Mar. 1:14-15; Luc. 4:14-15

¹² Nayan, impedakep i Herod si Juan Memonyagay aw impekeleboso din. Pegketaga-tagà i Jesus kenyan, minoli sikandin doton te probinsya te Galiliya. ¹³ Minokit

sikandin doton te lonsod te Nasarit aw dimeleg doton te lonsod te Kapirnaom aw mig-ogpà kidoen dapag te kilid te lanaw digsel te tanà te Sabulon aw Neftali. ¹⁴ Pineokit kenyan, netoman se inikagi te telekeliwat te kagi te Timanem gebii si Isaias tepad te pegdateng i Jesus pig-polingunan te lowa,

¹⁵ “Se kedita te otaw eg-ogpà doton te tanà te Sabulon aw Neftali, aw doton dapag te kilid te lanaw, aw doton dipag te wayeg te Jordan, aw doton te Galiliya eg-ogpaan te minge otaw kenà Judiyo, ¹⁶ pengkey iling te eg-ogpà dan doton te kengitngitan, meneng kitaen dan se ontò melowa. Pengkey eg-ogpà dan doton te kengitngitan aw egkelemitan dan te kemetayun, meneng egkeenyagan dan.”

¹⁷ Lekat niyan, migtebò si Jesus migtoladà, aw minikagi sikandin, “Pegselsel kaw den te minge salà ininang niyo, so agpet den lomowan se Timanem diyà kenyo.”

Pegtawal i Jesus te epat tinoledaan

Mát. 4:18-22; Mar. 1:16-20; Luc. 5:1-11

¹⁸ Doen sebad aldaw, minipanaw si Jesus doton te kilid te lanaw te Galiliya. Kinità din se didowa memokotay si Simon iningedanan din ki Pedro, aw adi din si Andres nemokot. ¹⁹ Timawal si Jesus, “Taking kaw kanak, so megtoladà a kenyo amon kenà ikan se meabat niyo, meneng otaw se ibingen niyo diyà kanak.”

²⁰ Pegketà, tinenanan dan se pokot aw timaking dan ki Jesus.

²¹ Dimeleg si Jesus, aw kinità din se doma telekedowa si Santiago aw adi din si Juan didowa batà i Sebedeo. Kidoen dan te belangay sipat amay dan, aw migtigmes dan te pokot. Tinawal dan heman i Jesus, ²² aw ayas dan tinenanan se belangay aw amay dan, aw timaking dan heman ki Jesus.

Migtoladà aw migpegolì si Jesus doton te Galiliya

Mat. 4:23-25; Luc. 6:17-19

²³ Nayan, timeped si Jesus te kedita te lonsod doton te probinsya te Galiliya, aw migtoladà doton te minge simbahan te Judiyo. Migtoladà sikandin te Mèpiya Indan tepad te peglowan te Timanem, aw pinegolian din se kedita te otaw doen mesakit. ²⁴ Yan se doun te ontò sikandin nedengeg doton te kebelad te Siria. Pinegolian din se kedita te otaw doen mesakit inibing diyà kandin, pengkey eden kemoloi te mesakit, aw otaw dinetengan te bosaw, aw otaw pigbaboy, aw otaw kenà egpekeiwal. Negolian se kedita dan. ²⁵ Ontò medita se otaw timaking ki Jesus. Tikedo dan te probinsya te Galiliya, aw lekat te Dikapolis, aw Jerusalem, aw probinsya te Judiya, aw lekat dipag te wayeg te Jordan.

5

Pegtoladà i Jesus doton te bontod

Mat. 5:1-12; Luc. 6:20-23

¹ Pegkità i Jesus te medita se otaw netipon, timikedeg sikandin te bontod aw neneno kidoen. Migpedapag se kedita te otaw tinoledaan din, ² aw migtoladà si Jesus kandan, kagi din,

³ “Doen keluba te kedita te otaw netaga-tagaga te eked dan pekeingang te mèpiya singed aw tebangan dan te Timanem, so sekopen din dan diyà te peglowan din.

⁴ “Doen keluba te kedita te otaw nelidò se pedowan dan, so sinelayen dan te Timanem.

⁵ “Doen keluba te kedita te otaw migpedanà te kandan pegkeotawun, so kominawà dan te tanà impakang te Timanem.

⁶ “Doen keluba te kedita te otaw ontò meibeg meg-ingang te metòlid, so tebangan dan te Timanem amon mekeingang dan te metòlid.

⁷ “Doen keluba te kedita te otaw egkeido te doma, so keidowan dan heman te Timanem.

⁸ “Doen keluba te kedita te otaw melobos se pedowan dan tomaking te Timanem, so komità dan kwani kandin.

⁹ “Doen keluba te kedita te otaw egpekeaseb eg-inang te kelinaw, so inangen dan te Timanem menge batà din.

¹⁰ “Doen keluba te kedita te otaw egpemilangen tandà te pegtolò dan te Timanem, so sekopen din dan diyà te peglowan din.

¹¹ “Doen keluba te kedita niyo egtompuyusen tandà te pegtaking niyo kanak, pengkey egpemilangen kaw, pengkey bàtan-bàtan kaw. ¹² Iling heman kenyan se pegpemilang dimateng diyà te menge telekeliwat te kagi te Timanem gebii. Meneng keilangan ontò kaw meluba, so ontò mèpiya se ontong ibegay diyà kenyo doton te langit.”

Tepad te asin aw solò

Mat. 5:13-16; Mar. 9:50; Luc. 14:34-35

¹³ “Dalem te peg-ogpà niyo dini te keneyonan, iling kaw te asin isanged diyà te kànen. Meneng simpana megkewedad se kepait te asin, eked iyan ketodà. Keilangan iagbel, so wedad den kekemowan niyan, aw gitan iyan te otaw mokit kidoen.

¹⁴ “Dalem te peg-ogpà niyo dini te keneyonan, iling kaw te solò diyà te kedita te otaw. Eked keeles se lonsod aw doton te lanto te bontod. ¹⁵ Aw menemtem se otaw te solò, eked din iyan sengkobi te gentangan. Meneng mèpiya aw isawol din iyan diyà te kelengkawan amon keenyagan se didalem te balay. ¹⁶ Iling heman kenyan, keilangan olò mèpiya se inangen niyo, so aw komità se menge doma otaw te mèpiya se eg-inangen niyo, iduyun dan se Amay niyo Timanem doton te langit.”

Tepad te punù ingkeliwat i Moises

¹⁷ “Ikà niyo eg-aneng-aneng te dimini a amon pegwedaden ko se minge punù ingkeliwat i Moises aw insolat te minge telekeliwat te kagi te Timanem gebii. Meneng dimini a amon ipetaga-taga ko se ontò kedegdagan niyan. ¹⁸ Eneng-enengi niyo se kagi ko kenyo seini. Dalem te doen pa langit aw tanà, wedad palos punù te Timanem pegwedaden, meneng metoman se kedita te kagi din. ¹⁹ Aw doen otaw megwedad peden te pengkey sebad punù te Timanem, aw megtoladà kenyan diyà te doma otaw, yan se otaw ontò medanà doton te peglowan te Timanem. Meneng aw tomolò se otaw te kedita te punù te Timanem aw megtoladà te doma otaw kenyan, yan se otaw ontò melangkaw doton te peglowan te Timanem. ²⁰ Mikagi a den diyà kenyo, aw kenà labi pa metòlid se eg-inangen niyo diyà te eg-inangen te minge Parisiyo aw menenoladà te punù ingkeliwat i Moises, eked kaw palos sekopi te Timanem diyà te peglowan din.”

Tepad te keopal

²¹ “Netegahan niyo den te migpunù si Moises diyà te minge kemonaan niyo te keilangan eked dan pemonò, so keilangan ipelumun se otaw memonò. ²² Meneng mikagi a den diyà kenyo te pengkey olò meopal se otaw diyà te doma, ibingen sikandin doton te otaw eg-osay. Aw mikagi se otaw te medaet diyà te doma, ibingen sikandin doton te kelengkawan te oseyanan. Aw mikagi se otaw diyà te doma, ‘Book ka,’ ibingen sikandin doton te apoy te kilot. ²³ Yan aw domoton kaw te dakel simbahan amon memegay te bowang diyà te Timanem, aw keeneng-enengan niyo te doen pa salà ininang niyo diyà te doma otaw, ²⁴ tenani niyo onà se ibowang niyo, aw doton kaw te otaw sìyan amon megkità kaw. Penga niyan, mepakay aw lomikò kaw memegay te bowang diyà te Timanem.

²⁵ “Aw doen otaw megdimanda tepad kenyo, ayas kaw pegpeido-ido diyà kandin dalem pa te eked kaw dateng doton te howis, amon eked kaw din ibingi doton te howis, aw ibegay kaw diyà te belad te polis amon kelebosowen kaw. ²⁶ Eneng-enengi niyo se kagi ko seini. Aw kelebosowen kaw, eked kaw palos pekelowà singed aw beyadan niyo se kedakel te salà.”

Tepad te peglakad

²⁷ “Netegahan niyo den te migpunù si Moises gebii te eked kepakay aw lomakad se otaw. ²⁸ Meneng mikagi a den diyà kenyo te pengkey olò tomengteng se meama diyà te bayi aw medaet se ibeg din kandin, nekelakad den sikandin diyà te pedowan din. ²⁹ Yan aw meboyo kaw meg-inang te salà pineokit te mata niyo, mèpiya aw logiten niyo se mata, aw iagbel niyo amon eked kaw keboyo. Labi pa medaet aw meboyo kaw pineokit te mata aw iagbel se kedakel te lawa niyo doton te kilot. ³⁰ Aw meboyo kaw heman meg-inang te salà pineokit te belad niyo, mèpiya aw tokongen niyo se belad niyo aw iagbel niyo amon eked kaw keboyo. Labi pa medaet aw meboyo kaw pineokit te belad niyo aw iagbel se kedakel te lawa niyo doton te kilot.”

Tepad te pegsibwan

Mat. 5:31-32; 19:9; Mar. 10:11-12; Luc. 16:18

³¹ “Migpunù heman si Moises gebii te keilangan doen papil ibegay te meama diyà te bayi tepad te pegsibwan din kandin, aw penga niyan mepakay din ipekesayo. ³² Meneng mikagi a den diyà kenyo, aw somibwan se meama te esawa din wedà peglakad, medaet se inangen te meama sìyan, so pineokit kandin mekelakad se esawa din aw todà mengognan, aw mekelakad heman se meama mengognan te bayi sinibwanan.”

Tepad te pegpakang

³³ “Netegahan niyo heman te migpunù si Moises diyà te munge kemonaan niyo gebii te eked kepakay aw tomalis se otaw te pakang aw impeokit din iyan diyà te ngadan te Timanem, so keilangan tomanen din iyan. ³⁴⁻³⁵ Meneng mikagi a den diyà kenyo, aw megpakang kaw diyà te doma otaw, ikà niyo egsapà. Ikà niyo egsapà te langit aw tanà. Medaet iyan, so iling te onsedanan te Timanem se langit, aw iling te gitanan din se tanà. Ikà niyo heman egsapà te lonsod te Jerusalem, so yan se lonsod ogpaan kwani te Selotan metolos. ³⁶ Ikà niyo heman egsapà te logay niyo, so eked niyo kebatog todaen se batek niyan pengkey meitem aw mepotì. ³⁷ Aw keseligan se kagi niyo, botong aw olò kaw tomaba, ‘Ee,’ aw ‘Eked.’ Aw keilangan isogpat niyo se sapà diyà te kebenalan, medaet iyan, so lekat iyan ki Satanas.”

Tepad te pegmalit

Mat. 5:38-42; Luc. 6:29-30

³⁸ “Netegahan niyo heman te migpunù si Moises gebii, aw memisek se otaw te mata te doma otaw, keilangan piseken heman se kandin mata. Migpunù heman si Moises, aw longeben te otaw se ngipen te doma otaw, keilangan longeben heman se kandin ngipen. ³⁹ Meneng mikagi a den diyà kenyo, aw doen otaw meg-inang te medaet diyà kenyo, ikà niyo eg-inang te medaet diyà kandin. Aw sempaken kaw te doma otaw diyà te pisngi lenged te kowanan, pesempaki niyo heman se pisngi lenged te bibang. ⁴⁰ Aw doen otaw mengibing kenyo doton te howis amon mengabat te ekasan niyo, begayi niyo heman kandin se saol niyo. ⁴¹ Pengkey legesen kaw te sondalo mengibing te kedònan din taman te sebad kilomitro, pengibing kaw kenyan taman te dow

kilometro. ⁴² Pemegay kaw diyà te otaw memoyò kenyo, aw pemebeles kaw heman diyà te otaw meibeg meles.”

Tepad te kedakel te pedowan diyà te poon

Mat. 5:43-48; Luc. 6:27-28,32-36

⁴³ “Netegahan niyo heman te doen migtoladà gebii te keilangan kedekelan niyo te pedowan se kedomaan niyo, aw mepakay keopalan se menge poon niyo. ⁴⁴ Meneng mikagi a den diyà kenyo te keilangan kedekelan niyo te pedowan se poon niyo. Keilangan gayed kaw megtawal-tawal diyà te Timanem tepad te otaw egpemilang kenyo. ⁴⁵ Aw iling kenyan se eg-inangen niyo, yan ipetaga-taga niyo te batà kaw te Timanem doton te langit, so gayed sikandin egpesenang te aldaw diyà te kedita te otaw pengkey medaet aw mèpiya se pedowan dan. Gayed heman sikandin egpetedak te odan diyà te pawà te kedita te otaw pengkey metòlid aw kenà metòlid se eg-inangen dan. ⁴⁶ Keilangan kedita te otaw se kedekelan niyo te pedowan. Aw olò otaw doen dakel pedowan kenyo se kedekelan niyo te pedowan, wedad ontong ibegay te Timanem diyà kenyo, so pengkey kedita te menge iskribinti eglindoan niyo, gayed dan eg-inang te mèpiya diyà te otaw eg-inang te mèpiya diyà kandan. ⁴⁷ Keilangan segmanen niyo se kedita te otaw. Aw olò menge kedomaan niyo Judiyo se segmanen niyo, wedad eg-inangen niyo labi pa mèpiya diyà te eg-inangen te doma, so se kedita te otaw kenà Judiyo eglindoan niyo, gayed dan eggsagman te menge kedomaan dan. ⁴⁸ Yan, keilangan melobos se pedowan niyo iling te kelobos te pedowan te Amay niyo Timanem doton te langit.”

¹ “Ikà niyo egpemekità te pegtolò niyo te Timanem diyà te doma otaw amon iduyun kaw dan, so aw ibeg niyo iduyun kaw te doma otaw, wedad ontong kinewaen niyo lekat te Amay niyo Timanem eg-ogpà doton te langit.

² “Yan aw megtabang kaw te otaw sagkep, ikà niyo eg-indan diyà te kedita te otaw amon iduyun kaw dan, so iling kenyan se eg-inangen te otaw eden dan aw egpenimanem dan. Yan se eg-inangen dan doton te simbahan te Judiyo aw kidoen te dalan, amon iduyun dan te munge doma otaw. Meneng eneng-enengi niyo se kagi ko seini. Wedad palos ontong ibegay te Timanem kandan. ³ Meneng aw megtabang kaw te otaw sagkep, keilangan eked iyan ketegahi te doma otaw pengkey sigalak niyo. ⁴ Aw eked niyo petega-tegahi diyà te doma otaw se pegpemegay niyo diyà te otaw sagkep, kitaen iyan te Amay niyo Timanem doton te langit, aw begayan kaw din te ontong.”

Tepad te pegtawal-tawal

Mat. 6:5-15; Luc. 11:2-4

⁵ “Aw megtawal-tawal kaw diyà te Timanem, ikà niyo eg-iling te otaw eden dan aw egpenimanem dan, so egkeibeg dan egtawal-tawal doton te simbahan aw doton heman te dalan amon kitaen dan te munge doma otaw. Meneng eneng-enengi niyo se kagi ko seini. Wedad palos ontong ibegay te Timanem kandan. ⁶ Meneng aw megtawal-tawal kaw, pegsiolì kaw. Tekepi niyo se leleangan, aw pegtawal-tawal kaw diyà te Amay niyo Timanem eked kitai. Pengkey eked kaw kitai te doma otaw, komità se Timanem kenyo, aw begayan kaw din te ontong.

⁷ “Ikà niyo egtawal-tawal aw kenà lekat te pedowan niyo se kagi, so iling kenyan se pegtawal-tawal te munge otaw kenà egpenimanem. Eden dan aw menenalan se Timanem kandan tandà te medita se kagi dan. ⁸ Ikà

niyo eg-iling kandan, so tapay netaga-tagaga se Amay niyo Timanem aw eden se kelidoan niyo pengkey wedà kaw pa pemoyò diyà kandin. ⁹ Pegtawal-tawal kaw diyà te Timanem iling kani. 'Amà kidoen te langit, ibeg day iduyun ka te kedita te otaw. ¹⁰ Ibeg day lomowan ka diyà te kedita te otaw. Ibeg day metoman se ibeg no dini te keneyonan iling te pegketoman te ibeg no doton te langit. ¹¹ Begayi kay te kànen botong te kelikit te aldaw. ¹² Pegwedadi se salà ininang day diyà kamno onawa te pegwedad day te salà ininang te doma otaw diyà kenami. ¹³ Ikà egpeokit kenami diyà te peg-akal, meneng pekediyoi kay diyà ki Satanas.'

¹⁴ "Aw pegwedaden niyo se salà ininang te doma otaw diyà kenyo, pegwedaden heman te Amay niyo Timanem se salà ininang niyo diyà kandin. ¹⁵ Meneng aw eked niyo pegwedadi se salà ininang te doma otaw diyà kenyo, eked heman pegwedadi te Amay niyo Timanem se salà ininang niyo diyà kandin."

Tepad te pegpowasa

¹⁶ "Aw megpowasa kaw, ikà niyo egpetaga-tagaga kenyan diyà te doma otaw pineokit te bawa niyo. Ikà niyo eg-iling te menge otaw eden dan aw egpenimanem dan, so eg-inangen dan medaet se bawa dan amon metaga-tagaga se doma otaw te kenà dan egpengaen. Eneng-enengi niyo se kagi ko seini. Wedad den palos ontong ibegay te Timanem kandan. ¹⁷ Meneng aw megpowasa kaw, penowat kaw te logay, aw pegdàpog kaw te bawa, ¹⁸ amon eked ketagaga se doma otaw te wedà kaw kaen. Pengkey eked iyan ketegahi te doma otaw, meneng ketegahan iyan te Amay niyo Timanem eked kitai, aw doen ontong ibegay din diyà kenyo."

*Kedònan doton te langit**Mat. 6:19-21; Luc. 12:33-34*

¹⁹ “Ikà niyo egtipon te kedònan dini lanto te tanà, so peg-enayen iyan, aw megkedaet iyan, aw ebaten iyan te menenakaw. ²⁰ Meneng keilangan megtipon kaw te kedònan doton te langit. Eked iyan peg-enayi, aw eked iyan pegkedaet, aw eked iyan heman ebati te menenakaw. ²¹ Aw kenan ketipon se kedònan niyo, yan heman se keeneng-enengan niyo.”

*Mata te otaw**Mat. 6:22-23; Luc. 11:34-36*

²² “Komità se otaw pineokit te mata. Aw mèpiya se mata te otaw, melowa se pegtengteng din. ²³ Meneng aw medaet se mata, iling te mengitngit se pegtengteng din pengkey aldaw. Iling heman kenyan, aw medaet se pedowan te otaw, ontò medaet se kedita te eg-inangen din.”

*Timanem aw kedònan**Mat. 6:24-34; Luc. 16:13; 12:22-31*

²⁴ “Wedad otaw meketolò te dowà amo din. Aw megpe-lenged sikandin diyà te sebad, eked sikandin tolò te sebad. Sebad olò se tekingan din, aw eked din segmani se sebad. Iling heman kenyan, eked pegsebad se pegpenimanem niyo aw pegpengewarta niyo.

²⁵ “Yan se doun te mikagi a den diyà kenyo, ikà niyo egketetana tepad te keogpà niyo aw eden se kànen aw inemen niyo. Ikà niyo heman egketetana tepad te lawa niyo aw eden se ekasan niyo. So binegayan kaw den te Timanem te ontò meelagà, siyan pedowan niyo aw lawa niyo, yan ikà niyo egketetana tepad te kànen aw ekasan niyo. ²⁶ Eneng-enengi niyo tepad te menge manok te kebenesan. Kenà dan egpenanem. Kenà dan heman eglegani. Kenà dan heman eglodok te kànen dan kidoen

te pol. Meneng gayed dan egbegayan te Amay niyo Timanem te kànen. So eg-ipaten te Timanem se kedita te manok te kebenesan pengkey iling te wedad keelagà dan, ontò kaw din heman ipaten, so meelagà kaw pa diyà te kedita te manok te kebenesan. ²⁷ Pengkey metetana kaw, meneng eked pegkelayat se omol niyo pineokit te ketetana niyo. ²⁸ Ikà niyo heman egketetana tepad te ekasan niyo. Eneng-enengi niyo se bolak te kebenesan. Gayed dan egtilles pengkey kenà dan egterbaho, aw kenà dan heman egpengabel te penenaktun. ²⁹ Meneng eneng-enengi niyo se kagi ko seini. Pengkey mèpiya se bawa te penenaktun te selotan si Solomon gebii, meneng labi pa mèpiya se bawa te bolak te kebenesan. ³⁰ So ininang te Timanem mèpiya se bawa te bolak te kebenesan pengkey sonogen iyan te eked kenamay, labi pa metoman se peg-ipat din kenyo. Meneng wedà pa kedi kelobos se pegsalig niyo kandin. ³¹ Ikà niyo egketetana tepad te kànen niyo, aw inemen niyo, aw ekasan niyo. ³² Se kedita te otaw kenà egsalig te Timanem, gayed dan egketetana tepad te keogpà dan. Meneng netegahan den te Amay niyo Timanem se kedita te keperluan niyo. ³³ Yan pelowani niyo se Timanem diyà te kenyo pegkeotawun, aw tolò kaw te ibeg din, aw yan begayan kaw din heman te keilangan niyo.

³⁴ “Yan ikà niyo egketetana aw eden se domateng diyà kenyo kealdaw. Pebeyai niyo se keperluan domateng te modi aldaw, so botong se keperluan niyo te aldaw seini.”

7

Tepad te peg-okom

Mat. 7:1-6; Luc. 6:37-38,41-42

¹ “Ikà niyo eg-okom te doma otaw amon eked kaw heman okomi. ² Okomen kaw onawa te peg-okom niyo

te munge doma otaw. Keidowan kaw heman onawa te pegkeido niyo te munge doma otaw. ³ Mola niyo egkitaen se sagbet kidoen te mata te doma niyo, meneng wedà niyo ketegahi te doen batang kidoen te kenyo mata. ⁴ Aw doen batang kidoen te kenyo mata, eked kaw peketabang te doma niyo amon meabat se sagbet lekat te kandin mata. ⁵ Kolang se aneng-aneng niyo. Ebati niyo onà se batang lekat te kenyo mata, aw penga niyan metaen se pegkità niyo amon mengabat kaw heman te sagbet lekat te mata te doma niyo.

⁶ “Pekeimanday kaw te pegtoladà niyo te kebenalan. Eked kaw pemowang te mèpiya diyà te munge toyang, so memangà dan beling kenyo. Eked kaw heman pemegay te pirlas meelagà ipeninga diyà te munge osa, so peglegitan dan beling iyan.”

Pemoyò, pengemahà, pegtawal
Mat. 7:7-12; Luc. 11:9-13

⁷ “Aw memoyò kaw diyà te Timanem, begayan kaw din. Aw mengemahà kaw, doen kitaen niyo. Aw tomawal kaw doton te lelebanan, ipeawop kaw. ⁸ Kominawà se kedita te otaw memoyò. Komità se kedita te otaw mengemahà. Ipeawop heman se kedita te otaw tomawal. ⁹ Aw doen batà niyo memoyò te pan, eked kaw pemegay kandin te bato. ¹⁰ Aw memoyò se batà niyo te ikan, eked kaw heman pemegay kandin te memokan. ¹¹ Nayan, pengkey doen medaet eg-inangen niyo, meneng gayed mèpiya se ipegpemegay niyo diyà te munge batà niyo. Labi pa se Amay niyo Timanem kidoen te langit, so egpemegay sikandin te mèpiya diyà te kedita te otaw memoyò diyà kandin.

¹² “Aw meibeg kaw te mèpiya se inangen te doma otaw diyà kenyo, keilangan mèpiya heman se inangen niyo diyà te doma otaw. Pineokit kenyan, tomanen niyo se

kedita te punù ingkeliwat i Moises aw intoladà te minge telekeliwat te kagi te Timanem gebii.”

Dowa se dalan

Mat. 7:13-14; Luc. 13:24

¹³ “Mebelad se lelebangan aw mola okitan se dalan pesalo doton te kilot, aw medita se otaw eg-okit kenyan. Meneng okit kaw te lelebangan mesigpit, ¹⁴ so mesigpit se lelebangan aw melima se dalan pesalo doton te Timanem egpemegay te kaling pedowan, aw pilabok se otaw komità kenyan.”

Aw mèpiya se pedowan, mèpiya se eg-inangen

Mat. 7:15-20; Luc. 6:43-44

¹⁵ “Peg-ahà kaw amon eked kaw keekali te minge otaw egpelingo-lingo telekeliwat te kagi te Timanem. Medaet se tod dan kenyo iling te mebolot menenanap te kebenesan iningedanan lobo egpelingo-lingo iling te ayam-ayam karniro amon megbaet te karniro. ¹⁶ Aw kitaen niyo se eg-inangen dan, ketegahan niyo aw olò dan egpelingo-lingo. Wedad palos pongo te paras geniyen lekat te ligem. Wedad heman pongo igira ipoen lekat te telayid. ¹⁷ Aw mèpiya se kemolò te kayo, mongo iyan te mèpiya. Meneng aw medaet se kemolò te kayo, mongo iyan heman te medaet. ¹⁸ Aw mèpiya se kayo, eked iyan pongo te medaet. Aw medaet se kayo, eked iyan heman pongo te mèpiya. ¹⁹ Aw kenà mèpiya se pongo te kayo, pilayen iyan aw sonogen. ²⁰ Yan aw kitaen niyo se eg-inangen dan, ketegahan niyo aw ontò dan telekeliwat te kagi te Timanem.”

Benal sakop

Mat. 7:21-23; Luc. 13:25-27

²¹ “Kenà kedita te otaw eg-ikagi te siak se pengolo dan se sekopen diyà te peglowan te Timanem, so se otaw

egtolò te ibeg te Amay ko Timanem eg-ogpà doton te langit, yan olò se otaw sekopen te Timanem diyà te peglowan din. ²² Aw domateng se aldaw te peg-okom, medita se otaw mikagi diyà kanak, 'Pengolo, peopi kay bag, so migkeliwat kay te kagi te Timanem tandà te pegtaking day kamno, aw migpelowà kay te bosaw lekat te otaw pineokit te ngadan nikaw, aw doen heman menge kepelahan in-inang day pineokit te ngadan nikaw.' ²³ Meneng mikagi a diyà kandan, 'Wedà a palos ketaga-taga kenyo. Kesayo kaw, kedita niyo eg-inang te medaet.' "

Dowa otaw mig-inang te balay

Mat. 7:25-27; Luc. 6:47-49

²⁴ "Meg-indan a den diyà kenyo tepad te otaw domineg te kagi ko, aw tomolò kenyan. Iling sikandin te otaw mig-inang te balay. Impetindeg din se tollok diyà te lanto te bato doton didalem te tanà. ²⁵ Penga te peg-inang din te balay, minodan aw miglaneg se wayeg aw neapet se balay din. Mebandes se kelamag nekesogat diyà te balay din. Meneng wedà iyan kebàti, so ontò iyan dimasel.

²⁶ "Meneng aw domineg se otaw te kagi ko, aw eked tolò kenyan, iling sikandin te otaw kolang se aneng-aneng din mig-inang te balay diyà te lanto te enay. ²⁷ Penga niyan, minodan aw miglaneg se wayeg. Mebandes se kelamag nekesogat diyà te balay din, aw penga niyan, netongan iyan aw ontò nebàtan."

Tolos te tolada i Jesus

²⁸ Penga te pegtolada i Jesus, ontò nepela se kedita te otaw nenenalan te pegtolada din. ²⁹ Kenà iling te pegtolada te menenolada te punù ingkeliwat i Moises se pegtolada i Jesus, so tinekingan si Jesus te tolos.

8

*Pinegoli i Jesus se tompigun**Mat. 8:1-4; Mar. 1:40-45; Luc. 5:12-16*

¹ Nayan, timopang si Jesus lekat te bontod, aw medita se otaw timaking kandin. ² Doen otaw pigtompig dimoton ki Jesus. Limongken sikandin aw minikagi, “Sir, aw doen ibeg nikaw, netegahan ko te mekebatog ka megpegoli kanak.”

³ Nemaed si Jesus kandin, aw minikagi, “Meibeg a. Kegolian ka.”

Pegketà, negolian sikandin. ⁴ Minikagi si Jesus, “Keilangan wedad palos otaw indanan no tepad te ininang ko kamno. Meneng doton ka te pengolo te simbahan aw pekitai se lawa no diyà kandin. Penga niyan, begayi se ibowang no iling te impunù i Moises amon metaga-taga se kedita te otaw te negolian ka den.”

*Simalig se kapitan ki Jesus**Mat. 8:5-13; Luc. 7:1-10*

⁵ Nayan, pegdateng i Jesus doton te Kapirnaom, doen kapitan te sondalo te gobirno te Roma simongon kandin aw nemoyò te tabang, ⁶ kagi din, “Sir, nesekitan se sineligan ko doton te balay ko. Kenà den egpekeiwal, aw ontò netigdaan.”

⁷ Minikagi si Jesus, “Tomaking a kamno aw megpegoli a kandin.”

⁸ Meneng minikagi se kapitan, “Sir, meyàyà a aw ipeawop ta diyà te balay ko, so ontò a medanà diyà kamno. Meneng botong aw olò ka mikagi te kegolian se sineligan ko, so metoman iyan. ⁹ Gayed a egtolò te otaw eggsogò kanak, aw doen heman menge sondalo nesakop diyà kanak. Aw doen sondalo isogò ko, tomolò sikandin. Aw doen doma ipeangay ko, tomolò heman. Aw doen ipeinang ko te sineligan, yan se inangen din.”

¹⁰ Pegdineg i Jesus te kagi din, ontò nepela. Penga niyan, minikagi sikandin diyà te menge otaw timak-ing kandin, “Eneng-enengi niyo se kagi ko kenyo seini. Pengkey kidoen te menge bowad-bowad i Israel, wedad palos otaw netelaan ko simalig diyà kanak iling te pegsalig din. ¹¹ Metoman se kagi ko seini. Aw domateng se aldaw te peglowan te Timanem, medita se otaw domateng lekat te kedita te ogpeanan te keneyonan, pengkey kenà dan Judiyo. Ipeakop dan diyà te peglowan te Timanem sipat kemonaan niyo si Abraham, aw si Isaac, aw si Jacob. ¹² Meneng doen menge Judiyo egpeliman te ipeakop dan heman, meneng ipeibing dan doton te kengitngitan amon ipelumun dan. Ontò dan megkelag doton, aw megyangget-yangget se ngipen dan tandà te kegemakan dan.”

¹³ Minikagi si Jesus diyà te kapitan, “Olì ka den, so netoman den se pinemoyò no tandà te pegsalig no kanak.”

Peg-ikagi i Jesus kenyan, ayas negolian se sineligan te kapitan.

Pinegolì i Jesus se medita otaw

Mat. 8:14-17; Mar. 1:29-34; Luc. 4:38-41

¹⁴ Nayan, dimoton si Jesus te balay i Pedro, aw kinità din se ogangan i Pedro bayi minibat so piglegenaw.

¹⁵ Penga niyan, pinemàdan i Jesus se belad din, aw pegketà migkèpiya sikandin. Minenaw sikandin aw mig-inang te kànen i Jesus.

¹⁶ Pegsallep te aldaw, inibing dan doton ki Jesus se medita otaw dinetengan te bosaw, aw impelowà din se bosaw lekat kandan pineokit te kagi din. Pinegolian din heman se kedita te otaw doen mesakit. ¹⁷ Pegpegolì din kandan, tinoman din se inikagi te telekeliwat te kagi te Timanem gebii si Isaias, “Pegolien din se kedita te mesakit tadon.”

Menge otaw meibeg peden tomaking ki Jesus

Mat. 8:18-22; Luc. 9:57-62

¹⁸ Nayan, pegkità i Jesus te medita se otaw timaking kandin, minikagi sikandin diyà te menge tinoledaan din te ipesakay dan sikandin te belangay matas doton dipag te lanaw. ¹⁹ Meneng doen menenoladà te punù ingkeliwat i Moises migpedapag diyà ki Jesus. Minikagi sikandin, “Sir, pengkey kenan ka pesalo, gayed a tomaking kamno.”

²⁰ Meneng minikagi si Jesus, “Mèpiya pa se menge menenanap te kebenesan, so doen ogpeanan dan. Mèpiya pa heman se menge manok, so doen heman embongan dan. Meneng melima aw tomaking ka kanak Timanem Migpekeotaw, so wedad palos ibatan ko te delem.”

²¹ Doen heman doma otaw timaking ki Jesus minikagi, “Pengolo, eked a taking kamno singed aw onà matay se amay ko aw ilebeng ko.”

²² Meneng minikagi si Jesus, “Keilangan tomaking ka den kanak, so mèpiya aw otaw wedad kaling pedowan se meglebeng te menge doma dan nematay.”

Impetunung i Jesus se kelamag

Mat. 8:23-27; Mar. 4:35-41; Luc. 8:22-25

²³ Nayan, pegsakay i Jesus te belangay, simakay heman se menge tinoledaan din. ²⁴ Wedà kenamay, dinetengan dan te kelamag ontò mebandes, aw agpet neteled se belangay, so dakel se wayeg nekeawop. Meneng timedogi si Jesus. ²⁵ Penga niyan, linoka dan sikandin, kagi dan, “Pengolo, tebangi kay, so melemes kidon den.”

²⁶ Minikagi si Jesus, “Wedà pa kedi kelobos se pegsalig niyo kanak. Ikà niyo egkelemitan.”

Penga niyan, timindeg si Jesus aw sinagda din se kelamag aw balud, aw migkelinaw se lanaw. ²⁷ Nepela dan aw minikagi dan, “Ontò sikandin metolos, so pengkey kelamag aw balud timolò kandin.”

Pinegoli i Jesus se dowaw otaw dinetengan te bosaw

Mat. 8:28-34; 5:1-20; Luc. 8:26-39

²⁸ Nayan, dimeleg dan doton dipag te lanaw medapag te Gadara. Doen dowaw otaw dinetengan te bosaw simongon kandin lekat te menge lebenganan. Ontò dan mebolot, aw yan wedad otaw eg-okit kidoen. ²⁹ Mig-olangag dan, kagi dan, “Batà te Timanem, ikà pa egpeeleg kenami, so wedà pa dateng se aldaw te pegpelumun no kenami.”

³⁰ Ontò medita se osa nenowal kidoen te kedepagan niyan. ³¹ Nemoyò se menge bosaw, kagi dan, “Aw ipelowà kay nikaw, peopi kay bag diyà te menge osa sida.”

³² Minikagi si Jesus, “Doton kaw den.”

Penga niyan, limowà se bosaw lekat te otaw aw minawop dan diyà te osa. Penga niyan, kimagnan se kedita te osa pesalo te keba, aw kimahang dan doton te lanaw, aw nelemes dan.

³³ Penga niyan, kimadas se menge telediyaga te osa, aw dimoton dan te lonsod. Mig-indan dan te kedita te kinità dan aw eden se neinang diyà te didowa otaw pinelowaan i Jesus te bosaw. ³⁴ Penga niyan, dimoton se kedita te otaw ki Jesus. Pegkità dan kandin, nemoyò dan te mesayo si Jesus lekat te ogpeanan dan.

9

Pinegoli i Jesus se otaw kenà egpekeiwal

Mat. 9:1-8; Mar. 2:1-12; Luc. 5:17-26

¹ Nayan, simakay si Jesus te belangay, aw minoli doton te lonsod tinikedowan din. ² Wedà kenamay, dimateng se otaw neningga te otaw kenà egpekeiwal. Pegkità i Jesus te ontò dan simalig diyà kandin, minikagi sikandin diyà te otaw kenà egpekeiwal, “Elew, peseligi se pedowan no, so pigwedad den se salà nikaw.”

³ Nayan, doen menge menenoladà te punu mig-anenganeng te migtompujus si Jesus te Timanem pineokit te

kagi din siyan. ⁴ Meneng netegahan i Jesus aw eden se aneng-aneng dan, aw minikagi sikandin, “Nengà lay eg-aneng-aneng kaw te medaet? ⁵ Mola megpelingo-lingo se otaw megwedad te salà. Meneng eked pekebatog se otaw megpegolì te otaw kenà egpekeiwal singed aw doen tolos te Timanem diyà kandin. ⁶ Meneng so Timanem a Migpekeotaw, ipekità ko den kenyo te mekebatog a megwedad te salà te otaw dini lanto te tanà.”

Penga niyan, minikagi si Jesus diyà te otaw kenà eg-pekeiwal, “Enaw ka. Loloni se inibatan no, aw oli ka den.”

⁷ Yan minenaw sikandin aw minolì. ⁸ Pegkità te doma otaw kenyan, ontò dan nelemitan, aw dimuyun dan te Timanem so insogò din si Jesus amon megwedad te salà te otaw.

Pegtawal i Jesus ki Mateo

Mát. 9:9-13; Mar. 2:13-17; Luc. 5:27-32

⁹ Nayan, pegkesayo i Jesus lekat kidoen, kinità din se iskribinti nenenoò kidoen te opisina din, ngadan din si Mateo. Minikagi si Jesus, “Taking ka kanak.”

Yan timindeg si Mateo aw timaking sikandin ki Jesus.

¹⁰ Penga niyan, kimaen si Jesus doton te balay i Mateo, aw medita heman se munge iskribinti aw doma otaw nelegeb te salà kimaen doma i Jesus aw munge tinoledaan din. ¹¹ Meneng pegkità te munge Parisiyo kenyan, minikagi dan diyà te munge tinoledaan i Jesus, “Medaet iyan, so egpengaen se pengolo niyo doma te medaet otaw, munge iskribinti aw doma otaw nelegeb te salà.”

¹² Meneng pegdineg i Jesus te inikagi dan, minikagi sikandin, “Kenà otaw wedad mesakit se bolongen te doktor, meneng otaw doen mesakit se bolongen din. ¹³ Keilangan eneng-enengen niyo aw eden se kedegdagan te kagi te Timanem seini,

‘Pengkey measeb kaw egpemegay te bowang diyà kanak, meneng labi a pa meluba aw megpeidoway kaw.’
 Insogò a dini kenà amon tewalen ko se otaw eg-aneng-aneng te metòlid se eg-inangen dan, meneng insogò a dini amon tewalen ko se otaw mekesesalà.”

Tepad te pegpowasa

Mat. 9:14-17; Mar. 2:18-22; Luc. 5:33-39

¹⁴ Nayan, dimoton se menge tinoledaan i Juan Memonyagay ki Jesus, aw mig-insà dan, “Melikit kay egpowasa onawa te eg-inangen te menge Parisiyo. Nengà lay kenà egpowasa se kamno menge tinoledaan?”

¹⁵ Minikagi si Jesus, “Aw doen peipid, eked kepuluk se menge sigalak te meama peipiden dalem te kidoen pa sikandin. Meneng doen aldaw domateng aw meabat lekat kandan se meama peipiden, aw yan se aldaw megpowasa dan so mepuluk dan.”

¹⁶ Mig-indan heman si Jesus te tegdeyanan tepad te kaling toladà din, kagi din, “Eked kepakay aw tompalan se tapay penenaktun te kaling tila wedà pa bugsaki, so komotot se itompal, aw labi pa dakel se lisì te saol. ¹⁷ Aw meg-inang heman se otaw te bino, eked din soli se temek te paras diyà te solanan ininang lekat te kindal te kambing tapay linanit, so aw megbohak se temek, megbeto se solanan tapay linanit, aw lomowà se bino aw kebàtan heman se solanan niyan. Meneng keilangan isawol se temek inangen bino diyà te solanan kaling linanit amon wedad kebàtan.”

Pinegoli se dowa bayi

Mat. 9:18-26; Mar. 5:21-43; Luc. 8:40-56

¹⁸ Nayan, dalem te pegtoladà i Jesus, dimateng se sebad obanen te simbahan te Judiyo. Limongken sikandin diyà ki Jesus, aw minikagi, “Kaling pa nematay se batà ko bayi. Peg-ayas ka bag, aw pemàdi sikandin amon meantay.”

¹⁹ Penga niyan, timindeg si Jesus aw timaking kandin sipat menge tinoledaan din.

²⁰ Nayan, doen heman sebad bayi pigdipenogan te sempolò teg dowà se omay. Migpedapag sikandin diyà te getan i Jesus aw nemaed olò te toktok te saol din, ²¹ so tapay sikandin mig-aneng-aneng te megolì se mesakit din aw pemàdan din olò se saol i Jesus. ²² Penga niyan, miniling si Jesus, aw kinità din se bayi sìyan. Minikagi sikandin, “Atà, peseligi se pedowan nikaw. Negolian ka so simalig ka diyà kanak.”

Pegketà, negolì se mesakit din.

²³ Pegdateng i Jesus doton te balay te obanen, kinità din se menge otaw mig-edop te seluli tandà te lano dan, aw medita heman se doma otaw netipon migkelag. ²⁴ Migpunù si Jesus, kagi din, “Lowà kaw den, so wedà kematay se batà. Olò sikandin timedogi.”

Meneng nebebeyatan dan si Jesus. ²⁵ Pegkeobos te otaw netipon, minawop si Jesus diyà te tambì, aw pinemàdan din se belad te batà, aw minenaw se batà. ²⁶ Nedengeg se peg-antay i Jesus kandin kidoen te kedepagan te og-peanan sìyan.

Pinegolì i Jesus se dowà otaw bota

²⁷ Nayan, pegkesayo i Jesus lekat kidoen, doen dowà otaw bota timaking kandin. Timawal dan, “Bowad-bowad te selotan tadon gebii si David, keidowi kay bag.”

²⁸ Pegdateng din doton te balay, migpedapag se otaw bota diyà kandin. Minikagi si Jesus, “Nemenal kaw lay te mekebatog a megpegolì kenyo?”

Timaba dan, “Ee, Sir. Nemenal kay.”

²⁹ Penga niyan, pinemàdan i Jesus se mata dan, aw minikagi sikandin, “Metoman iyan meinang diyà kenyo tandà te pegsalig niyo diyà kanak.”

³⁰ Pegketà, kimità dan. Penga niyan, ontò migpunù si Jesus, “Keilangan wedad palos otaw indanan niyo.”

³¹ Meneng pegkesayo dan, wedà dan tolò kandin, aw yan se doun te labi pa nedengeg si Jesus doton te kebelad te probinsya siyan.

Pinegolì i Jesus se omo

³² Nayan, pegkesayo te didowa otaw pinegolian te mata, doen otaw neomo inibing doton ki Jesus, so dinetengan sikandin te bosaw. ³³ Penga te pegpelowà i Jesus te bosaw lekat te otaw siyan, nekeikagi den sikandin. Ontò nepela se kedita te otaw kimità kandin, aw minikagi dan, “Wedad palos kinità tadon iling kenyan dini kenitadon minge bowad-bowad i Israel.”

³⁴ Meneng minikagi se minge Parisiyo, “Doen tolos imbegay diyà kandin lekat te pengolo te bosaw si Satanas, aw yan se doun te egpelowà sikandin te bosaw lekat te otaw.”

Neido si Jesus te minge otaw

³⁵ Nayan, miglegeb si Jesus doton te kedita te lonsod aw doma ogpeanan, aw migtoladà kidoen te minge simbahan te Judiyo. Migtoladà sikandin te Mèpiya Indan tepad te peglowan te Timanem, aw migpegolì te kedita te otaw doen mesakit. ³⁶ Pegkità din te medita otaw netipon diyà kandin, ontò din dan neidowan, so ontò dan nelimahan aw wedad egtabang kandan. Iling dan te minge ayam-ayam karniro megketading te eked kenamay aw wedad megdiyaga kandan. ³⁷ Penga niyan, minikagi si Jesus te tegdeyanan diyà te minge tinoledaan din, “Ontò dakel se geniyenen, aw pilabok se otaw meglegani. ³⁸ Timanem se tig-apò te pawà, aw keilangan megtawal-tawal kaw diyà kandin amon isogò din se minge doma otaw meglegani.”

10

*Sempolò teg dowa sogounun i Cristo**Mat. 10:1-4; Mar. 3:13-19; Luc. 6:12-16*

¹Nayan, tinawal i Jesus se sempolò teg dowa tinoledaan din, aw imbegay din diyà kandan se tolos amon megpelowà dan te bosaw lekat te otaw, aw amon megpegoli dan te kedita te otaw doen mesakit. ² Seini se ngadan te sempolò teg dowa sogounun i Cristo, si Simon iningedanan din ki Pedro, aw kedowa din si Andres, aw didowa batà i Sebedeo si Santiago aw si Juan, ³ aw si Felipe, si Bartolome, si Tomas, si Mateo sìyan iskribinti, aw si Santiago batà i Alfeo, si Tadeo, ⁴ aw si Simon meysege, aw si Judas Iscariote, sìyan migtolok ki Jesus.

*Insogò se sempolò teg dowa tinoledaan i Jesus**Mat. 10:5-15; Mar. 6:7-13; Luc. 9:1-6*

⁵ Yan se sempolò teg dowa tinoledaan insogò i Jesus, so doen impunù din diyà kandan, kagi din, “Ikà niyo egdoton te munge ogpeanan te munge otaw kenà Judiyo. Ikà niyo heman egdoton te munge lonsod te Samarya. ⁶ Meneng doton kaw te munge bowad-bowad i Israel. Keilangan tebangan niyo dan so iling dan te munge ayam-ayam karniro migketading. ⁷ Pengkey kenan kaw pesalo, pegtoladà kaw te agpet den lomowan se Timanem. ⁸ Pegolii niyo se otaw doen mesakit. Entayi niyo se otaw nematay. Pegolii niyo se otaw pigtompig. Pelowai niyo se bosaw lekat te otaw. Ikà niyo egpebayad te otaw tebangan niyo, so wedad imbayad niyo te tolos insalig ko diyà kenyo. ⁹ Ikà niyo egpengibing te kwarta pengkey bolawan, selapì aw kedakò. ¹⁰ Ikà niyo heman egpengibing te kelepi, aw saol, aw sepatos ekasan niyo, aw bangkà, so keilangan togpoan kaw te otaw tebangan niyo, iling te otaw egterbaho gayed egtogpoan te otaw egtebangan dan. ¹¹ Aw domateng kaw doton te lonsod aw doma ogpeanan, peg-insà kaw aw sinu

se mèpiya otaw ogpaan niyo. Penga niyan, peg-ogpà kaw kidoen te balay din lamig domeleg kaw doton te doma lonsod. ¹² Aw domateng kaw doton te balay, onà kaw ikagi diyà te otaw eg-ogpà kidoen te begayan se kedita dan te kelinaw. ¹³ Aw mèpiya se pedowan te otaw eg-ogpà kidoen, metoman dan begayan te kelinaw pineokit te kagi niyo. Meneng aw wedad otaw kidoen mèpiya se pedowan din, lomikò diyà kenyo se inikagi niyo. ¹⁴ Aw doen otaw eked pegsagman kenyo aw eked penenalan te itoladà niyo, tektaki niyo se napò te tanà lekat te sepatos niyo te pegkesayo niyo lekat te balay dan aw lonsod dan. Yan metaga-taga se otaw kidoen te doen salà dan, so wedà dan penenalan te intoladà niyo. ¹⁵ Eneng-enengi niyo se kagi ko kenyo seini. Pengkey ipelumun te Timanem se tege Sodoma aw tege Gomora te modi aldaw tepad te salà dan ontò medaet, meneng labi pa ipelumun te Timanem se otaw eked pegsagman kenyo.”

Domateng se pegpemilang

Mat. 10:16-25; Mar. 13:9-13; Luc. 21:12-17

¹⁶ “Nayan, peg-ahà kaw amon eked kaw pemilangi te minge mededaet otaw, so iling kaw te ayam-ayam karniro binanganan te menenanap te kebenesan iningedanan lobo. Yan keilangan ontò kaw megpekebiyasa, aw keilangan wedad palos inangen niyo medaet. ¹⁷ Peg-ahà kaw te minge mededaet otaw, so ibingen kaw dan doton te howis, aw bedasen kaw dan kidoen te simbahan te Judiyo. ¹⁸ Dekepen kaw aw okomen kaw te minge gobirnadur aw minge selotan tandà te pegpesakop niyo diyà kanak, amon meg-indan kaw te kebenalan tepad kanak diyà kandan aw diyà te minge doma otaw kenà Judiyo. ¹⁹ Aw ibingen kaw doton te otaw meg-okom kenyo, ikà niyo egketetana tepad te itaba niyo, aw eden se ikegiyen niyo kandan, so dalem te aldaw sìyan, begayan kaw te kebiyasa

amon meketaba kaw kandan. ²⁰ Kenà lekat te kenyo kebiyasa se ikegiyen niyo, meneng mikagi se Espiritu Santo isogò te Timanem Amay niyo pineokit kenyo.

²¹ “Doen otaw megtolok te kandan menge kedowa amon imetayan dan. Doen heman amay megtolok te kandan menge batà amon imetayan dan. Doen heman menge otaw eked pegasagman te kandan amay aw inay, aw ipeimatay dan. ²² Kebensihan kaw te keditaan te otaw tandà te pegpesakop niyo diyà kanak. Meneng aw tomayod kaw te kedita te kelimahan, ipelowà kaw. ²³ Aw pemilangen kaw kidoen te sebad lonsod, kadas kaw lekat kidoen aw doton kaw te doma lonsod. Penenalan kaw te kagi ko kenyo seini. Siak se Timanem Migpekeotaw, aw lomikò a te eked pa kepenga se pegtoladà niyo kidoen te kedita te lonsod eg-ogpaan te menge bowad-bowad i Israel.

²⁴ “Wedad meiskwilahay labi pa melangkaw diyà te maestro migtoladà kandin. Wedad heman sineligan labi pa melangkaw diyà te amo din. ²⁵ Keilangan meluba se meiskwilahay aw mapet se kelangkaw din diyà te kelangkaw te maestro migtoladà kandin. Keilangan meluba heman se sineligan aw mapet se kelangkaw din diyà te kelangkaw te amo din. Netegahan niyo den te tinawal a te doma otaw Belsebul, se doma ngadan i Satanas. Na, aw medaet se intawal dan te Pengolo niyo, labi pa medaet se itawal dan kenyo menge sakop ko.”

Kelemitanan

Mat. 10:26-31; Luc. 12:2-7

²⁶ “Na, ikà niyo egkelemitan te doma otaw, so ipekità te modi aldaw se kedita te in-eles den seini. Ipetagataga heman se kedita wedà pa ketegahi te doma otaw. ²⁷ Pengkey eden se inikagi ko diyà kenyo te olò sikitadon, yan se keilangan ikegiyen niyo diyà te menge doma otaw.

Pengkey eden se intoladà ko te wedad doma dimineg, yan se keilangan itoladà niyo diyà te kedita te otaw te keneyonan. ²⁸ Ikà niyo egkelemitan te otaw, so olò lawa niyo se mebatog dan imetayan, kenà pedowan niyo wedad temanan. Meneng sebad se keilangan kelemitanan niyo, aw yan se Timanem, so mebatog din pegbàtan se pedowan aw lawa te otaw doton te kilot.

²⁹ “Meneng ontò heman egkeido se Timanem te otaw. Pengkey iling te wedad keelagà te dowà manok te kebenesan aw beyadan niyo, meneng wedad palos manok te kebenesan medagdag kidoen te tanà aw kenà ibeg te Amay niyo Timanem. ³⁰⁻³¹ Yan ikà niyo egkelemitan. So eg-ipaten te Timanem se kedita te manok te kebenesan pengkey iling te wedad keelagà dan, labi kaw pa eg-ipaten te Timanem, so meelagà kaw pa diyà te medita manok te kebenesan. Pengkey logay niyo, netegahan te Timanem aw pila se kedita niyan.”

Peg-indan aw pegbolon ki Jesus

Mat. 10:32-33; Luc. 12:8-9

³² “Aw mikagi se otaw diyà te doma te ontò sikandin migpesakop diyà kanak, mikagi a heman diyà te Amay ko doton te langit te sakop ko se otaw sìyan. ³³ Meneng aw mikagi se otaw te kenà sikandin sakop ko, eked a heman ikagi diyà te Amay ko te sakop ko sikandin.”

Kenà kelinaw meneng pegpedàtay

Mat. 10:34-39; Luc. 12:51-53; 14:26-27

³⁴ “Ikà niyo eg-aneng-aneng te dimini a amon doen kelinaw te otaw dini lanto te tanà, meneng labi pa megpedàtay se otaw te pedowan tandà te pegdateng ko. ³⁵ Eked pegsebad se telebatà tandà te pegdateng ko. Pengkey teleogangan, megpedàtay dan te pedowan tepad kanak. ³⁶ Se ontò poon te otaw kwani, yan se menge sakop te kandin balay.

³⁷ “Aw mikagi se otaw te dakel se pedowan din diyà kanak, meneng labi pa dakel se pedowan din diyà te amay aw inay din, eked kepakay megpesakop diyà kanak. Aw mikagi se otaw te dakel se pedowan din kanak, meneng labi pa dakel se pedowan din diyà te batà din, eked kepakay megpesakop diyà kanak. ³⁸ Aw eked taking se otaw kanak so nelemitan te detengan sikandin te kelimahan aw kemetayun, eked kepakay megpesakop diyà kanak. ³⁹ Pengkey ibeg te otaw megkelayat se omol din dini te keneyonan, meneng kunù din gayed matay. Meneng aw mepakay diyà te otaw pengkey imetayan sikandin tandà te pegtaking din kanak, begayan sikandin te kaling pedowan wedad teman.”

Menge ontong ibegay te Timanem

Mat. 10:40-42; Mar. 9:41

⁴⁰ “Aw megsagman se otaw kenyo, segmanen a din heman. Aw megsagman se otaw kanak, segmanen din heman se Amay ko simogò kanak. ⁴¹ Aw megsagman kaw te telekeliwat te kagi te Timanem tandà te pegkeliwat din te kagi te Timanem, doen ontong ibegay te Timanem diyà kenyo onawa te ontong ibegay din diyà te telekeliwat te kagi din. Aw megsagman kaw te otaw eg-inang te metòlid tandà te peg-inang din te metòlid, doen ontong ibegay te Timanem diyà kenyo onawa te ontong ibegay din diyà te otaw eg-inang te metòlid. ⁴² Eneng-enengi niyo se kagi ko kenyo seini. Aw melao se sebad otaw medanà egtaking kanak, aw memegay kaw te wayeg diyà kandin tandà te pegtaking din kanak, begayan kaw te Timanem te ontong.”

11

Menge otaw insogò lekat ki Juan Memonyagay

Mat. 11:1-6; Luc. 7:18-23

¹ Penga te pegtoladà i Jesus te sempolò teg dow a tinoledaan din, timeped sikandin te menge lonsod meda-pag amon megtoladà te otaw kidoen.

² Nayan, dalem te pegkekeleboso ki Juan Memonyagay, inindanan sikandin tepad te eg-inangen te Misiyas. Pegdineg i Juan kenyan, insogò din se menge tinoledaan din meg-insà ki Jesus, ³ kagi dan, “Sikona lay se ontò insogò te Timanem pinelimanan day, aw doen pa doma domateng?”

⁴ Timaba si Jesus, “Likò kaw den doton ki Juan, aw indani niyo sikandin te kedita te dinineg niyo aw kinità niyo dini. ⁵ Doen menge bota kimità den. Doen heman kapig minipanaw den. Doen tompigun negolian den. Doen bingelen dimineg den. Doen heman nematay neantay den. Doen menge otaw sagkep tinoledaan te Mèpiya Indan. ⁶ Indani niyo heman sikandin te doen keluba te otaw eked pegdowa-dowa te pegsalig din kanak.”

Minikagi si Jesus tepad ki Juan Memonyagay
Mat. 11:7-19; Luc. 7:24-35

⁷ Pegkesayo te otaw insogò i Juan, minikagi si Jesus tepad ki Juan diyà te otaw netipon, kagi din, “Pegdoton niyo te kebigtilan, kenà tigbaw egkedogen te kelamag se pinengemahà niyo. ⁸ Wedà kaw heman doton amon tomengteng te otaw nenaol te ontò meelagà, so se menge otaw egpenaol te ontò meelagà, yan se eg-ogpà doton te balay te selotan. ⁹ Meneng seini indà se tod niyo. Dimoton kaw te kebigtilan amon kitaen niyo se telekeliwat te kagi te Timanem. Pengkey melangkaw se kedita te telekeliwat te kagi te Timanem, meneng labi pa melangkaw si Juan. ¹⁰ Sikandin se migtoladà tepad kanak, aw tinoman din se pakang seini tapay insolat kidoen te kagi te Timanem,

‘Na, doen otaw isogò ko megpetaga-tagà te agpet ka den domateng, amon megpeketagad se kedita te otaw te pegdateng nikaw.’”

¹¹ Minikagi heman si Jesus, “Eneng-enengi niyo se kagi ko kenyo seini. Wedad palos otaw dini lanto te tanà labi pa melangkaw diyà ki Juan Memonyagay. Meneng labi pa melangkaw diyà ki Juan se kedita te otaw megpesakop diyà te peglowan te Timanem. ¹²⁻¹³ Te wedà pa pegtoladà si Juan, gayed migtoladà se minge telekeliwat aw simolat heman si Moises te doen aldaw megtebò se Timanem lomowan. Pengkey lekat te pegtebò te pegtoladà i Juan lamig seini, ontò neibeg se minge otaw megpesakop diyà te peglowan te Timanem, aw medita den se otaw mebolot meibeg peden meg-agaw te peglowan din. ¹⁴ Simpàna nemenal kaw te inikagi te minge otaw gebii, netegahan niyo den te si Juan se timoman te intoladà dan te doen domateng iling te telekeliwat te kagi te Timanem gebii si Elias. ¹⁵ Keilangan menenalan se kedita niyo doen telinga.

¹⁶ “Nayan, seini se tegdeyanan iindan ko kenyo amon ketegahan niyo aw eden se pig-ilingan te minge otaw te aldaw seini. Iling dan te mengisù egdanga doton te pedyanan aw egpetewalay dan, ¹⁷ ‘Pengkey mig-edop kay te seluli amon somayaw kaw, meneng wedà kaw sayaw. Pengkey migdelangan kay tepad te pegkematay, meneng wedà kaw heman kelano.’ ¹⁸ Iling heman kandan se minge otaw te aldaw seini, so pegdini i Juan Memonyagay, kinità dan se ketanem din te melikit egpowasa aw kenà palos heman eg-inem. Meneng wedà dan penenalan kandin, aw minikagi dan te dinetengan sikandin te bosaw. ¹⁹ Pegdini ko Timanem Migpekeotaw, kinità dan se ketanem ko te egpengaen a aw eg-inem. Meneng kunù wedà dan penenalan kanak, aw minikagi dan te legoken a aw meti-inem a, aw egsigelaken ko se minge iskribinti aw doma

otaw nelegeb te salà. Meneng wedad beloyan, so ontò biyasa se Timanem, aw ketegahan iyan te kedita te otaw migpesakop diyà kandin aw komità dan te eg-inangen din.”

Menge otaw wedà pegselsel

Mat. 11:20-24; Luc. 10:13-15

²⁰ Penga niyan, neopal si Jesus te kedita te otaw eg-ogpà doton te menge lonsod ininangan din te keditaan te kepelahan, so wedà dan pegselsel te salà ininang dan. ²¹ Minikagi sikandin, “Mekelelayò kaw tege Korasin. Mekelelayò kaw heman tege Bitsayda, so wedà kaw pegselsel. Aw impekità diyà te tege Tiro aw tege Sidon gebii se inang metolos impekità ko kenyo, nenaol den dan peden te sako aw migbodbod den dan peden te abo diyà te olo dan amon ipetaga-tagaga dan te migselsel dan te salà dan ontò medaet. ²² Eneng-enengi niyo se kagi ko seini. Pengkey ipelumun te Timanem se tege Tiro aw tege Sidon, meneng labi kaw din pa ipelumun, so wedà kaw pemenal kanak. ²³ Sikiyo tege Kapirnaom, pengkey meibeg kaw megpelangkaw-langkaw taman te langit, meneng idagdag kaw doton te kilot. Aw impekità diyà te tege Sodoma se inang metolos impekità ko kenyo, migselsel den dan peden aw wedà heman kebàti se lonsod dan. ²⁴ Eneng-enengi niyo se kagi ko kenyo. Pengkey ipelumun te Timanem se tege Sodoma te modi aldaw tepad te salà dan ontò medaet, meneng labi kaw din pa ipelumun, so wedà kaw pemenal kanak.”

Diyà kaw kanak aw peg-etod kaw

Mat. 11:25-30; Luc. 10:21-22

²⁵ Penga niyan, migtawal-tawal si Jesus, kagi din, “Amà, Pengolo te kedita doton te langit aw dini heman te lanto te tanà, egpesiontong a diyà kamno, so wedà no petegategahi se kebenalan diyà te otaw biyasa aw dakel ontò

netegahan, meneng impetaga-taga no den iyan diyà te otaw medanà. ²⁶ Iduyun ta Amà, so lekat iyan te ibeg nikaw ontò mèpiya.”

²⁷ Penga niyan, minikagi si Jesus, “Insalig te Amay ko se kedita diyà kanak. Se Amay ko, yan olò se netaga-taga te kedita tepad kanak, so Batà a din. Siak olò heman se netaga-taga te kedita tepad te Amay ko, aw eked ketaga-taga se otaw tepad kandin singed aw ipetaga-taga ko iyan diyà kandan.

²⁸ “Aw migkelomay kaw den tandà te pegpengibing niyo te ontò mebegat kidoen te pedowan niyo, diyà kaw den kanak, so ebaten ko iyan diyà kenyo amon mekeetod kaw den. ²⁹ Tiangi niyo se ipeibing ko kenyo iling te yogo, aw peg-iling kaw heman kanak, so ontò mèpiya se pedowan ko, aw mekeetod kaw. ³⁰ Mèpiya se ipeibing ko kenyo. Kenà mebegat se ipetiang ko kenyo.”

12

Tepad te aldaw te peg-etod

Mat. 12:1-8; Mar. 2:23-28; Luc. 6:1-5

¹ Nayan, penga niyan te wedà kenamay, te aldaw te Sebado, minokit si Jesus aw minge tinoledaan din kidoen te kilid te pawà te trigo agpet den geniyan. Pengkey Sebado se aldaw te peg-etod te minge Judiyo, meneng kimetel se minge tinoledaan din te oway te trigo, aw kinaen dan, so binallos dan. ² Meneng pegkità te minge Parisiyo te ininang dan, minikagi dan diyà ki Jesus, “Tay law. Mig-inang se minge tinoledaan no te salà, so doen punù ingkeliwat i Moises te keilangan eked kidon pegterbaho te aldaw te peg-etod.”

³ Minikagi si Jesus, “Kenà medaet se ininang dan. Nelibelan niyo den besi aw eden se insolat kidoen te kagi te Timanem tepad te ininang i David gebii. So

binallos sikandin aw munge sondalo timaking kandin,
⁴ yan minawop dan diyà te balay te Timanem, aw kinaen dan se pan imbegay diyà te Timanem. Pengkey doen punù ingkeliwat i Moises te mepakay olò iyan kànen te munge pengolo te simbahan, meneng kenà medaet se ininang i David. ⁵ Nelibelan niyo besi heman aw eden se impunù ingkeliwat i Moises, te keilangan megterbaho se munge pengolo te simbahan pengkey aldaw te peg-etod, meneng kenà iyan salà dan. ⁶ Eneng-enengi niyo se kagi ko seini. Pengkey melangkaw se dakel simbahan, meneng doen dimateng den dini kenyo labi pa melangkaw diyà te simbahan. ⁷ Doen kagi te Timanem insolat,
 ‘Pengkey measeb kaw egpemegay te bowang diyà kanak, meneng labi a pa meluba aw megpeidoway kaw.’
 Simpana mig-aneng-aneng kaw den aw eden se kedegdagan te kagi te Timanem sìyan, eked kaw sila te otaw wedà peg-inang te salà. ⁸ So siak se Timanem Migpekeotaw, mepakay aw siak se mikagi aw eden se mepakay inangen te otaw te aldaw te peg-etod.”

Pinegolì se otaw nekepis se belad

Mat. 12:9-14; Mar. 3:1-6; Luc. 6:6-11

⁹ Nayan, nesayo si Jesus aw dimoton te simbahan te Judiyo. ¹⁰ Doen otaw kidoen nekepis se belad din. Doen heman munge doma otaw kidoen nengemahà te idimanda dan tepad ki Jesus, aw yan se doun te mig-insà dan, “Aw megpegolì se otaw te sebad otaw te aldaw te peg-etod, mekelàpang lay sikandin te punù ingkeliwat i Moises?”

¹¹ Minikagi si Jesus, “Aw doen ayam-ayam niyo karniro medagdag doton te medalem awang te tanà te aldaw te peg-etod, ayas kaw megtabang kenyan amon mekelowà.
¹² Pengkey meelagà se karniro, meneng labi pa meelagà se otaw diyà te karniro. Yan se doun te eked kidon làpang

te punù ingkeliwat i Moises pineokit te peg-inang tadon te mèpiya pengkey aldaw te peg-etod.”

¹³ Penga niyan, minikagi si Jesus diyà te otaw nekepis se belad, “Oladi se belad nikaw.”

Peg-olad din te belad din, migkèpiya iyan, so nekeon-awa den te dibaloy. ¹⁴ Meneng nesayo se menge Parisiyo, aw migpebelaw-belaway dan tepad te inangen dan amon matay dan si Jesus.

Si Jesus se pinemalli aw insogò te Timanem

¹⁵ Nayan, pegketaga-taga i Jesus te medaet se ibeg dan, nesayo sikandin lekat kidoen, aw medita se otaw timaking kandin. Migpegoli sikandin te kedita dan doen mesakit, ¹⁶ aw migpunù sikandin te keilangan wedad doma otaw indanan dan tepad kandin, ¹⁷ amon metoman se inikagi te telekeliwat te kagi te Timanem gebii si Isaias,

¹⁸ “Seini se pinemalli ko isogò doton kenyo, siyan nedeke-lan ko te pedowan aw nelubahan ko. Ibegay ko se Espiritu Santo meg-ogpà diyà kandin. Megpetaga-taga sikandin te kedita te otaw pengkey kenà Judiyo te agpet a den meg-okom. ¹⁹ Eked sikandin pegbelobansag diyà te menge otaw eked pene-nalan kandin. Eked heman sikandin pegdindil. Aw megtoladà sikandin doton te menge dalan, eked din pelengkawi se kandin pegkeotawun. ²⁰ Inangen din magsen se melomì tigbaw, aw ontò din ipelegdeg se solò kenà melowa lamig do-mateng se aldaw dàgen din se kedita te kededàtan. ²¹ Sikandin se pelimanan te kedita te otaw.”

Si Jesus aw si Satanas

Mat. 12:22-32; Mar. 3:20-30; Luc. 11:14-23

²² Nayan, doen otaw bota aw omo inibing doton ki Jesus, so dinetengan te bosaw. Impelowà i Jesus se bosaw lekat kandin, aw penga niyan, nekeikagi sikandin aw kimità

den. ²³ Nepela se kedita te otaw kimità kenyan, aw migpebelaw-belaway dan, “Sikandin besi se Misiyas, siyan bowad-bowad i David egpelimanan tadon.”

²⁴ Meneng pegdineg te minge Parisiyo te migpelowà si Jesus te bosaw, minikagi dan, “Binegayan sikandin te tolos lekat te pengolo te bosaw si Belsebul, se doma ngadan i Satanas, aw yan se doun te egpelowà sikandin te bosaw lekat te otaw.”

²⁵ Netaga-taga si Jesus te medaet se aneng-aneng dan, aw yan se doun te minikagi sikandin, “Simpana megbebolaw se sakop te sebad selotan, kebàtan se peglowan din te eked kenamay. Simpana megbebolaw se sakop te sebad lonsod, aw megbebolaw se otaw migsebad te balay, kebàtan se ogpeanan dan te eked kenamay. ²⁶ Simpana megpelowà si Satanas te minge sakop din, kebàtan se peglowan din, so inangen din poon se minge sakop din. ²⁷ Aw sinila niyo se pegpelowà ko te bosaw so eden niyo aw pineokit te tolos i Belsebul, sinila niyo heman se kenyo tinoledaan, so egpelowà dan heman te bosaw lekat te otaw. Yan se doun te sikandan se megpetaga-taga kenyo te kolang se pegsila niyo kanak. ²⁸ Meneng aw pineokit te Espiritu Santo se pegpelowà ko te bosaw lekat te otaw, yan ketegahan niyo te dimateng den dini kenyo se peglowan te Timanem.

²⁹ “Aw magsen se otaw, eked keagaw se awop te balay din singed aw domateng se otaw labi pa magsen diyà kandin. Yan se mekedaeg te tig-apò te balay aw meglega-pos kandin, aw penga niyan mengabat sikandin te awop te balay.

³⁰ “Se kedita te otaw eked pegpesakop diyà kanak, yan se egpoon kanak, aw se kedita te otaw kenà egtelaban kanak, iling te egpekadas dan te doma otaw lekat kanak.

³¹ Yan se doun te mikagi a den kani. Aw meg-inang se

otaw te salà, pengkey medaet se inang din aw kagi din, meneng aw megselsel sikandin, pegwedaden te Timanem se salà din. Meneng aw megtompuyus se otaw te Espiritu Santo, eked palos pegwedadi te Timanem se salà din siyan. ³² Aw mikagi se otaw te medaet tepad kanak Timanem Migpekeotaw, aw megselsel sikandin, pegwedaden iyan te Timanem. Meneng aw mikagi se otaw te medaet tepad te Espiritu Santo, eked palos pegwedadi se salà din siyan, pengkey seini aw modi aldaw.”

Kelekatan te kagi medaet

Mat. 12:33-37; Luc. 6:43-45

³³ “Aw mèpiya se kayo, mèpiya heman se pongo niyan. Aw medaet se kayo, medaet heman se pongo niyan. Aw kitaen niyo se pongo te kayo, ketegahan niyo aw eden kemoloi se kayo siyan. ³⁴ Iling kaw te memokan so medaet se eglowà lekat te bahà niyo. Wedad palos mèpiya ikegiyen niyo, so medaet se pedowan niyo. Aw mikagi se otaw, yan ipetaga-tagà din aw eden se awop te pedowan din. ³⁵ Aw mèpiya se pedowan te otaw, mèpiya heman se eg-inangen din. Meneng aw medaet se pedowan te otaw, medaet heman se eg-inangen din.

³⁶ “Penenalan kaw te kagi ko kenyo seini. Aw domateng se aldaw te peg-okom te Timanem te otaw, ipelumun din se kedita te otaw minikagi te kagi wedad kekemowan. ³⁷ Aw mèpiya se eg-ikegiyen niyo, eked kaw pelumuni. Meneng aw medaet se eg-ikegiyen niyo, ipelumun kaw.”

Ibeg te minge otaw komità te pengilala

Mat. 12:38-42; Mar. 8:11-12; Luc. 11:29-32

³⁸ Penga niyan, nemoyò se minge Parisiyo aw menenoladà te punù, kagi dan, “Sir, ibeg day ipekità no diyà kenami se pengilala amon ketegahan day te ontò ka insogò te Timanem.”

³⁹ Meneng minikagi si Jesus, “Medaet se ibeg te kedita te otaw songkani timinàyog te Timanem, so gayed kaw egkeibeg te ipekità ko diyà kenyo se pengilala. Meneng sebad olò se pengilala ipekità te Timanem diyà kenyo, aw yan se iling te neinang diyà te telekeliwat te kagi te Timanem gebii si Jonas. ⁴⁰ So netelowan si Jonas doton te getek te daker ikan gebii, iling heman kenyan, siak Timanem Migpekeotaw se ketelowan doton didalem te tanà. ⁴¹ Aw domateng se aldaw te peg-okom te Timanem te kedita te otaw, tomindeg heman se tege Niniba aw mikagi dan te keilangan ipelumun kaw so wedà kaw pegselsel te salà, so pegdineg te tege Niniba te intoladà i Jonas, migselsel dan te salà. Na, pengkey melangkaw si Jonas, meneng doen den dimini kenyo labi pa melangkaw diyà kandin. ⁴² Aw domateng se aldaw te peg-okom te Timanem te kedita te otaw, tomindeg heman se selotan bayi limowan doton te Siba gebii, aw mikagi sikandin te keilangan ipelumun kaw so wedà kaw penenalan kanak. Pengkey mediyò se ogpeanan din, meneng dimoton sikandin ki Solomon amon menenalan te kebiyasa ipegtoladà din. Na, pengkey melangkaw si Solomon, meneng doen den dimini labi pa melangkaw diyà kandin.”

Peglikò te bosaw

Mat. 12:43-45; Luc. 11:24-26

⁴³ “Aw ipelowà se bosaw lekat te otaw, meglegeb se bosaw doton te kebigtilan amon mengemahà te mèpiya ogpeanan din. Aw wedad ketelaan din, ⁴⁴ mikagi sikandin, ‘Mèpiya pa aw lomikò a doton te otaw tapay ko egogpaan.’ Lomikò se bosaw doton kandin, aw kitaen din se otaw tapay din inogpaan te mèpiya den, iling te balay melinis aw mèpiya pegkesawol. ⁴⁵ Penga niyan, mangay se bosaw te doma pito bosaw labi pa medaet. Domoton se

kedita dan te otaw sïyan aw meg-ogpà dan diyà kandin. Yan labi pa medaet se pegkesawol te otaw sïyan diyà te tapay pegkesawol din. Iling heman kenyan se medaet domateng diyà te kedita te otaw songkani so medaet se ibeg dan.”

Inay aw munge kedowa i Jesus

Mat. 12:46-50; Mar. 3:31-35; Luc. 8:19-21

⁴⁶ Nayan, dalem te migtoladà pa si Jesus, dimateng se inay din aw munge kedowa din. Migtagad dan doton te lowà te balay, so ibeg dan megkità kandin. ⁴⁷ Doen otaw minikagi diyà ki Jesus, “Doton te lowà se inay no aw munge kedowa nikaw. Meibeg dan ekon megkità kamno.”

⁴⁸ Meneng minikagi si Jesus, “Mikagi a den diyà kenyo aw sinu se inay ko aw munge kedowa ko.”

⁴⁹ Penga niyan, intedò i Jesus se munge tinoledaan din, aw minikagi sikandin, “Seini se inay ko aw munge kedowa ko. ⁵⁰ Se munge otaw egtolò te ibeg te Amay ko doton te langit, yan se meinang inay ko aw munge kedowa ko meama aw bayi.”

13

Tegdeyanan tepad te otaw nenabog te benì

Mat. 13:1-9; Mar. 4:1-9; Luc. 8:4-8

¹ Nayan, te aldaw sïyan, limowà si Jesus lekat te balay, aw dimoton te kilid te lanaw, aw neneno kidoen. ² Ontò medita se otaw netipon diyà kandin, aw yan se doun te minalin sikandin doton te belangay pinondohan. Neneno sikandin, meneng mig-ogpà se kedita te otaw tinoledaan din doton te kilid te lanaw. ³ Penga niyan, medita se kebenalan intoladà din kandan pineokit te tegdeyanan.

Minikagi si Jesus, “Doen otaw dimoton te pawà amon menabog te benì, so yan se ketanem te pegpenanem din. ⁴ Pegsabog din, doen benì nesabog diyà te dalan,

aw kinaen iyan te munge manok te kebenesan. ⁵ Doen heman benì nesabog diyà te tanà kebetò-betowan, aw wedad nael tanà kidoen. Timobò iyan te wedà kenamay, so kenà medalem se tanà. ⁶ Meneng pegkelangkaw te aldaw, nelanes aw nematay so wedad nael dalid. ⁷ Doen heman benì nesabog diyà te pinonoan te sagbet doen tigus. Timilles heman se sagbet doen tigus, aw kinelep se munge tobò aw nematay. ⁸ Meneng doen benì nesabog diyà te melambò tanà. Yan se timilles aw minongo. Doen minongo te ginatos, aw doen minongo te keneman aw ketlowan.”

⁹ Minikagi heman si Jesus, “Keilangan menenalan se kedita niyo doen telinga.”

Tod te munge tegdeyanan

Mat. 13:10-17; Mar. 4:10-12; Luc. 8:9-10

¹⁰ Penga niyan, dimoton se munge tinoledaan i Jesus kandin, aw mig-insà dan, “Nengà lay pineokit te tegdeyanan se pegtoladà no te munge doma otaw?”

¹¹ Timaba si Jesus, “Sikiyo se pinetega-tegahan te Timanem te kebenalan tepad te peglowan din. Meneng wedà din petega-tegahi se doma otaw te kebenalan tepad te peglowan din. ¹² Se otaw kominawà te kebenalan, yan se dogangan te kebenalan amon labi pa dakel diyà te keilangan din. Meneng se otaw eked kinawà te kebenalan, yan se pegwedadan te kebenalan. ¹³ Yan olò pineokit te tegdeyanan se pegtoladà ko te doma otaw amon pengkey tomengteng dan, meneng eked dan kità te kedegdagan niyan. Pengkey domineg dan, meneng eked dan ketagataga te kebenalan. ¹⁴ Pineokit kandan, netoman se inikagi te telekeliwat te kagi te Timanem gebii si Isaias, ‘Pengkey domineg kaw, meneng eked kaw pekelabet te dinegen niyo. Pengkey tomengteng kaw, meneng eked kaw ketagataga aw eden se kitaen niyo.

¹⁵ Metoman iyan so migkekagsen den se olo dan amon eked dan pemenal. Neinang den bingelen se telinga dan amon eked dan dineg te kebenalan. Inlipedeng dan se mata dan amon eked dan kità te kedegdagan te kagi ko kandan, so eked dan keibeg pengenganay diyà kanak amon tebangan ko dan.'

¹⁶ "Meneng doen den keluba niyo, so kimità kaw den aw dimineg kaw den te kebenalan. ¹⁷ Eneng-enengi niyo se kagi ko seini. Pengkey medita se telekeliwat te kagi te Timanem aw doma otaw eg-inang te metòlid gebii ibeg komità te inang ko kinità niyo, meneng wedà dan kità kenyan. Pengkey ibeg dan domineg te kagi ko dinineg niyo, meneng wedà dan dineg kenyan."

Kedegdagan te tegdeyanan tepad te otaw nenabog

Mat. 13:18-23; Mar. 4:13-20; Luc. 8:11-15

¹⁸ "Penenalan kaw den te kedegdagan te tegdeyanan tepad te otaw nenabog te benì. ¹⁹ Se benì nesabog diyà te dalan, yan se iling te otaw domineg tepad te peglowan te Timanem meneng eked sikandin pekelabet. Penga niyan, doen inangen i Satanas amon kelibelan din se kagi te Timanem dinineg din. ²⁰ Nayan, se benì nesabog diyà te tanà kebeto-betowan, yan se iling te otaw domineg te kagi te Timanem, aw meluba sikandin, aw tomolò sikandin kenyan te eked kenamay. ²¹ Meneng aw domateng se kelimahan aw pemilangen sikandin tandà te pegpemenal din te kagi te Timanem, tenanan din se pinemenalan din, so iling sikandin te timanem wedad nael dalid. ²² Nayan, se benì nesabog diyà te pinonoan te sagbet doen tigus, yan se iling te otaw ontò domineg te kagi te Timanem into-ladà. Meneng penga niyan, wedad ontong din so dàgen sikandin te ibeg din tomaking te ketanem te keneyonan, aw ibeg din megkeyaman amon meluba sikandin. Yan se doun te wedad ontong din diyà te kagi te Timanem

dinineg din. ²³ Meneng se benì nesabog diyà te melambò tanà, yan se iling te otaw domineg te kagi te Timanem, aw mekelabet kenyan. Doen ontong din iling te intanem mongo te ginatos, aw keneman aw ketlowan.”

Tegdeyanan tepad te sagbet doton te pawà

²⁴ Migtoladà si Jesus te doma tegdeyanan, kagi din, “Iling kani se peglowan te Timanem. Doen otaw nenanem te mèpiya kemolò te omay trigo doton te pawà din. ²⁵ Meneng pegkedelem niyan, doen medaet otaw dimoton te pawà siyan, aw nenanem heman te benì te sagbet onawa se bawa diyà te trigo intanem te tig-apò. Penga niyan, nesayo se otaw nenanem te medaet benì. ²⁶ Eleg timilles se trigo aw sagbet. Meneng pegpemingting te trigo, kinità se sagbet so wedad pongo niyan. ²⁷ Dimoton se minge sineligan te amo dan, aw mig-insà dan, ‘Ontò mèpiya se benì intanem tadon doton te pawà nikaw. Meneng kenan lekat se sagbet?’ ²⁸ Timaba se tig-apò, ‘Yan se intanem te otaw neopal kanak.’ Penga niyan, mig-insà dan, ‘Meibeg ka lay aw pispisen day se sagbet?’ ²⁹ Meneng minikagi sikandin, ‘Ikà niyo pa egpempispis te sagbet so mepispis heman se trigo intanem tadon. ³⁰ Pebeyai niyo iyan tomilles. Aw domateng se aldaw te peglegani, isogò ko se minge otaw meglegani te onà dan pispisen se sagbet aw begkesen dan iyan amon sonogen. Meneng geniyan dan se trigo, aw isawol dan iyan doton te pol.’ ”

Tegdeyanan tepad te benì ontò deitek

Mát. 13:31-32; Mar. 4:30-32; Luc. 13:18-19

³¹ Migtoladà si Jesus te doma tegdeyanan, kagi din, “Iling kani se peglowan te Timanem. Doen benì ontò deitek intanem te otaw doton te pawà din. ³² Pengkey wedad ekon palos benì labi pa deitek kenyan, meneng aw tomilles iyan, labi pa iyan dakel diyà te kedita te doma

intanem din. Megkedakel iyan iling te kayo, aw megsalag se menge manok kidoen.”

Tegdeyanan tepad te yist

Mat. 13:33; Luc. 13:20-21

³³ Migtoladà si Jesus te doma tegdeyanan, kagi din, “Iling heman kani se peglowan te Timanem. Aw isanged se yist diyà te dakel arina, lomebag se kedakel niyan.”

Olò pineokit te tegdeyanan

Mat. 13:34-35; Mar. 4:33-34

³⁴ Gayed migtoladà si Jesus te otaw netipon pineokit te tegdeyanan tepad te peglowan te Timanem, so impeokit din te tegdeyanan se kedita te intoladà din kandan.

³⁵ Pineokit kenyan, tinoman din se kagi te telekeliwat te kagi te Timanem gebii,

“Megtoladà a te otaw pineokit te tegdeyanan. Iindan ko diyà kandan se wedà ko petega-tegahi lekat te keteboan te keneyonan.”

Kedegdagan te tegdeyanan tepad te sagbet

³⁶ Penga niyan, nesayo si Jesus lekat kidoen te otaw netipon, aw minawop diyà te balay. Timaking se menge tinoledaan din aw nemoyò dan, “Indani kay aw eden se kedegdagan te tegdeyanan tepad te sagbet timilles kidoen te pawà.”

³⁷ Minikagi si Jesus, “Se tig-apò te pawà nenanem te mèpiya beni, siaken iyan Timanem Migpekeotaw. ³⁸ Se pawà, yan se keneyonan. Se mèpiya beni, yan se menge otaw migpesakop diyà te peglowan te Timanem. Meneng se sagbet, yan se menge sakop i Satanas. ³⁹ Se medaet otaw nenanem te sagbet, yan si Satanas. Se kedegdagan te peglegani, yan se temanan te keneyonan, aw se otaw meglegani, yan se menge anghil. ⁴⁰ Tinipon dan se sagbet aw sinonog dan. Iling heman kenyan se meinang aw

domateng se temanan te keneyonan. ⁴¹ Siak Timanem Migpekeotaw se somogò te minge anghil amon melobos se peglowan ko. Tiponen dan se kedita te otaw eg-inang te salà aw egboyo te doma otaw. ⁴² Penga niyan, iagbel se kedita dan kidoen te apoy doton te kilot. Ontò dan megkelag doton, aw megyangget-yangget se ngipen dan tandà te kegemakan dan. ⁴³ Meneng iling te pegsenang te aldaw, somenang heman se otaw eg-inang te metòlid aw domateng dan doton te peglowan te Amay dan Timanem. Keilangan menenalan se kedita niyo doen telinga.”

Tegdeyanan tepad te bolawan inlebung

⁴⁴ “Iling kani se peglowan te Timanem. Doen bolawan nenamay inlebung doton te tanà. Nayan, doen otaw neketalà kenyan. Neluba se pedowan din, meneng todà din inlebung, aw minoli. Penga niyan, imbeligyà din se kedita te kededònan din aw bineyadan din se tanà siyan.”

Tegdeyanan tepad te pirlas ontò meelagà

⁴⁵ “Iling heman kani se peglowan te Timanem. Doen tindiro egbayad te mèpiya kemolò te pirlas iling te peninga te bayi. ⁴⁶ Nayan, doen pirlas kinità din ontò meelagà so ontò mèpiya se bawa niyan. Penga niyan, minoli sikandin, aw imbeligyà din se kedita te kededònan din aw bineyadan din se pirlas siyan.”

Tegdeyanan tepad te pokot

⁴⁷ “Iling heman kani se peglowan te Timanem. Doen pokot indagdag doton te lanaw, aw medita se kemolò te ikan nekeawop. ⁴⁸ Pegkedita te ikan, inanggin iyan te otaw egpemokot diyà te kilid te lanaw amon ebaten dan se ikan. Insawol dan se mèpiya kemolò diyà te alat, meneng in-agbel dan se mededaet. ⁴⁹ Iling heman kenyan se meinang aw domateng se temanan te keneyonan. Teniyen te minge anghil se otaw eg-inang te medaet aw

otaw eg-inang te metòlid. ⁵⁰ Penga niyan, iagbel dan se otaw mededaet kidoen te apoy doton te kilot. Ontò dan megkelag doton, aw megyangget-yangget se ngipen dan tandà te kegemakan dan.”

Tapay aw kaling kebenalan

⁵¹ Nayan, mig-insà si Jesus diyà te menge tinoledaan din, “Nelebetan niyo lay se kedita te intoladà ko?”

Timaba dan, “Ee. Nelebetan day.”

⁵² Minikagi si Jesus, “Aw doen otaw biyasa te kagi te Timanem tapay insolat, aw meg-iling heman sikandin te kaling itoladà ko tepad te peglowan te Timanem, iling sikandin te otaw doen dakel kedònan gayed din eggemiten, pengkey tapay aw kaling.”

Wedà segmani si Jesus kidoen te Nasarit

Mat. 13:53-58; Mar. 6:1-6; Luc. 4:16-30

⁵³ Nayan, penga te pegtoladà i Jesus te kedita te tegdeyanan siyan, nesayo sikandin ⁵⁴ aw minolì doton te kandin lonsod. Migtoladà sikandin doton te simbahan te Judiyo. Ontò nepela se menge otaw kidoen, aw minikagi dan, “Sebad den ini, so ontò sikandin biyasa, aw mèpiya heman se kepelahan eg-inangen din. ⁵⁵ Meneng netegahan tadon te sikandin se batà te karpintiro, aw si Maria se inay din. Netegahan tadon heman se menge kedowa din si Santiago, si Jose, si Simon, aw si Judas. ⁵⁶ Eg-ogpà heman se menge etebay din dini kenitadon. Ontò kidon nepela so dakel den se nebatog din.”

⁵⁷ Yan nebensi dan kandin. Meneng minikagi si Jesus, “Gayed egsegmanen te doma otaw se telekeliwat te kagi te Timanem, meneng kenà sikandin egsegmanen te otaw te kandin lonsod aw menge kedowa din.”

⁵⁸ Yan se down te pilabok se kepelahan ininang i Jesus kidoen, so wedà dan pemenal kandin.

14

*Pegpengimatay ki Juan Memonyagay**Mat. 14:1-12; Mar. 6:14-29; Luc. 9:7-9*

¹Nayan, si Herod se otaw limowan doton te Galiliya, aw doen dinineg din tepad te eg-inangen i Jesus. ²Minikagi sikandin diyà te munge opisyal, “Sikandin besi si Juan Memonyagay neantay den lekat te nematay, aw yan se doun te eg-inangen din se kepelahan metolos.”

³Yan se inikagi din, so kedengan impedakep din si Juan, aw imegapos din, aw impekeleboso din. Yan se ininang din diyà ki Juan amon meluba se nayi din si Herodias inagaw din diyà te kedowa din si Felipe. ⁴Peg-agaw i Herod te nayi din, simila si Juan kandin, kagi din, “Miginang ka den te salà, so nengagaw ka te nayi nikaw.”

⁵Ibeg i Herod ipeimatay din si Juan, meneng wedà deleg, so nelemitan sikandin te meopal se kedita te otaw kandin, so eg-aneng-aneng dan te si Juan se ontò telekeliat te kagi te Timanem.

⁶Peg-inang i Herod te pista tepad te aldaw te pegtebaw din, simayaw se laga batà i Herodias amon meluba se munge otaw timanod. Ontò heman neluba si Herod, ⁷aw yan se doun te ontò sikandin migsapà te ibegay din diyà te laga siyan se pengkey eden se pemoyoen din. ⁸Penga niyan, timolò se laga te punù te inay din aw minikagi, “Pesipali se lieg i Juan Memonyagay, aw pesoli se olo din diyà te dakel sablag, aw peibingi dini kanak.”

⁹Nelidò se pedowan i Herod. Meneng so migsapà sikandin, aw eked keibeg silahen te munge otaw timanod, tinoman din se pinemoyò te laga. ¹⁰Insogò din se sondalo doton te keleboso. Sinipal din se lieg i Juan. ¹¹Insawol din se olo diyà te sablag, aw imbegay din diyà te laga, aw inibing din doton te inay din. ¹²Penga niyan, dimoton se munge tinoledaan i Juan te keleboso, aw inabat dan se

lawa din aw inlebung dan iyan. Penga niyan, dimoton dan ki Jesus aw mig-indan dan diyà kandin tepad te pegkematay i Juan.

Impekaen i Jesus se lima melalan otaw

Mat. 14:13-21; Mar. 6:30-44; Luc. 9:10-17; Juan 6:1-14

¹³ Nayan, pegdineg i Jesus tepad te pegpengimatay ki Juan, nesayo sikandin lekat kidoen. Simakay sikandin te belangay aw dimoton te kesikmihan. Meneng pegketagataga te kedita te otaw te pineselowan i Jesus, dimoton dan heman. Minipanaw dan lekat te menge ogpeanan dan. ¹⁴ Pegtenà i Jesus, kinità din se ontò medita otaw migtagad kandin. Ontò din dan neidowan, aw pinegolian din se kedita te otaw doen mesakit. ¹⁵ Pegkeapon niyan, dimoton se tinoledaan din kandin, aw minikagi dan, “Ontò ini kebigtilan, aw agpet den delem. Pekeseyowi se kedita te otaw doton te lonsod amon mayad dan te kànen dan.”

¹⁶ Minikagi si Jesus, “Ikà niyo egpekesayo kandan. Pemekàni niyo dan.”

¹⁷ Minikagi dan, “Meneng doen olò lima se pan, aw didowa se ikan.”

¹⁸ Minikagi si Jesus, “Ibingi niyo iyan dini kanak.”

¹⁹ Penga niyan, impeonsad din se kedita te otaw kidoen te sagbet. Inabat din se lima pan aw didowa ikan. Limengag sikandin doton te langit aw migpesiontong diyà te Timanem kenyan. Penga niyan, binelà-belà din se pan aw imbegay din diyà te menge tinoledaan din, aw imbegay dan iyan diyà te menge otaw netipon. ²⁰ Kimaen se kedita dan aw nebesog dan. Penga niyan, inimon dan se samà te pan kinaen dan, aw sempolò teg dowà se buun nepenò. ²¹ Menge lima melalan se meama kimaen kenyan, aw wedà bilangi se menge bayi aw mengisù.

Minipanaw si Jesus diyà te lanto te lanaw
Mat. 14:22-33; Mar. 6:45-52; Juan 6:15-21

²² Penga niyan, impeonà i Jesus se minge tinoledaan din simakay te belangay pesalo doton dipag te lanaw. Dalem niyan, impeolì din se kedita te otaw netipon. ²³ Pegkesayo dan, timikedeg si Jesus doton te bontod sebad din amon megtawal-tawal. Pegsallep te aldaw, kidoen si Jesus te bontod olò din sebad. ²⁴ Meneng mediyò den se belangay doton te lawod te lanaw. Ontò dan nelimahan, so dinetengan dan te dedakel balud aw simongsong dan te kelamag. ²⁵ Ontò mata-mata te iselem, dimoton si Jesus kandan aw minipanaw sikandin diyà te lanto te lanaw. ²⁶ Meneng pegkità dan kandin, ontò dan nelemitan. Migpuypuy dan tandà te lamit dan, aw minikagi dan, “Along iyan.”

²⁷ Meneng pegketà timawal si Jesus, “Peseligi niyo se pedowan niyo, so siaken ini. Ikà niyo egkelemitan.”

²⁸ Minikagi si Pedro, “Pengolo, aw ontò sikona, peipenawi a diyà te lanto te lanaw pesalo doton kamno.”

²⁹ Minikagi si Jesus, “Na, diyà ka.”

Penga niyan, timenà si Pedro lekat te belangay aw minipanaw diyà te lanto te lanaw pesalo doton ki Jesus. ³⁰ Meneng peg-imanman din te kelamag ontò mebandes, nelemitan aw agpet melemes. Meneng nengenganay sikandin, kagi din, “Pengolo, tebangi a.”

³¹ Mig-ayas si Jesus minawid kandin, aw minikagi, “Wedà pa kedì kelobos se pegsalig no kanak. Nepela a so migdowa-dowa ka.”

³² Penga niyan, eleg dan simakay te belangay, aw timunung se kelamag. ³³ Limongken se doma tinoledaan diyà ki Jesus, aw migsimba dan kandin, aw minikagi dan, “Ontò ka Batà te Timanem.”

Pinegoli i Jesus se menge otaw doton te Genesarit

Mat. 14:34-36; Mar. 6:53-56

³⁴ Nayan, penga te pegbatas dan te lanaw, dimateng dan doton te Genesarit. ³⁵ Kimilala se tege Genesarit ki Jesus, aw impeangay dan se kedita te otaw doen mesakit lekat te kedepagan niyan. ³⁶ Nemoyò dan diyà ki Jesus aw mepakay dan olò memaed te toktok te saol din, aw negolian se kedita dan nemaed kenyan.

15

Ketanem te menge kemonaan

Mat. 15:1-9; Mar. 7:1-13

¹ Nayan, doen menge Parisiyo aw menenoladà te punù ingkeliwat i Moises dimoton ki Jesus lekat te Jerusalem. Minikagi dan diyà kandin, ² “Eglàpang se menge tinoledaan no te ketanem te kemonaan tadon, so kenà dan eg-onaw te belad dan te eked dan pa kaen.”

³ Minikagi si Jesus, “Eglàpang kaw heman te punù te Timanem pineokit te pegtaking niyo te ketanem te kemonaan niyo. ⁴ Migpunù se Timanem, ‘Keilangan segmanen no se amay aw inay nikaw.’ Migpunù heman sikandin, ‘Keilangan imetayan se otaw megtindaet te amay aw inay din.’ ⁵ Meneng egtoladà kaw te mepakay aw eked pegsagman se otaw te amay aw inay din aw olò mikagi diyà kandan, ‘Se itabang ko peden kenyo, yan se tapay ko imbegay diyà te Timanem.’ ⁶ Meneng pineokit te pegtaking niyo te ketanem sìyan, timinàyog kaw den te kagi te Timanem te keilangan segmanen niyo se amay aw inay niyo. ⁷ Tay law. Eden niyo aw egpenimanem kaw. Sikiyo se tinedoan te kagi te Timanem ingkeliwat i Isaias gebii,

⁸ ‘Pengekey eg-ikagi se otaw sìyan te egtaking dan kanak, meneng wedà kelobos se pedowan dan diyà kanak.

⁹ Wedad ontong te pegsimba dan kanak, so se ketanem te otaw ipegtoladà dan, yan se ininang dan punù te Timanem.’ ”

Kelekatan te salà

Mat. 15:10-20; Mar. 7:14-23

¹⁰ Nayan, medita se otaw netipon kidoen, aw timawal si Jesus diyà kandan amon megpedapag dan diyà kandin. Minikagi sikandin, “Penenalan kaw kanak amon mekelabet kaw kani. ¹¹ Kenà egpekesalà se otaw pineokit te iawop din diyà te bahà din. Meneng egpekesalà se otaw pineokit te lomowà lekat te bahà din.”

¹² Penga niyan, dimoton se menge tinoledaan i Jesus kandin, aw minikagi dan, “Neopal den se menge Parisiyo tepad te inikagi no siyan.”

¹³ Minikagi si Jesus, “Pegbàtan dan te Amay ko eg-ogpà doton te langit, iling te sagbet pispisen doton te pawà.

¹⁴ Pebeyai niyo se menge Parisiyo. Iling dan te otaw bota megtelaman mengibing te doma. Meneng wedad otaw bota mekeagak te doma din bota, so medagdag se didowa dan doton te awang te tanà.”

¹⁵ Minikagi si Pedro, “Lebadi diyà kenami se tegdeyanan intoladà no gina.”

¹⁶ Minikagi si Jesus, “Nepela a so iling kaw heman te doma otaw wedà pekelabet. ¹⁷ Pengkey eden se kànen iawop diyà te bahà te otaw, yan se domeleg doton te getek, aw penga niyan lomowà lekat te lawa. ¹⁸ Meneng se kagi lomowà lekat te bahà te otaw, lekat iyan te pedowan din, aw yan se doun te egpekesalà se otaw.

¹⁹ Pedowan se kelekatan te medaet ibeg te otaw egbonò, aw eglakad, aw egpenakaw, aw egkebolalaw, aw egbaet-baet. ²⁰ Egpekesalà se otaw pineokit te kedita niyan. Meneng kenà egpekesalà se otaw kenà eg-onaw te belad te eked pa kaen.”

*Pegsalig te bayi kenà Judiyo**Mat. 15:21-28; Mar. 7:24-30*

²¹ Nesayo si Jesus lekat kidoen aw dimoton te probinsya medapag te lonsod te Tiro aw Sidon. ²² Doen bayi mig-ogpà kidoen kenà Judiyo so lekat te Canaan se menge kemonaan din. Dimoton sikandin ki Jesus aw minikagi te dakel se kagi din, “Sir, bowad-bowad i David, keidowi a bag, so ontò dinetengan te bosaw se batà ko bayi.”

²³ Meneng wedà sikandin segmani i Jesus. Yan dimoton se menge tinoledaan i Jesus kandin aw nemoyò dan, kagi dan, “Pekeseyowi se bayi siyan, so egtaking kenitadon aw gayed egbelisi.”

²⁴ Minikagi si Jesus, “Olò menge bowad-bowad i Israel se sinogoan kanak tebangan ko, so iling dan te menge karniro migketading.”

²⁵ Nayan, migpedapag se bayi diyà ki Jesus, aw limongken diyà kandin, aw minikagi, “Sir, tebangi a bag.”

²⁶ Mig-indan si Jesus te tegdeyanan amon metaga-taga se bayi te olò menge Judiyo se tebangan din, kagi din, “Eked kepakay aw ebaten te otaw se kànen te menge batà din amon ibegay din diyà te menge toyang.”

²⁷ Minikagi se bayi, “Sir, benal iyan. Meneng mepakay aw komaen se toyang te momò medagdag lekat te lemisa te tig-apò.”

²⁸ Penga niyan, minikagi si Jesus, “Tiyà, ontò ka simalig kanak. Tomanen ko den se ibeg nikaw.”

Pegketà, negolian se batà din.

Pinegoli i Jesus se medita otaw

²⁹ Nayan, nesayo si Jesus lekat kidoen, aw minokit te kilid te lanaw te Galiliya. Timikedeg sikandin te bontod medapag, aw nenenuo kidoen. ³⁰ Ontò medita se otaw dimoton kandin, aw inibing dan heman se menge doma otaw doen medita kemolò te mesakit. Doen menge kapig,

aw nepantig, aw bota, aw omo, aw medita heman se doma otaw doen mesakit. Insawol dan doton dapag i Jesus, aw pinegolian din dan. ³¹ Nepela se kedita te otaw, so kinità den dan te minikagi den se omo, aw negolian se nepantig, aw minipanaw se kapig, aw kimità den se bota. Yan se doun te dimuyun dan te Timanem egseligan te menge bowad-bowad i Israel.

Impekaen i Jesus se epat melalan otaw

Mat. 15:32-39; Mar. 8:1-10

³² Na, penga niyan, tinawal i Jesus se menge tinoledaan din, aw minikagi sikandin, “Neidowan ko den se menge otaw dini, so netelowan den dan timaking kanak, aw wedad den kànen dan. Eked kepakay aw ipeolì ko dan te binallos dan pa, so metapì dan kidoen te dalan.”

³³ Minikagi se tinoledaan din, “Meneng kebigtilan ini, aw wedad palos ebatan tadon te pan botong te ipekaen tadon kandan, so ontò dan medita.”

³⁴ Mig-insà si Jesus, “Pila lay se pan inibing niyo?”

Timaba dan, “Pito olò, aw pilabok se ikan dedeitek.”

³⁵ Penga niyan, impeonsad din se kedita te otaw diyà te tanà. ³⁶ Inabat din se pito pan aw ikan, aw migpesion-tong diyà te Timanem kenyan. Binelà-belà din iyan, aw imbegay din diyà te menge tinoledaan din, aw inteped dan diyà te menge otaw netipon. ³⁷ Kimaen se kedita dan aw nebesog dan. Penga niyan, inimon dan se samà te pan kinaen dan, aw pito se boliyas nependò. ³⁸ Menge epat melalan se meama kimaen kenyan, aw wedà bilangi se menge bayi aw mengisù.

³⁹ Penga niyan, impeolì i Jesus se kedita dan, aw simakay sikandin te belangay aw dimoton te probinsya medapag te Magadan.

16

*Ibeg dan komità te pengilala**Mat. 16:1-4; Mar. 8:11-13; Luc. 12:54-56*

¹ Nayan, doen menge Parisiyo aw Sadusiyo dimoton ki Jesus amon megtandà dan kandin. Nemoyò dan te ipekità din diyà kandan se pengilala amon ketegahan dan te ontò sikandin insogò te Timanem. ² Minikagi si Jesus, “Aw melalag se langit te pegsallep te aldaw, ketegahan niyo te eked odan te keeldawan niyan. ³ Aw melalag se langit te iselem aw domelem, ketegahan niyo te modan te aldaw siyan. Nepela a kenyo, so pengkey egpengilala kaw te ledyawan doton te langit, meneng wedà niyo kilelai aw eden se kedegdagan te egkeinang seini. ⁴ Medaet se ibeg te kedita te otaw songkani timinàyog te Timanem, so gayed kaw egkeibeg te ipekità ko diyà kenyo se pengilala. Meneng sebad olò se pengilala ipekità te Timanem diyà kenyo, aw yan se iling te neinang diyà te telekeliwat te kagi te Timanem gebii si Jonas.”

Penga niyan, nesayo si Jesus lekat kidoen.

*Kolang se intoladà te menge Parisiyo aw Sadusiyo**Mat. 16:5-12; Mar. 8:14-21*

⁵ Nayan, minatas se menge tinoledaan i Jesus te lanaw, meneng wedad pan inibing dan so nelibelan dan se bawo dan. ⁶ Minikagi si Jesus, “Peg-ahà kaw amon eked kaw ketini te yist te menge Parisiyo aw Sadusiyo.”

⁷ Migpebelaw-belaway se menge tinoledaan din, kagi dan, “Yan se inikagi din so wedad pan inibing tadon.”

⁸ Meneng netegahan i Jesus aw eden se aneng-aneng dan, aw minikagi sikandin, “Tay law. Wedà pa kedì kelobos se pegsalig niyo kanak. Ikà niyo egkepela so wedad pan inibing niyo. ⁹ Nepela a kenyo, so wedà kaw pa ketaga-taga aw eden se mebatog ko inangen. Iling te nelibelan niyo den se pegpekaen ko te lima melalan

otaw te lima pan, aw medita se buun inipenò niyo te samà. ¹⁰ Iling te nelibelan niyo heman se pegpekaen ko te epat melalan otaw te pito pan, aw medita se boliyas inipenò niyo te samà. ¹¹ Meneng nepela a so wedà kaw pa pekelabet te kenà pan se kedegdagan te inikagi ko gina, te keilangan meg-ahà kaw amon eked kaw ketini te yist te menge Parisiyo aw Sadusiyo.”

¹² Penga niyan, nekelabet dan te kenà yist te pan se keilangan imendayan dan, meneng keilangan meg-pekeimanday dan te ipegtoladà te menge Parisiyo aw Sadusiyo.

Minikagi si Pedro te si Jesus se Misiyas

Mat. 16:13-20; Mar. 8:27-30; Luc. 9:18-21

¹³ Nayan, dimoton si Jesus te lonsod medapag te Sesarya Filipos. Pegdateng din doton, mig-insà sikandin diyà te menge tinoledaan din, kagi din, “Eden lay se kagi te kedita te otaw tepad te Timanem Migpekeotaw? Sinu a lay ekon?”

¹⁴ Timaba dan, “Doen menge otaw eg-ikagi te sikona si Juan Memonyagay. Doen heman eg-ikagi te sikona si Elias. Doen heman eg-ikagi te sikona si Jeremias aw doma telekeliwat te kagi te Timanem gebii.”

¹⁵ Mig-insà si Jesus, “Meneng eden lay se kenyo anenganeng tepad kanak? Sinu a lay?”

¹⁶ Timaba si Simon iningedanan din ki Pedro, kagi din, “Sikona se Misiyas. Sikona se Batà te Timanem.”

¹⁷ Minikagi si Jesus, “Simon, batà i Juan, doen ontò keluba nikaw. Kenà otaw se migpetaga-taga diyà kamno te siak se Batà te Timanem, meneng Amay ko doton te langit se migpetaga-taga kenyan diyà kamno. ¹⁸ Enengenengi se kagi ko kamno seini. Iling ka te bato dimasel tandà te pegsalig no kanak, aw medita se otaw tomaking kamno aw megpesakop diyà kanak. Eked dan dàgi te

tolos te kemetayun. ¹⁹ Isogò ko sikona meg-owang te lelebangan amon medita se otaw megpesakop diyà te peglowan te Timanem. Aw megpunù ka te doen eked kepakay inangen dini lanto te tanà, eked heman iyan kepakay inangen doton te langit. Aw megpunù ka te doen mepakay inangen dini lanto te tanà, mepakay heman iyan inangen doton te langit.”

²⁰ Penga niyan, ontò migpunù si Jesus te keilangan eked dan indani diyà te doma otaw te sikandin se Misiyas.

Minikagi si Jesus tepad te kemetayun din

Mat. 16:21-28; Mar. 8:31-9:1; Luc. 9:22-27

²¹ Lekat niyan, mig-indan si Jesus diyà te menge tinoledaan din aw eden se metoman domateng diyà kandin. Keilangan domoton sikandin te Jerusalem, aw ipeeleg sikandin te menge obanen aw pengolo te simbahan aw menenoladà te punù ingkeliwat i Moises. Metoman sikandin imetayan, aw penga niyan meantay lekat te nematay te iketelo aldaw. ²² Penga niyan, migpedapag si Pedro diyà ki Jesus, aw sinagda din, kagi din, “Pengolo, eked peden iyan keinang te Timanem diyà kamno. Eked palos iyan ketoman.”

²³ Meneng miniling si Jesus, aw minikagi diyà ki Pedro, “Kesayo ka lekat kanak. Iling ka ki Satanas, so mekeanggà ka kanak. Kenà lekat te Timanem se ibeg no siyan, meneng lekat iyan te aneng-aneng nikaw.”

²⁴ Penga niyan, minikagi si Jesus diyà te menge tinoledaan din, “Aw meibeg se otaw tomaking kanak, keilangan megsagda sikandin te ibeg te pedowan din, aw tomayod te kelimahan te kelikit te aldaw pengkey imetayan sikandin, aw keilangan ontò tomaking kanak. ²⁵ Pengkey ibeg te otaw megkelayat se omol din dini te keneyonan, meneng kunù din gayed matay. Meneng aw mepakay diyà te otaw pengkey imetayan sikandin

tandà te pegtaking din kanak, begayan sikandin te kaling pedowan wedad teman. ²⁶ Simpana tig-epoen te otaw se kedakel te keneyonan, aw penga niyan matay sikandin aw ipelumun doton te kilot, wedad ontong din, so eked kebeyadi se kaling pedowan wedad teman. ²⁷ Siak se Timanem Migpekeotaw, aw lomikò a dini tekingan te menge anghil aw kelangkaw te Amay ko. Aw lomikò a, begayan ko se kedita te otaw te ontong tepad te tapay dan ininang. ²⁸ Eneng-enengi niyo se kagi ko kenyo seini. Doen otaw dini kenyo eked kematay singed aw onà dan komità te pegtebò te peglowan ko Timanem Migpekeotaw.”

17

Pegketodà te bawa i Jesus

Mat. 17:1-13; Mar. 9:2-13; Luc. 9:28-36

¹ Nayan, pegkeokit te enem se aldaw, impetaking i Jesus si Pedro, si Santiago, aw si Juan adi i Santiago, aw timikedeg dan doton te melangkaw bontod te wedad doma dan. ² Pegketà, dalem te pegtengteng dan ki Jesus, netodà se bawa din, aw simenang iyan iling te aldaw. Ontò migkepoti se kedakel te penenaktun din so ontò minanyag. ³ Pegketà, kinità dan heman si Moises aw si Elias migpebelaw-belaway doma ki Jesus. ⁴ Minikagi si Pedro diyà ki Jesus, “Pengolo, mèpiya so dini kay. Aw mepakay diyà kamno, meg-inang a den te telo balay dini amon doen ogpaan te teg sebad-sebad kenyo si Moises aw si Elias.”

⁵ Telobo pa minikagi si Pedro, doen labon melowa dimateng diyà kandan aw wedà dan ebey kità kandan. Penga niyan, dinineg dan se kagi te Timanem lekat te labon, “Seini se Batà ko. Dakel se pedowan ko kandin, aw

ontò a neluba kandin. Keilangan sikandin se penenelanan niyo.”

⁶ Pegdineg dan kenyan, nekelemem dan so ontò dan nelemitan. ⁷ Meneng nemaed si Jesus kandan, aw minikagi, “Enaw kaw den. Ikà niyo egkelemitan.”

⁸ Peggimata dan, kinità dan olò si Jesus wedad den doma din.

⁹ Pegtopang dan lekat te bontod, ontò migpunù si Jesus kandan, kagi din, “Ikà niyo eg-indan te kinità niyo singed aw meantay a Timanem Migpekeotaw lekat te nematay.”

¹⁰ Penga niyan, mig-insà se minge tinoledaan din, “Aw agpet ka den lomowan, nengà lay egtoladà se minge menenoladà te punù ingkeliwat i Moises te keilangan domateng si Elias te eked pa lowan se Misiyas?”

¹¹ Timaba si Jesus, “Benal domateng onà si Elias, so sikandin se megpeketagad te kedita. ¹² Meneng mikagi a den diyà kenyo te dimateng den sikandin, aw wedà sikandin kilelai te doma otaw. Meneng medaet se ininang dan diyà kandin. Iling heman kenyan se medaet inangen dan diyà kanak Timanem Migpekeotaw.”

¹³ Penga niyan, neeneng-enengan dan te si Juan se timoman te pakang tepad te pegdateng i Elias.

Pinegoli i Jesus se batà meama dinetengan te bosaw

Mat. 17:14-21; Mar. 9:14-29; Luc. 9:37-43

¹⁴ Pegdateng dan doton te ongan, medita se otaw migtagad kandan. Nayan, doen otaw dimoton ki Jesus aw limongken diyà kandin, aw minikagi, ¹⁵ “Sir, keidowi bag se batà ko, so pigbaboy sikandin aw ontò eg-elegen. Melikit sikandin eg-elosen te bosaw diyà te apoy aw eglemesen heman diyà te wayeg. ¹⁶ Pengkey inibing ko sikandin dini te minge tinoledaan nikaw amon megpegoli dan kandin, meneng wedà dan iyan kebatog.”

¹⁷ Minikagi si Jesus, “Tay law, sikiyo menge otaw. Ontò kolang se aneng-aneng niyo, so wedà kaw pa salig diyà kanak. Eked den kenamay se pegdoma ko kenyo, meneng keilangan tomayod a pa pengkey eked kaw pemenal. Na, pedinihi se batà nikaw.”

¹⁸ Penga niyan, sinagda i Jesus se bosaw aw impelowà din iyan lekat te batà. Pegketà, negolian sikandin.

¹⁹ Pegkenamay-namay, dimoton se menge tinoledaan i Jesus kandin te wedad doma dan, aw mig-insà dan, “Nengà lay wedà day kebatog se pegpelowà te bosaw lekat kandin?”

²⁰ Minikagi si Jesus, “Wedà niyo iyan kebatog so wedà pa kelobos se pegsalig niyo diyà kanak. Mikagi a den diyà kenyo te pengkey deitek pa se pegsalig niyo diyà kanak iling te kedeitek te benì te mostasa, mekebatog kaw mikagi diyà te bontod seini te malin iyan, aw tomolò iyan kenyo, so wedad palos eked niyo kebatog. [²¹ Meneng eked pelowai se seini kemolò te bosaw singed aw megtawaltawal kaw aw megpowasa kaw.]”

*Todà minikagi si Jesus tepad te kemetayun din
Mat. 17:22-23; Mar. 9:30-32; Luc. 9:43-45*

²² Nayan, pegketipon te menge tinoledaan i Jesus doton te probinsya te Galiliya, minikagi si Jesus, “Seini se metoman domateng diyà kanak Timanem Migpekeotaw. Metoman a itolok aw ibegay a diyà te belad te doma otaw.

²³ Penga niyan, imetayan a dan, aw entayen a lekat te nematay te iketelo te aldaw.”

Peg-ikagi din kenyan, ontò nelidò se pedowan dan.

Pegpemegay te kwarta diyà te dakel simbahan

²⁴ Pegdateng dan doton te lonsod te Kapirnaom, doen menge otaw kidoen egpengabat te kwarta ipegbegay diyà

te dakek simbahan te Jerusalem te kelikit te omay. Mig-insà dan diyà ki Pedro, “Egpemegay lay se pengolo niyo te kwarta diyà te dakek simbahan?”

²⁵ Timaba si Pedro, “Ee man.”

Peg-olì din doton te balay, te wedà pa ikagi si Pedro, minikagi si Jesus, “Simon, doen insà ko kamno. Sinu lay se otaw keilangan memegay te kwarta diyà te selotan? Kandin pamilya, aw doma otaw?”

²⁶ Timaba si Pedro, “Olò doma otaw se keilangan memegay.”

Minikagi si Jesus, “Yan eked pemegay se kandin menge batà. ²⁷ Meneng eked ki keibeg aw doen meopal kenita. Yan doton ka te lanaw aw pegtonton ka te selab. Kitaen no se kwarta selapì doton te bahà te tagnà ikan meabat nikaw. Botong iyan te keilangan ibegay ta diyà te simbahan. Ebatì iyan aw begayi diyà te menge otaw egpengabat.”

18

Sinu lay se ontò melangkaw?

Mat. 18:1-5; Mar. 9:33-37; Luc. 9:46-48

¹ Nayan, wedà kenamay, dimoton se menge tinoledaan i Jesus kandin, aw mig-insà dan, “Sinu lay se ontò melangkaw doton te peglowan te Timanem?”

² Tinawal i Jesus se sebad batà, aw impetindeg din iyan kidoen te tengà-tengà dan. ³ Penga niyan, minikagi si Jesus, “Eneng-enengi niyo se kagi ko seini. Eked kaw palos sekopi te Timanem diyà te peglowan din singed todaen niyo se aneng-aneng niyo, aw megpedanà kaw iling te kedanà te mengisù. ⁴ Meneng se otaw ontò melangkaw doton te peglowan te Timanem, yan se otaw megpedanà te kandin pegkeotawun iling te kedanà te batà seini. ⁵ Aw megsagman se otaw te sakop ko iling te batà seini tandà

te pegpesakop din kanak, pineokit kenyan segmanen a din heman.”

Pegboyo amon mekesalà

Mat. 18:6-9; Mar. 9:42-48; Luc. 17:1-2

⁶ “Meneng aw doen otaw mekebaet te pegpemenal te mengisù egkeidowan ko, ontò medaet se pelumun domateng diyà kandin. Labi pa mèpiya aw iketan se lieg din te dakel bato aw idagdag doton te lawod. ⁷ Mekelelayò se kedita te otaw, so doen egpekebaet te kandan pegpemenal. Doen gayed mekebaet te pegpemenal te kedita te otaw, meneng mekelelayò se otaw eg-inang kenyan, so ontò sikandin ipelumun.

⁸ “Aw meboyo kaw meg-inang te salà pineokit te belad aw benis niyo, mèpiya aw tokongen niyo iyan aw iagbel niyo amon eked kaw peg-inang te salà, aw amon kominawà kaw te kaling pedowan wedad teman. Labi pa medaet aw meboyo kaw pineokit te belad aw benis niyo, aw iagbel se kedakel te lawa niyo kidoen te apoy doton te kilot eked palos kepadeng. ⁹ Aw meboyo kaw heman meg-inang te salà pineokit te mata niyo, mèpiya aw logiten niyo se mata niyo aw iagbel niyo amon eked kaw peg-inang te salà, aw amon kominawà kaw te kaling pedowan wedad teman. Labi pa medaet aw meboyo kaw pineokit te mata niyo, aw iagbel se kedakel te lawa niyo kidoen te apoy doton te kilot.”

Tegdeyanan tepad te karniro netalon

Mat. 18:10-14; Luc. 15:3-7

¹⁰ “Keilangan eked kaw peglindò te sakop ko medanà iling te kedanà te mengisù seini, so mikagi a den diyà kenyo te egtonggoan dan te menge anghil gayed egdoma te Amay ko doton te langit. [¹¹ Dimini a Timanem Migpekeotaw amon ipelowà ko se menge otaw nelegeb te salà.]

¹² “Eneng-enengi niyo ini. Aw doen otaw doen sebad gatos ayam-ayam din karniro, aw metalon se sebad, tenanan din se kesyaman teg siyam doton te bontod, aw pemehaen din se sebad. ¹³ Mikagi a den diyà kenyo, aw kitaen din se sebad netalon, doen keluba din labi pa dakel diyà te keluba din tepad te kesyaman teg siyam wedà ketalon. ¹⁴ Iling heman kenyan se keluba te Amay ko doton te langit, so eked sikandin keibeg aw doen sakop din medanà mekesoway lekat kandin, pengkey sebad.”

Aw mekesalà se otaw egpemenal

¹⁵ “Na, aw doen otaw egpemenal meg-inang te salà diyà kenyo, doton kaw kandin te wedad doma otaw kidoen, aw ikagi kaw diyà kandin tepad te salà ininang din. Aw megselsel sikandin, yan tinebangan niyo den sikandin. ¹⁶ Meneng aw eked sikandin penenalan te kagi niyo, petekingi niyo se doma otaw pengkey sebad aw dowa, aw lomikò kaw doton kandin, amon doen dowa otaw aw kenà telo meg-indan te benal se kagi niyo kandin. ¹⁷ Aw eked sikandin penenalan kandan, indani niyo iyan diyà te kedita te otaw egsimba kidoen. Aw eked sikandin tolò te minge obanen te simbahan, ikà niyo egdoma kandin, so iling den sikandin te minge otaw kenà egpenimanem aw nelegeb te salà.”

Mepakay, aw eked kepakay

¹⁸ “Eneng-enengi niyo se kagi ko kenyo seini. Aw megpunù kaw te doen eked kepakay inangen dini lanto te tanà, eked heman iyan kepakay inangen doton te langit. Aw megpunù kaw te doen mepakay inangen dini lanto te tanà, mepakay heman iyan inangen doton te langit.

¹⁹ “Mikagi a den heman diyà kenyo, aw doen dowa kenyo dini lanto te tanà, aw megsebad kaw te kenyo pemoyoen diyà te Amay ko doton te langit, metoman iyan

meinang so ibegay din iyan diyà kenyo. ²⁰ Pengkey olò dowà aw telo se otaw metipon amon megsimba kanak, kidoen a heman doma dan.”

Tegdeyanan tepad te pegwedad te salà

²¹ Penga niyan, dimoton si Pedro ki Jesus aw minikagi, “Pengolo, aw melikit gayed eg-inang se doma otaw te salà diyà kanak, mekepila lay se pegwedad ko te salà din? Botong lay aw mekepito?”

²² Minikagi si Jesus, “Kenà olò mekepito, meneng keilangan gayed no pegwedaden se peg-inang din te salà, pengkey doblihen se kepitowan te mekepito. ²³ Iling kani se peglowan te Timanem. Doen selotan mig-aneng-aneng te mèpiya aw somokot sikandin te salà te menge sakop din. ²⁴ Pegtebò din, doen otaw impeangay din ontò dakel se salà din, so minelalan se kwarta binelesan din. ²⁵ So eked sikandin pekeimpas, minikagi se selotan te keilangan inangen din allang se otaw siyan sipat esawa din aw menge batà din. Keilangan ibeligyà dan heman te selotan sipat kedakel te kededònan dan amon meimpas se salà dan. ²⁶ Meneng limongken se otaw siyan aw migpeido-ido, kagi din, ‘Sir, pegtagad ka bag te eked kenamay, so impasen ko se kedakel te salà ko kamno.’ ²⁷ Penga niyan, pigwedad te selotan se salà te otaw siyan tandà te keido din kandin, aw impelowà din sikandin. ²⁸ Meneng pegkesayo te otaw siyan, kinità din se doma otaw doton te dalan doen ontò deitek salà diyà kandin. Pegketà, pineleng din se lieg te otaw siyan aw minikagi, ‘Impasi den se salà no kanak.’ ²⁹ Penga niyan, limongken se otaw aw migpeido-ido, kagi din, ‘Pegtagad ka bag te eked kenamay, so impasen ko se kedakel te salà ko kamno.’ ³⁰ Meneng wedad keido din, aw impekeleboso din se doma otaw lamig meimpas se salà. ³¹ Nayan, pegketaga-taga te menge kedomaan din kenyan, ontò nelidò se pedowan

dan. Penga niyan, dimoton dan te selotan aw mig-indan dan te kedita te neinang din. ³² Penga niyan, impeangay te selotan se otaw siyan aw minikagi, ‘Medaet ka otaw. Pegpeido-ido no diyà kanak, pigwedad ko se kedakel te salà nikaw. ³³ So neidowan ta, keilangan keidowan no heman se doma otaw.’ ³⁴ Ontò sikandin neopalan te selotan, aw impekeleboso din sikandin amon ipelumun lamig meimpas se kedakel te salà.”

³⁵ Minikagi si Jesus, “Aw eked kaw ontò pegwedad te salà te doma otaw, iling heman kenyan se inangen te Amay ko diyà kenyo. Eked kaw din keidowi.”

19

Tepad te pegpengognan aw pegsibwan

Mat. 19:1-12; Mar. 10:1-12

¹ Nayan, penga te pegtoladà i Jesus te kedita niyan, nesayo sikandin lekat te probinsya te Galiliya aw minokit doton dipag te wayeg te Jordan taman te probinsya te Judiya. ² Medita se otaw timaking kandin, aw pinegolian din se kedita dan doen mesakit.

³ Doen munge Parisiyo nengemahà te kemalì diyà te pegtoladà i Jesus amon doen idimanda dan tepad kandin. Dimoton dan kandin aw mig-insà dan, “Mepakay lay aw somibwan se otaw te esawa din pengkey wedad medaet ininang din?”

⁴ Timaba si Jesus, “Wedà niyo besi besahi se kagi te Timanem insolat. Peg-inang din te otaw gebii, sebad olò se meama ininang din aw sebad olò heman se bayi.

⁵ Minikagi heman se Timanem,

‘Yan se doun te tomanan se meama te amay aw inay din, aw megsebad diyà te esawa din. Se didowa dan meinang sebad.’

⁶ Yan kenà dowà se teleesawa, so neinang dan sebad. Nayan, so ininang dan te Timanem sebad, eked kepakay aw ipesoway dan te otaw.”

⁷ Minikagi dan, “Aw eked iyan kepakay, nengà lay migpunù si Moises gebii te keilangan doen papil ibegay te meama diyà te bayi tepad te pegsibwan din, aw penga niyan mepakay din ipekesayo?”

⁸ Minikagi si Jesus, “Migpunù si Moises te mepakay aw somibwan kaw te esawa niyo, so netegahan din te ontò magsen se olo niyo. Meneng gebii te peg-inang te Timanem te otaw, eked kepakay se pegsibwan. ⁹ Mikagi a den diyà kenyo, aw somibwan se meama te esawa din wedà peglakad, aw todà mengognan, mekelakad sikandin.”

¹⁰ Minikagi se minge tinoledaan din, “Aw iling kenyan se kelimahan domateng diyà te teleesawa, labi pa mèpiya aw eked pengognan se otaw.”

¹¹ Meneng minikagi si Jesus, “Kenà kedita te otaw se eked palos pengognan, meneng olò se minge otaw pinemallì te Timanem te eked pengognan. ¹² Medita se kemolò te otaw eked palos pengognan. Doen otaw eked pegbatà so kolang lekat te pegtebaw dan. Doen heman eked pengognan so tinelinan dan. Doen heman eked pengognan amon wedad mekeanggà te pegtoladà dan tepad te peglowan te Timanem. Aw pinemallì kaw te Timanem amon eked kaw palos pengognan, keilangan tomolò kaw kandin.”

Si Jesus aw minge mengisù

Mat. 19:13-15; Mar. 10:13-16; Luc. 18:15-17

¹³ Nayan, doen minge otaw nengibing te dedeitek mengisù doton ki Jesus amon pemàdan din dan aw megtawal-tawal te begayan dan te Timanem te mèpiya.

Sinagda dan te minge tinoledaan din. ¹⁴ Meneng minikagi si Jesus, “Ikà niyo egsagda kandan, so lomowan se Timanem diyà te otaw ontò somalig diyà kandin iling te pegsalig te mengisù diyà te amay aw inay dan.”

¹⁵ Nemaed si Jesus kandan aw migtawal-tawal. Penga niyan, nesayo sikandin lekat kidoen.

Kelimahan te otaw meyaman

Mat. 19:16-30; Mar. 10:17-31; Luc. 18:18-30

¹⁶ Nayan, doen sebad otaw dimoton ki Jesus aw mig-insà, kagi din, “Sir, eden lay se mèpiya keilangan inangen ko amon doen kaling pedowan ko wedad teman?”

¹⁷ Minikagi si Jesus, “Nepela a so mig-insà ka diyà kanak aw eden se mèpiya inangen nikaw. Sebad olò se ontò mèpiya, olò Timanem. Aw meibeg ka kominawà te kaling pedowan wedad teman, keilangan tomolò ka te minge punù din ingkeliwat i Moises.”

¹⁸ Mig-insà se otaw sìyan, “Eden lay punui se keilangan toloen ko?”

Minikagi si Jesus, “Ikà egbonò. Ikà eglakad. Ikà egpenakaw. Ikà egkebolalaw tepad te doma otaw. ¹⁹ Keilangan memasa ka te amay aw inay nikaw. Kedekeli heman te pedowan no se doma otaw iling te peg-aneng-aneng no te kamno pegkeotawun.”

²⁰ Minikagi se otaw, “Gayed ko egtoloen se kedita niyan. Eden lay se wedà ko pa inangi?”

²¹ Minikagi si Jesus, “Aw meibeg ka te ontò melobos se pedowan no diyà te Timanem, olì ka den aw beligyai se kedakel te kedònan no, aw begayi se kwarta no diyà te minge otaw nelimahan. Aw yan se inangen no, doen ontong kinewaen no doton te langit. Penga te pegpemegay no te kedakel niyan, likò ka dini aw taking ka kanak.”

²² Pegdineg din kenyan, nelidò se pedowan din aw nesayo sikandin, so ontò dakel se kedònan din.

²³ Minikagi si Jesus diyà te menge tinoledaan din, “Eneng-enengi niyo se kagi ko kenyo. Ontò melima se pegpesakop te otaw meyaman diyà te peglowan te Timanem. ²⁴ Mikagi a den heman diyà kenyo te pengkey ontò melima se peg-okit te ayam-ayam kamilo diyà te awang te dagem, meneng labi pa melima se pegpesakop te otaw meyaman diyà te peglowan te Timanem.”

²⁵ Pegdineg dan kenyan, ontò dan nepela, aw minikagi dan, “Aw iling kenyan, wedad palos otaw mekelowà lekat te pelumun te Timanem.”

²⁶ Meneng timengteng si Jesus diyà kandan aw minikagi, “Pengkey eked pekelowà se otaw lekat te pelumun te Timanem, meneng wedad palos eked kebatog te Timanem.”

²⁷ Penga niyan, minikagi si Pedro, “Meneng sikami, tinenanan day den se kedakel amon tomaking kay kamno. Eden lay se ontong kinewaen day?”

²⁸ Minikagi si Jesus, “Eneng-enengi niyo se kagi ko kenyo seini. Aw inangen te Timanem kaling se keneyonan, menenoo a Timanem Migpekeotaw doton te melangkaw onsedanan te peglowan. Sikiyo menge tinoledaan ko, menenoo kaw heman doton te sempolò teg dowan onsedanan te peglowan, so lomowan kaw diyà te sempolò teg dowan pongan te menge bowad-bowad i Israel.

²⁹ Aw timanan se otaw te kedònan din, aw kedowa din, aw amay din, aw inay din, aw batà din, aw pawà din, amon megpesakop diyà kanak, kominawà sikandin te ontong ginatos pa meelagà diyà te tinenanan din, aw begayan heman sikandin te kaling pedowan wedad teman.

³⁰ Meneng medita se otaw melangkaw songkani meinang ontò medanà doton te peglowan te Timanem. Medita heman se otaw medanà songkani, meneng meinang dan kwani melangkaw.”

20

Tegdeyanan tepad te munge otaw migterbaho

¹ “Iling heman kani se peglowan te Timanem. Doen tig-apò te pawà tineneman te paras. Limapos sikandin nengemahà te munge otaw meglegani te paras din. ² Migpakang sikandin te doen kwarta ibegay din diyà kandan sebad dinaryo, so botong iyan itandan te sebad se aldaw. Penga niyan, dimoton dan te pawà din aw migterbaho dan. ³ Pegkealas nowibi, todà sikandin nengemahà te otaw meglegani. Doen otaw kinità din doton te pedyanan wedad terbaho dan. ⁴ Minikagi sikandin, ‘Aw megterbaho kaw doton te pawà ko, tendanan ko sikiyo te mèpiya.’ Yan nesayo dan aw miglegani. ⁵ Todà sikandin nengemahà te otaw te alas dosi aw alas tris te meapon, aw iling heman kenyan se kagi din kandan. ⁶ Sagwa agpet alas singko te meapon, kinità din heman se doma otaw wedad terbaho dan. Mig-insà sikandin, ‘Nengà lay wedad palos terbaho niyo te aldaw seini?’ ⁷ Timaba dan, ‘So wedad megtandan kenami.’ Minikagi sikandin, ‘Pegterbaho kaw heman doton te pawà ko.’

⁸ “Nayan, pegkedelem niyan, minikagi se otaw diyà te otaw sineligan din, ‘Tewali se kedita te otaw migterbaho, aw begayi kandan se tandan dan. Onai se otaw kaling migterbaho, aw modihi se otaw tapay migterbaho.’ ⁹ Pegtandan din te otaw migtebò migterbaho alas singko te meapon, sebad dinaryo se kwarta imbegay din diyà te teg sebad-sebad kandan. ¹⁰ Nayan, te wedà pa tendani se munge otaw migterbaho lekat te iselem, migpeliman dan te labi pa dakel se ibegay din diyà kandan. Meneng pegtandan din kandan, sebad heman dinaryo se kwarta imbegay din diyà te teg sebad-sebad kandan. ¹¹ Pegkinawà dan te kwarta, migbelisì dan diyà te tig-apò te paras.

¹² Minikagi dan, ‘Olò sebad oras se pegterbaho te otaw sida, meneng lekat te iselem se kenami pegterbaho, aw neilad kay te aldaw, meneng onawa se intandan no te kedita day.’ ¹³ Meneng minikagi se tig-apò diyà te sebad kandan, ‘Elew, wedà a peglegawa kamno, so sebad dinaryo se kwarta impakang ko kamno. ¹⁴ Yan ibingi se kwarta intandan ko kamno aw olì ka den. Lekat te ibeg ko, onawa se imbegay ko diyà te kedita niyo. ¹⁵ Wedad besi mekesagda kanak aw meibeg a memegay te kanak kwarta diyà te otaw pemellien ko. Miningà ka besi so neido a kandan.’”

¹⁶ Minikagi heman si Jesus, “Iling heman kenyan, doen otaw medanà songkani ipelangkaw doton te peglowan te Timanem. Doen heman doma otaw melangkaw songkani, meneng meinang dan medanà.”

Iketelo peg-ikagi i Jesus tepad te kemetayun din
Mat. 20:17-19; Mar. 10:32-34; Luc. 18:31-34

¹⁷ Nayan, peg-ipanaw i Jesus pesalo doton te Jerusalem, impetaking din se sempolò teg dow a tinoledaan din, aw minikagi diyà kandan te wedad doma dimineg, ¹⁸ “Na, domoton kidon te Jerusalem. Penga niyan, siak Timanem Migpekeotaw se itolok, aw ibegay a diyà te belad te menge pengolo te simbahan aw menenoladà te punù ingkeliwat i Moises. Megsebad dan mikagi te keilangan imetayan a. ¹⁹ Ibegay a dan heman diyà te belad te otaw kenà Judiyo. Kebebeyatan a dan, aw bedasen a dan, aw penga niyan ilansang a diyà te kros amon matay a. Penga niyan, meantay a lekat te nematay te iketelo te aldaw.”

Pinemoyò te inay i Santiago aw si Juan
Mat. 20:20-28; Mar. 10:35-45

²⁰ Penga niyan, dimoton se esawa i Sebedeo ki Jesus sipat didowa batà din si Santiago aw si Juan. Limongken

sikandin diyà ki Jesus so doen pemoyoen din. ²¹ Mig-insà si Jesus, “Eden lay se ibeg no diyà kanak?”

Minikagi sikandin, “Aw megtebò ka lomowan, peonsadi bag se didowa batà ko seini diyà te tangkil no, sebad lenged te kowanan, aw sebad lenged te bibang, amon segmanen dan heman doma nikaw.”

²² Minikagi si Jesus, “Wedà niyo ketegahi aw eden se kebegat te pinemoyò niyo. Meketayod kaw lay heman te kelimahan agpet den domateng kanak?”

Timaba dan, “Ee, meketayod kay heman kenyan.”

²³ Minikagi si Jesus, “Metoman kaw heman detengan te kelimahan domateng kanak, meneng eked a pegpakang diyà kenyo te sikiyo se meketangkil diyà kanak, so tomangkil diyà kanak se otaw pinemallì te Amay ko.”

²⁴ Pegdineg te sempolò tinoledaan aw eden se inikagi dan diyà ki Jesus, neopal dan ki Santiago aw si Juan.

²⁵ Meneng tinawal dan i Jesus aw minikagi sikandin, “Netegahan niyo den aw eden se eg-inangen te menge otaw eglowan. Gayed dan egleges te menge sakop dan. Gayed heman egsogò-sogò se melangkaw otaw te menge sakop dan. ²⁶ Meneng eked kepakay aw megiling kaw kandan. Aw doen otaw diyà kenyo meibeg megkelangkaw, keilangan gayed menabang kenyo. ²⁷ Aw doen otaw diyà kenyo meibeg megkelangkaw, keilangan megpedanà sikandin te pegkeotawun din iling te kedanà te allang. ²⁸ Keilangan meg-iling sikandin kanak Timanem Migpekeotaw, so dimini a te tanà kenà amon tebangan a te otaw, meneng dimini a amon menabang a te otaw. Neke-tagad a den imetayan amon medita se otaw mekelowà lekat te pegkeallang dan diyà te salà.”

*Pinegoli i Jesus se dowà otaw bota
Mat. 20:29-34; Mar. 10:46-52; Luc. 18:35-43*

²⁹ Nayan, pegkesayo dan lekat te Jeriko, ontò medita se otaw timaking ki Jesus. ³⁰ Doen dowo otaw bota nenenu doton te kilid te dalan. Pegdineg dan te si Jesus se minokit kidoen, timawal dan, “Bowad-bowad i David, keidowi kay bag.”

³¹ Migsagda se munge doma otaw kandan, aw migpunù dan te keilangan mepenek dan. Meneng labi dan beling timawal, “Pengolo, bowad-bowad i David, keidowi kay bag.”

³² Pegdineg i Jesus te pegtawal dan, simagked sikandin aw timawal diyà kandan, kagi din, “Eden lay se ibeg niyo inangen ko kenyo?”

³³ Timaba dan, “Pengolo, ibeg day, todà kay komità.”

³⁴ Neidowan dan i Jesus, aw pinemàdan din se mata dan. Pegketà, kimità dan, aw timaking dan ki Jesus.

21

Pegdateng i Jesus doton te Jerusalem

Mat. 21:1-11; Mar. 11:1-11; Luc. 19:28-40; Juan 12:12-19

¹ Nayan, pegpesalo dan doton te Jerusalem, migpeda-pag dan kidoen te lonsod te Bitpahi doton te ongan te bontod te Olibo. Insogò i Jesus se didowa tinoledaan din, ² kagi din, “Onà kaw doton te lonsod sida peselowan tadon. Aw domateng kaw doton, ketelaan niyo se ayam-ayam iling te kodà iningedanan asno sipat nati niyan. Iniketaniyan, meneng lebadi niyo, aw ibingi niyo dini. ³ Aw doen otaw meg-insà te nengà lay linebad niyo iyan, ikegihi niyo te keilangan sekayan iyan te Pengolo niyo, aw yan ipeibing din iyan kenyo.”

⁴ Pineokit kenyan, tinoman din se kagi te telekeliwat te kagi te Timanem gebii,

⁵ “Seini se iindan no diyà te kedita te tege Sion. Na, domateng se selotan niyo, aw medanà se pegkeotawun din, so somakay te nati te asno.”

⁶ Nesayo se didowa tinoledaan din aw timolò dan te impunù din kandan. ⁷ Inibing dan se asno aw nati niyan doton ki Jesus. Menge saol dan se in-ampal dan diyà te getan te nati, aw simakay si Jesus kenyan. ⁸ Inladlad te keditaan te otaw se saol dan doton te dalan peselowan din, aw sinagpi te doma otaw se menge pelapà te palmera aw insawol dan doton te dalan, so yan se ketanem dan aw segmanen dan se otaw meinang selotan. ⁹ Migpegais se kedita te otaw timaking ki Jesus, pengkey nekeonà aw timetondog. Migpegais dan, “Iduyun se bowad-bowad i David. Iduyun se insogò te Pengolo tadon Timanem. Iduyun se Timanem.”

¹⁰ Pegdateng i Jesus doton te Jerusalem, nepela se kedita te otaw, so migpeinsaay dan, “Sinu lay sikandin?”

¹¹ Timaba se otaw timaking ki Jesus, “Sikandin se telekeliwat te kagi te Timanem si Jesus. Lekat sikandin te lonsod te Nasarit sakop te probinsya te Galiliya.”

Dimoton si Jesus te dakel simbahan

Mat. 21:12-17; Mar. 11:15-19; Luc. 19:45-48; Juan 2:13-22

¹² Nayan, dimoton si Jesus te dakel simbahan te Timanem doton te Jerusalem, aw impekadas din se kedita te otaw egpemeligyà aw egbayad kidoen te dowangen niyan. Impelias din se lemisa te menge otaw egliwan te kwarta, aw impelias din heman se bangkò te otaw egpemeligyà te selepati ibegay diyà te Timanem. ¹³ Minikagi sikandin, “Doen kagi te Timanem impesolat din gebii, ‘Se balay te Timanem, yan se ingedanan balay te pegtawal-tawal.’

Meneng ininang niyo den ini iling te ogpeanan te megdedempasay.”

¹⁴ Dimoton se menge otaw bota aw kapig te dakel simbahan, aw pinegolian dan i Jesus. ¹⁵ Meneng neopal se menge pengolo te simbahan aw menenoladà te punù ingkeliwat i Moises, so kimità dan te menge kepelahan in-inang i Jesus, aw dinineg dan heman se mengisù migpete-walay kidoen te dakel simbahan, kagi dan, “Iduyun se bowad-bowad i David.”

¹⁶ Yan se doun te minikagi dan diyà ki Jesus, “Tay law. Aw dinineg no se kagi dan, nengà lay wedà no dan segdahi?”

Timaba si Jesus, “Dinineg ko dan, meneng mepakay iyan diyà kanak. Wedà niyo besi besahi se kagi te Timanem seini, ‘Isogò te Timanem se mengisù domuyun kandin.’”

¹⁷ Penga niyan, nesayo si Jesus lekat kidoen aw dimoton te lonsod te Bitanya aw minidegà kidoen.

Pegkelanes te kayo igira

Mat. 21:18-22; Mar. 11:12-13,20-24

¹⁸ Pegkeiselem niyan, limikò si Jesus doton te Jerusalem. Te wedà pa dateng doton, binallos sikandin.

¹⁹ Kinità din se kayo igira medapag te dalan, aw dimoton sikandin amon mahà te pongo niyan. Meneng wedad palos pongo kinità din, olò menge dawen. Minikagi sikandin diyà te kayo, “Eked den palos pongo se kayo seini.”

Wedà kenamay, nelanes se kayo siyan. ²⁰ Pegkità te menge tinoledaan din kenyan, nepela dan aw minikagi dan, “Nelanes den se kayo igira te wedà kenamay.”

²¹ Minikagi si Jesus, “Eneng-enengi niyo se kagi ko kenyo seini. Aw somalig kaw diyà te Timanem aw eked kaw pegdowa-dowa, meg-inang kaw te kepelahan labi pa metolos diyà te ininang ko diyà te kayo seini. Aw mikagi kaw diyà te bontod seini te meabat iyan aw mealin

doton te dagat, metoman iyan meinang. ²² Aw megtawal-tawal kaw diyà te Timanem, aw somalig kaw diyà kandin, metoman kaw din begayan te kedita te pemoyoen niyo.”

Insà tepad te pegsogò ki Jesus

Mat. 21:23-27; Mar. 11:27-33; Luc. 20:1-8

²³ Nayan, limikò si Jesus doton te dakel simbahan te Jerusalem aw migtoladà. Wedà kenamay, doen menge pengolo te simbahan aw menge obanen te Judiyo dimoton kandin, aw mig-insà dan, “Nengà lay eg-inang ka te kedita nini? Sinu lay se simogò kamno?”

²⁴ Minikagi si Jesus, “Doen heman insà ko kenyo. Aw meketaba kaw kani, meg-indan a diyà kenyo aw sinu se simogò kanak. ²⁵ Sinu lay se simogò ki Juan amon memonyag? Timanem, aw otaw se simogò kandin?”

Penga niyan, migpebelaw-belaway dan aw eden se itaba dan kandin. Minikagi dan, “Simpana tomaba kidon te Timanem se simogò ki Juan, silahen kidon din, so wedà kidon pemenal ki Juan. ²⁶ Meneng simpana tomaba kidon te olò otaw se simogò ki Juan, keopalan kidon te kedita te otaw netipon, so eg-aneng-aneng dan te ontò telekeliwat te kagi te Timanem si Juan.”

²⁷ Yan se down te minikagi dan, “Inday. Wedà day ketegahi aw sinu.”

Minikagi si Jesus, “So wedà kaw taba te insà ko, eked a peg-indan diyà kenyo aw sinu se simogò kanak.”

Tegdeyanan tepad te dowà batà

²⁸ “Eneng-enengi niyo ini. Doen otaw dowà se batà din. Minikagi sikandin diyà te batà din kakay, ‘Atò, pegterbaho ka den doton te pawà te aldaw seini.’ ²⁹ Minikagi se batà din, ‘Eked a.’ Meneng wedà kenamay, netodà se aneng-aneng din aw timolò. ³⁰ Penga niyan, dimoton se otaw te batà din adi, aw onawa se inikagi din diyà kandin.

Minikagi se batà din sìyan, ‘Ee, amà. Domoton a.’ Meneng penga niyan, wedà deleg. ³¹ Nayan, indani a niyo. Eden lay betai se timolò te amay din?”

Timaba dan, “Kakay se timolò.”

Minikagi si Jesus, “Eneng-enengi niyo se kagi ko kenyo seini. Medita den se otaw nekeonà kenyo migpesakop diyà te peglowan te Timanem, pengkey nelegeb dan te salà iling te minge iskribinti aw minge kepoyun. ³² Pegtoladà i Juan te keilangan megselsel kaw amon eneng-enengen te Timanem te metòlid kaw, wedà kaw pemenal kandin. Meneng medita se iskribinti aw kepoyun nemenal kandin. Pengkey kimità kaw kenyan, meneng wedà kaw pegselsel aw wedà kaw heman pemenal kandin.”

Tegdeyanan tepad te minge otaw migtonggò te pawà

Mat. 21:33-46; Mar. 12:1-12; Luc. 20:9-19

³³ “Penenalan kaw den te tegdeyanan seini. Doen otaw migpawà aw nenanem te paras. Mig-inang sikandin te alad, aw tigmesanan te paras, aw layag. Penga niyan, impetonggò din iyan te minge doma otaw aw dimoton sikandin te mediyò ogpeanan. ³⁴ Pegdateng te aldaw te peglegani, doen minge sineligan insogò te tig-apò amon doen talad din. ³⁵ Meneng pegdateng te sineligan din doton, medaet se ininang te minge otaw migtonggò te pawà din. Nemadas dan te sebad sineligan din, aw nengimatay dan te doma, aw nemontog dan te bato diyà te doma. ³⁶ Penga niyan, labi pa medita se doma sineligan insogò din doton kandan. Meneng onawa heman se medaet ininang te otaw migtonggò diyà te sineligan insogò din. ³⁷ Penga niyan, insogò din se batà din, so aneng-aneng din keilangan segmanen dan se kandin batà. ³⁸ Meneng pegdateng te batà din doton, migpebelaw-belaway dan, ‘Seini se meketig-apò te tanà seini aw matay

se amay din. Mèpiya aw imetayan tadon sikandin amon sikitadon se meketig-apò te tanà seini.’ ³⁹ Penga niyan, inewidan dan sikandin, aw ginoyod dan doton te lowà te pawà, aw inimetayan dan sikandin.

⁴⁰ “Nayan, indani a niyo. Aw domoton se tig-apò te pawà, eden lay se inangen din diyà te minge otaw impetonggò din?”

⁴¹ Timaba dan, “Ipeeleg din se mededaet otaw sìyan aw imetayan din se kedita dan. Penga niyan, ipetonggò din se pawà din te doma otaw keseligan, amon begayan dan sikandin te talad te kelikit te omay.”

⁴² Minikagi si Jesus, “Iling te wedà kaw palos pegbasa te kagi te Timanem seini,

‘Doen bato in-agbel te minge otaw mig-inang te balay, so eden dan aw wedad kekemowan niyan. Meneng yan se bato ontò salig te balay. Mèpiya se ininang te Pengolo sìyan, aw yan se doun te iduyun tadon sikandin.’

⁴³ “Eneng-enengi niyo se kagi ko kenyo. Yan se doun te eked kaw sekopi te Timanem diyà te peglowan din, meneng sekopen din se minge doma otaw ontò tomolò te ibeg din. [⁴⁴ Aw mekedogsò se otaw kidoen te bato seini, melosek se minge tòlan din. Meneng aw kedegdagan se otaw te bato sìyan, mepolpog sikandin.]”

⁴⁵ Pegdineg te minge Parisiyo aw pengolo te simbahan kenyan, netegahan dan te sikandan se nesogatan te tegdeyanan din sìyan, ⁴⁶ aw yan se doun te ibeg dan megdakep peden kandin. Meneng wedà dan peketoman, so nelemitan dan te minge otaw gayed egpenenalan kandin, so mig-aneng-aneng se kedita te otaw te si Jesus se telekeliwat te kagi te Timanem.

22

*Tegdeyanan tepad te pegpangaen diyà te peipid**Mat. 22:1-14; Luc. 14:15-24*

¹ Migtoladà si Jesus te doma tegdeyanan, kagi din,
² “Iling heman kani se peglowan te Timanem. Doen selotan mig-inang te dakel kànen so peipiden se batà din. ³ Insogò din se sineligan mangay te kedita te otaw inindanan din. Meneng wedad ibeg dan gomemaw. ⁴ Doen heman menge doma sineligan insogò te selotan amon megkelihat dan te kagi din, ‘Na, integilan ko den se kànen. Iniyaw day den se menge baka aw doma ayam-ayam melambò, aw nelegà den se kedita niyan. Ayas kaw den diyà te peipid.’ ⁵ Meneng wedà dan pegsagman kenyan. Doen otaw dimoton te pawà, aw doen doma otaw dimoton te tinda din. ⁶ Doen heman menge doma otaw minawid te sineligan, aw pinemilang dan, aw inimetayan dan. ⁷ Neopal se selotan, aw insogò din se menge sondalo mengimatay kandan aw menonog heman te lonsod dan. ⁸ Penga niyan, minikagi se selotan diyà te menge sineligan din, ‘Integilan den se kànen, meneng eked ko petenodi se otaw tapay impeangay ko, so kimulu dan. ⁹ Nayan, doton kaw den te menge dalan eg-okitan te medita otaw, aw petenodi niyo se kedita te otaw ketelaan niyo.’ ¹⁰ Penga niyan, dimoton dan te menge dalan, aw impetaking dan se kedita te otaw netelaan dan, pengkey mèpiya se keogpà dan aw pengkey kenà. Yan medita se otaw impetanod dan, aw nepenò den se balay.

¹¹ “Nayan, wedà kenamay, limowà se selotan amon tomengteng diyà te otaw timanod te peipid. Kinità din se otaw wedad saol iling te keilangan gemiten te otaw tomanod te peipid. ¹² Minikagi se selotan, ‘Elew, nengà lay dimini ka te wedad saol no iling te keilangan gemiten te otaw tomanod te peipid?’ Meneng wedad palos intaba

din. ¹³ Penga niyan, minikagi se selotan diyà te menge sineligan din, ‘Geposi niyo se belad din aw benis, aw ibingi niyo sikandin doton te lowà kidoen te kengitngitan amon ipelumun. Ontò megkelag se otaw doton, aw megyangget-yangget se ngipen dan tandà te kegemakan dan.’ ¹⁴ Pengkey ontò medita se otaw tinawal te Timanem, meneng pilabok se meinang menge sakop din.”

Insà tepad te pegbayad te mihoras

Mat. 22:15-22; Mar. 12:13-17; Luc. 20:20-26

¹⁵ Penga niyan, nesayo se menge Parisiyo, aw migpebelaw-belaway dan aw eden se inangen dan diyà ki Jesus amon doen idimanda dan tepad te pegtoladà din. ¹⁶ Penga niyan, doen menge tinoledaan dan aw menge sakop i Herod insogò dan doton ki Jesus. Minikagi dan diyà kandin, “Sir, netegahan day te kenà ka egkebolalaw. Netegahan day heman te pengkey sinu se otaw toledaan no, ontò benal se ipegtoladà no diyà kandan tepad te ibeg te Timanem. ¹⁷ Nayan, doen insà day kamno. Indani kay aw eden se aneng-aneng nikaw. Lomàpang kidon lay te menge punù ingkeliwat i Moises aw mayad kidon te mihoras diyà te gobirno te Roma? Mepakay lay aw eked?”

¹⁸ Meneng netegahan i Jesus te medaet se tod dan te peg-insà dan kenyan. Yan minikagi sikandin, “Eden niyo aw egpenimanem kaw. Medaet se pegtandà niyo kanak. ¹⁹ Pekitai niyo diyà kanak se kwarta ipegbayad niyo te mihoras.”

Penga niyan, imbegay dan diyà kandin se kwarta plata. ²⁰ Mig-insà si Jesus, “Sinu lay bawa se insawol kidoen? Sinu lay ngadan se insolat kidoen?”

²¹ Timaba dan, “Selotan te Roma.”

Minikagi si Jesus, “Yan begayi niyo diyà te selotan se keilangan ibegay niyo diyà kandin, aw begayi niyo heman diyà te Timanem se keilangan ibegay niyo diyà kandin.”

²² Pegdineg dan kenyan, nepela dan, aw nesayo dan lekat kandin.

Insà tepad te pegkeantay lekat te nematay

Mat. 22:23-33; Mar. 12:18-27; Luc. 20:27-40

²³ Wedà kenamay, doen menge Sadusiyo dimoton ki Jesus. Yan se menge otaw egtoladà te eked palos keantay se otaw lekat te nematay. Mig-insà dan diyà ki Jesus, kagi dan, ²⁴ “Sir, doen impunù i Moises kenitadon tepad te inangen te telekedowa meama. Aw matay se meama te wedad pa batà te esawa din, keilangan mengognan se kedowa te nematay diyà te nayi din nebalo, amon doen peden batà te kedowa din nematay. ²⁵ Nayan, doen ekon pito telekedowa meama. Nengognan se kakay dan, aw nematay sikandin te wedad pa batà dan. Penga niyan, nengognan se kedowa din diyà te nayi din nebalo. ²⁶ Meneng iling heman kenyan se neinang diyà te ikedowa aw iketelo lamig te ikepito, so migpetibos-tibosay se pito telekedowa nengognan te bayi sìyan, aw nematay se kedita dan te wedad pa palos batà dan. ²⁷ Penga niyan, nematay heman se bayi. ²⁸ Nayan, indani kay. Aw meantay se otaw lekat te nematay, sinu lay lebò diyà kandan se ontò esawa te bayi sìyan? So migpetibos-tibosay dan se pito nengognan kandin.”

²⁹ Minikagi si Jesus, “Ontò kaw migkemali, so wedà niyo pa keleteti se kagi te Timanem insolat, aw wedà niyo heman ketegahi aw eden se mebatog inangen te Timanem pineokit te tolos din. ³⁰ Aw entayen te Timanem se otaw lekat te nematay, eked dan palos pengognan, so iling dan te menge anghil eg-ogpà doton te langit. ³¹ Wedà kaw ketaga-tagà te metoman meantay se otaw lekat te

nematay so wedà kaw besi pegbasa te kagi te Timanem seini,

³² ‘Siak se Timanem gayed egseligan i Abraham, aw si Isaac, aw si Jacob.’

Kenà otaw wedad pedowan se egسالig te Timanem, meneng otaw doen pedowan se egسالig kandin.”

³³ Ontò nepela se kedita te otaw dimineg te pegtoladà din.

Ontò melangkaw punù

Mat. 22:34-40; Mar. 12:28-34; Luc. 10:25-28

³⁴ Pegdineg te menge Parisiyo te dinaeg i Jesus se menge Sadusiyo, netipon dan aw dimoton dan heman ki Jesus. ³⁵ Doen Parisiyo biyasa egtoladà te menge punù ingkeliwat i Moises. Ibeg din megtandà ki Jesus, aw yan se doun te mig-insà sikandin, ³⁶ kagi din, “Sir, diyà te kedita te punù ingkeliwat i Moises, eden lay punui se ontò melangkaw?”

³⁷ Minikagi si Jesus, “Kedekeli niyo te pedowan se Pengolo niyo Timanem te ontò melobos se pedowan niyo kandin, aw aneng-aneng niyo. ³⁸ Yan se punù ontò melangkaw diyà te kedita. ³⁹ Seini se punù neketondog kenyan. Kedekeli niyo te pedowan se doma otaw iling te peg-aneng-aneng niyo te kenyo pegkeotawun. ⁴⁰ Aw egtoloen niyo se dowapunù sìyan, netolò niyo heman se kedita te punù ingkeliwat i Moises aw menge telekeliwat te kagi te Timanem gebii.”

Peg-insà i Jesus tepad te Misiyas

Mat. 22:41-46; Mar. 12:35-37; Luc. 20:41-44

⁴¹ Te wedà pa kesayo se menge Parisiyo, mig-insà si Jesus diyà kandan, ⁴² kagi din, “Eden lay se aneng-aneng niyo tepad te Misiyas? Sinu lay se kemonaan din?”

Timaba dan, “Bowad-bowad i David se Misiyas isogò te Timanem.”

⁴³ Minikagi si Jesus, “Aw benal iyan, nengà lay minikagi si David te Pengolo din se Misiyas? Pineokit te pegbayà-bayà te Espiritu Santo ki David, insolat din se kagi seini,

⁴⁴ ‘Minikagi se Timanem diyà te Pengolo ko, Penenoo ka dini te tangkil ko lamig dàgen ko se menge poon no aw ipetolò ko dan kamno.’

⁴⁵ Na, aw minikagi si David te Pengolo din se Misiyas, nengà lay bowad-bowad i David se Pengolo din?”

⁴⁶ Meneng wedad palos otaw neketaba kandin. Lekat te aldaw siyan, wedad palos otaw migtelaman mig-insà kandin.

23

Menge Parisiyo aw menge menenoladà te punù

Mat. 23:1-12; Mar. 12:38-39; Luc. 11:43,46; 20:45-46

¹ Penga niyan, migtoladà si Jesus te kedita te otaw netipon aw menge tinoledaan din. Minikagi sikandin,

² “Se menge menenoladà te punù aw menge Parisiyo, yan se otaw sineligan te menge punù ingkeliwat i Moises.

³ Yan se doun te keilangan gayed kaw tomolò te kedita te ipegtoladà dan. Meneng ikà niyo eg-iling te eg-inangen dan, so kenà dan egtolò te punù ipegtoladà dan.

⁴ Gayed dan egdogangan se punù ontò melima toloen te otaw. Meneng kenà dan egtelaban te otaw meibeg tomolò kenyan. Iling dan te otaw megleges te doma otaw memaba te pelaban mebegat, aw wedad palos tabang dan kandan amon meinang iyan meagka.

⁵ Gayed dan ipekità diyà te doma otaw se pegtolò dan te menge punù amon iduyun dan. Eg-inangen dan pelaban dakel se solanan te kagi te Timanem egpengibingen dan, aw egpelasan dan se saol dan melayat amon meg-aneng-aneng se doma otaw te ontò melobos se pedowan dan diyà te Timanem. ⁶ Aw doen dakel kànen, ibeg dan sikandan se monà ipekaen.

Ibeg dan heman menenoo doton te mèpiya onsedanan kidoen te simbahan te Judiyo. ⁷ Ibeg dan segmanen dan te doma otaw doton te pedyanan, aw ibeg dan tewalen Meistro. ⁸ Meneng eked kepakay aw tewalen kaw Meistro te doma otaw, so telekedowa se kedita niyo aw sebad ko se meistro egtoladà kenyo. ⁹ Eked heman kepakay aw gulalen niyo Amay se doma otaw dini te keneyonan, so sebad olò se Amay niyo Timanem doton te langit. ¹⁰ Eked heman kepakay aw gulalen kaw Amo, so sebad ko se amo niyo, siyan Misiyas insogò te Timanem. ¹¹ Se otaw ontò melangkaw diyà kenyo, yan se keilangan menabang kenyo. ¹² Aw megpelangkaw-langkaw se otaw, meinang sikandin medanà. Meneng aw megpedanà se otaw te kandin pegkeotawun, meinang sikandin melangkaw.”

Eden dan aw egpenimanem dan

Mat. 23:13-28; Mar. 12:40; Luc. 11:39-42,44,52; 20:47

¹³ “Mekelelayò kaw menge Parisiyo aw menenoladà te punù ingkeliwat i Moises. Eden niyo aw egpenimanem kaw, so egbelebagan niyo se menge otaw egkeibeg megpesakop diyà te peglowan te Timanem. Medaet so wedà kaw pegpesakop diyà kandin, meneng labi pa medaet so wedà niyo pesekopi se otaw egkeibeg megpesakop diyà kandin. [¹⁴ Mekelelayò kaw menge Parisiyo aw menenoladà te punù ingkeliwat i Moises. Eden niyo aw egpenimanem kaw, so eg-agaw kaw te kedònan te bayi balo, aw penga niyan menamay se pegtawal-tawal niyo amon megpelingo-lingo kaw te melobos se pedowan niyo diyà te Timanem. Yan se doun te metoman kaw ontò ipelumun labi pa diyà te doma otaw.]

¹⁵ “Mekelelayò kaw menge Parisiyo aw menenoladà te punù ingkeliwat i Moises. Eden niyo aw egpenimanem kaw, so ontò kaw measeb meglegeb te mediyò amon megsakop te pengkey olò sebad se otaw, aw pineokit te

pegtoladà niyo kandin, meinang sikandin labi pa medaet diyà kenyo, aw ipedeleg niyo sikandin doton te kilot.

¹⁶ “Mekelelayò kaw, so iling kaw te otaw bota megtelaman mengibing te doma otaw. Egtoladà kaw te mepakay aw tomalis se otaw te pakang din aw olò megsapà te dakel simbahan dini te Jerusalem. Meneng egtoladà kaw te keilangan tomanen te otaw se pakang din aw megsapà te bolawan impalas te dakel simbahan. ¹⁷ Iling kaw te otaw bota so eked niyo kitai se kebenalan. Wedad inenengen niyo, so pengkey melangkaw se bolawan impalas te dakel simbahan, meneng labi pa melangkaw se simbahan diyà te bolawan. ¹⁸ Egtoladà kaw heman te mepakay aw tomalis se otaw te pakang din aw olò megsapà te sonoganan te ayam-ayam ibegay diyà te Timanem. Meneng egtoladà kaw te keilangan tomanen te otaw se pakang din aw megsapà te ayam-ayam sonogen kidoen. ¹⁹ Iling kaw te otaw bota, so eked niyo kitai se kebenalan. Pengkey melangkaw se ayam-ayam sonogen, meneng labi pa melangkaw se sonoganan diyà te ayam-ayam sonogen kidoen. ²⁰ Yan aw megsapà se otaw te sonoganan, megsapà heman sikandin te ayam-ayam sonogen kidoen. ²¹ Aw megsapà se otaw te dakel simbahan, megsapà heman sikandin te Timanem eg-ogpà doton te simbahan. ²² Aw megsapà se otaw te langit, megsapà heman sikandin te Timanem aw onsedanan din.

²³ “Mekelelayò kaw menge Parisiyo aw menenoladà te punù ingkeliwat i Moises. Eden niyo aw egpenimanem kaw, so pengkey egpemegay kaw diyà te Timanem te ikesempolò ketengà te kedita te geniyan niyo pengkey menge enagay, meneng wedà niyo beling toloi se menge punù te Timanem labi pa melangkaw kenyan tepad te metòlid inang diyà te doma otaw, aw keido, aw pegsalig te doma otaw. Yan se keilangan inangen niyo, meneng pede-

leg kaw heman te pegpemegay niyo diyà te Timanem. ²⁴ Iling kaw te otaw bota meg-agak peden te doma otaw. Egpengabat kaw te langaw lekat te wayeg inemen niyo, meneng eg-emehen niyo biling se dakel ayam-ayam kamilo.

²⁵ “Mekelelayò kaw minge Parisiyo aw menenoladà te punù ingkeliwat i Moises. Eden niyo aw egpenimanem kaw, so gayed kaw eg-ingà aw eglalang te medaet. Iling kaw te otaw olò eg-onaw te lowà te baso aw sablag pengkey melipà pa se didalem niyan. ²⁶ Sikiyo minge Parisiyo, iling kaw te otaw bota, so eked niyo kitai se kebenalan. Keilangan onà kaw megligaw te didalem te baso aw sablag amon melinis se kedakel niyan.

²⁷ “Mekelelayò kaw minge Parisiyo aw menenoladà te punù ingkeliwat i Moises. Eden niyo aw egpenimanem kaw. Iling kaw te lebeng pinintorahan te mepotì. Pengkey mèpiya se bawa niyan, meneng doton didalem se tòlan te otaw nematay aw nemahò. ²⁸ Iling kaw kenyan, so pengkey aneng-aneng te doma otaw metòlid se eg-inangen niyo, meneng nelegeb se pedowan niyo te kebolalaw aw kededàtan.”

Ipelumun dan te Timanem

Mat. 23:29-36; Luc. 11:47-51

²⁹ “Mekelelayò kaw minge Parisiyo aw menenoladà te punù ingkeliwat i Moises. Eden niyo aw egpenimanem kaw. Eg-inangen niyo se balay doton te kedita te lebeng te telekeliwat te kagi te Timanem aw doma otaw eg-inang te metòlid gebii, aw egpelasan niyo se lebeng dan. ³⁰ Eg-ikagi kaw te simpana migdoma kaw kandan gebii, eked kaw akop diyà te pegpengimatay te minge kemonaan niyo te telekeliwat te kagi te Timanem. ³¹ Pineokit te kagi niyo, ipetaga-taga niyo te medaet heman se pedowan niyo, so sikiyo se bowad-bowad te otaw nengimatay

kandan. ³² Yan keilangan meg-iling kaw den te munge kemonaan niyo amon sikopen niyo se medaet wedà dan kesikop. ³³ Iling kaw te memokan so biyasa kaw eg-inang te medaet. Eked kaw palos pekelowà lekat te pelumun te Timanem, so metoman kaw din ipeibing doton te kilot. ³⁴ Isogò ko doton kenyo se munge telekeliwat te kagi te Timanem, aw otaw biyasa te kagi ko, aw otaw megtoladà kenyo. Meneng doen diyà kandan imetayan niyo, aw doen heman ilansang niyo diyà te kros. Doen heman bedasen niyo doton te munge simbahan niyo, aw memilang kaw kandan pengkey kenan dan pesalo. ³⁵ Yan se metoman niyo inangen amon ipelumun te Timanem se kedita niyo tandà te pegpengimatay te kemonaan niyo te munge otaw eg-inang te metòlid, lekat te peg-imatay dan ki Abel, pengkey wedà peg-inang te salà, taman te peg-imatay dan ki Zacarias batà i Barakia kidoen te dowangen te dakel simbahan medapag te sonoganan te ayam-ayam ibegay diyà te Timanem. ³⁶ Eneng-enengi niyo se kagi ko kenyo seini. Metoman ipelumun te Timanem se kedita niyo songkani tandà te pegpengimatay kandan.”

*Nepuluk si Jesus tepad te munge tege Jerusalem
Mat. 23:37-39; Luc. 13:34-35*

³⁷ “Mekelelayò kaw tege Jerusalem. Gayed niyo eg-imetayan se kedita te telekeliwat te kagi te Timanem, aw egbontogan niyo te bato se kedita te otaw insogò te Timanem dini kenyo amon matay dan. Melikit a peden megtipon kenyo amon meg-ipat a kenyo, iling te omagak lomemlem diyà te munge onsoy din. Meneng wedà kaw keibeg. ³⁸ Na, pinebayaan den se ogpeanan niyo. ³⁹ Penenalan kaw kanak. Aw mesayo a, eked kaw kità kanak singed aw mikagi kaw, ‘Iduyun se insogò te Pengolo tadon Timanem.’ ”

24

*Keteboan te kelimahan**Mat. 24:1-14; Mar. 13:1-13; Luc. 21:5-19*

¹ Nayan, limowà si Jesus lekat te dakel simbahan te Jerusalem. Pegkesayo din, migpedapag se menge tinoledaan din aw impekità dan diyà kandin se menge balay te simbahan, so mèpiya se bawa niyan. ² Meneng minikagi si Jesus, “Pengkkey induyun niyo se simbahan seini, meneng mikagi a kenyo te tigkan iyan kebàtan te modi aldaw, aw wedad palos bato ketenanan diyà te lanto te doma bato.”

³ Wedà kenamay, dimoton si Jesus te bontod te Olibo aw neneno kidoen. Dimoton se menge tinoledaan din kandin te wedad doma dan, aw mig-insà dan, kagi dan, “Indani kay. Kano lay ketoman se in-indan nikaw? Eden lay se pengilala kitaen day amon ketegahan day te agpet ka lomikò aw agpet heman se temanan te keneyonan?”

⁴ Minikagi si Jesus, “Peg-ahà kaw amon eked kaw keekali. ⁵ Doen kwani medita otaw megpelingo-lingo te insogò dan te Timanem. Mikagi dan te sikandan se Misiyas, aw medita se otaw keekalan dan aw tomaking kandan. ⁶ Aw domineg kaw te doen gira medapag kenyo aw mediyò heman, ikà niyo egkelemitan. Keilangan iyan meinang, meneng kenà pa niyan se temanan te keneyonan. ⁷ Medita se otaw meggira, so doen pongan megbolaw diyà te doma pongan, aw doen heman menge sakop te sebad selotan megbolaw diyà te menge sakop te doma selotan. Megelà se otaw te medita ogpeanan tandà te bayil aw linog domateng diyà kandan. ⁸ Pengkkey medaet iyan, meneng yan olò se keteboan te kelimahan domateng dini te keneyonan, iling te keteboan te mesakit domateng te bayi agpet tebawan.

⁹ “Yan kebensihan kaw te keditaan te otaw tandà te pegpesakop niyo diyà kanak, aw dekepen kaw dan amon ipeeleg kaw aw imetayan kaw dan. ¹⁰ Aw metoman iyan, medita se otaw lomengà te pegsalig dan kanak. Megpetolokay dan, aw megpeopalay dan. ¹¹ Medita heman se otaw megpelingo-lingo telekeliwat te kagi te Timanem, aw medita se keekalan dan aw tomaking kandan. ¹² Ontò medaet se inangen te otaw, aw yan se doun te megpedeit-ekay se keditaan te otaw te pedowan. ¹³ Meneng aw tomayod se otaw te kedita te kelimahan, ipelowà sikandin. ¹⁴ Onà itoladà se Mèpiya Indan tepad te peglowan te Timanem doton te kebelad te keneyonan, amon domineg se kedita te otaw. Penga niyan, domateng se temanan te keneyonan.”

Kedaet te kelimahan

Mat. 24:15-28; Mar. 13:14-23; Luc. 21:20-24

¹⁵ “Na, minikagi se telekeliwat te kagi te Timanem gebii si Daniel te doen domateng meg-inang te medaet doton te dakel simbahan te Jerusalem aw ontò mekelamit te otaw. (Keilangan kelebetan iyan te kedita te otaw megbasa te kagi din siyan insolat.) Aw kitaen niyo iyan doton te dakel simbahan, ¹⁶ keilangan komadas se kedita te otaw lekat te Judiya pesalo doton te bontod. ¹⁷ Keilangan eked awop diyà te balay din se otaw doton te lowà amon ebaten din se kedònan, meneng keilangan tenanan din se kedita. ¹⁸ Se otaw egterbaho doton te pawà, eked heman oli amon ebaten din se ekasan, meneng keilangan komadas. ¹⁹ Mekelelayò heman se menge bayi mebedes aw egsosowan te aldaw siyan. ²⁰ Pegtawal-tawal kaw diyà te Timanem te kenà pengodan aw kenà aldaw te peg-etod se pegkadas niyo. ²¹ Ontò medaet se kelimahan domateng diyà te keneyonan. Wedad palos kelimahan labi pa medaet diyà kenyan lekat te keteboan te keneyonan lamig

seini, aw wedad palos heman kelimahan domateng labi pa medaet diyà kenyan. ²² Meneng pekebebaen te Timanem se kenamay te aldaw te kelimahan sìyan amon eked kegelà se kedita te otaw. Pekebebaen din iyan tandà te menge otaw pinemalli din.

²³ “Aw domateng se aldaw sìyan, aw doen otaw mikagi, ‘Na, dini den se Misiyas,’ aw doen otaw mikagi, ‘Doton se Misiyas,’ ikà niyo egpemenal kandan. ²⁴ Doen menge otaw domateng megpelingo-lingo te sikandan se Misiyas aw menge telekeliwat te kagi te Timanem. Meg-inang dan heman te menge kepelahan amon keekalan dan peden heman se menge otaw pinemalli te Timanem. ²⁵ Yan pegahà kaw, so mig-indan a den kenyan diyà kenyo te eked pa dateng.

²⁶ “Aw doen otaw mikagi diyà kenyo, ‘Na, doton den se Misiyas te kebigtilan,’ ikà niyo egdoton. Aw doen doma otaw mikagi, ‘Na, mineles den sikandin doton didalem te balay,’ ikà niyo egpemenal kenyan, ²⁷ so ontò metaen se peglikò ko iling te kilem ontò somiblat doton te kebelad te langit, aw kitaen te kedita te otaw. Iling kenyan se pegdateng ko Timanem Migpekeotaw.

²⁸ “Pengkey kenan se lawa te nematay, yan se ketiponan te menge manok egpengaen te lawa te nematay.”

Peglikò te Timanem Migpekeotaw

Mat. 24:29-31; Mar. 13:24-27; Luc. 21:25-28

²⁹ “Aw mepenga se kelimahan sìyan, megkengitngit se keneyonan so eked ebey senang se aldaw aw bolan. Medagdag heman se menge bitoen lekat te langit, so mebilit se kedita dan. ³⁰ Penga niyan, ipekità ko se pengilala doton te langit te agpet a den lomikò Timanem Migpekeotaw. Megkelag se kedita te otaw te keneyonan tandà te lamit dan, so komità dan te pegdateng ko aw lomikò a Timanem Migpekeotaw tekingan te labon lekat

te langit. Komità dan te metolos a aw ontò a melangkaw.
³¹Ipeedop ko se bodyong, aw isogò ko se menge anghil, aw tiponen dan se kedita te otaw pinemalli ko lekat te kebelad te keneyonan, pengkey kenan dan peg-ogpà.”

Tegdeyanan tepad te kayo igira

Mat. 24:32-35; Mar. 13:28-31; Luc. 21:29-33

³²“Penenalan kaw den te tegdeyanan seini tepad te kayo igira. Aw tomobed iyan aw domawen, ketegahan niyo te agpet den domateng se pengaldaw. ³³Iling heman kenyan, aw kitaen niyo se pegketoman te kedita niyan inikagi ko diyà kenyo, ketegahan niyo te agpet a den lomikò. ³⁴Eneng-enengi niyo se kagi ko kenyo seini. Doen menge otaw komità te pengilala siyan, eked dan kematay singed aw metoman se kedita niyan. ³⁵Doen teman te langit aw tanà, meneng gayed metoman se kagi ko te wedad teman.”

Wedad netaga-taga aw kano likò

Mat. 24:36-44; Mar. 13:32-37; Luc. 17:26-30,34-36

³⁶“Meneng eked ko indani aw eden eldawi aw orasi se peglikò ko. Wedad palos netaga-taga aw kano a likò, pengkey menge anghil doton te langit, so olò Amay ko se netaga-taga kenyan. ³⁷Aw lomikò a Timanem Migpekeotaw, medita se otaw eked peketagad te pegdateng ko, iling te otaw gebii wedà penenalan ki Noe. ³⁸Te wedà pa kelinep se tanà te wayeg, gayed dan egpengaen, aw eg-inem dan, aw egpepengognanay dan, lamig te aldaw te pegsakay i Noe aw pamilya din diyà te arka. ³⁹Meneng wedà ketaga-taga se menge doma otaw te agpet dan megelà lamig nesàban dan te pegkelinep te tanà te wayeg, aw nelemes se kedita dan. Iling heman kenyan se peglikò ko Timanem Migpekeotaw, so medita heman se otaw eked peketagad te pegdateng ko. ⁴⁰Aw domateng se aldaw siyan, pengkey megterbaho se dow a otaw doton

te pawà, meneng ipetaking se sebad, aw tenanan se sebad. ⁴¹ Pengkey meglegiling se dowà bayi, meneng ipetaking se sebad, aw tenanan se sebad. ⁴² Yan se down te keilangan gayed kaw megpeketagad, so wedà niyo ketegahi aw eden eldawi se peglikò ko Pengolo niyo. ⁴³ Meneng eneng-enengi niyo ini. Aw ketegahan te tig-apò te balay aw kano dateng se menenakaw, yan meketagad sikandin, aw eked ketekawi se balay din. ⁴⁴ Keilangan gayed kaw heman megpeketagad, so domateng a Timanem Migpekeotaw te eked niyo ketegahi aw kano.”

Otaw keseligan aw otaw kenà keseligan

Mat. 24:45-51; Luc. 12:41-48

⁴⁵ “Se otaw egkeseligan aw biyasa eg-inang te kedita, yan se inangen te amo din egpengibing te kedita te doma otaw doton te balay din, amon memegay diyà kandan te kànen te kelikit te aldaw. ⁴⁶ Aw domateng se pengolo din, ontò meluba se sineligan gayed egtolò te impunù te amo din. ⁴⁷ Eneng-enengi niyo se kagi ko kenyo seini. Aw yan se inangen din, meinang sikandin egpengibing te kedita doton te balay te amo din. ⁴⁸ Meneng aw meg-aneng-aneng se medaet sineligan te menamay pa se pegdateng te amo din, ⁴⁹ aw egbedasen din se doma sineligan, aw gayed sikandin egpengaen aw eg-inem aw egkelasing sipat menge doma otaw metilasing, medaet iyan, ⁵⁰ so domateng se amo din te aldaw wedà din pelimani. ⁵¹ Metoman sikandin ipelumun te amo din, so ipelumun sikandin iling te menge otaw eden dan aw egpenimanem dan. Ontò megkelag se otaw doton, aw megyangget-yangget se ngipen dan tandà te kegemakan dan.”

25

Tegdeyanan tepad te sempolò laga

¹ “Iling heman kani se keteboan te peglowan te Timanem. Doen sempolò laga simongon te meama peipiden. Doen solò inibing te teg sebad-sebad kandan. ² Lima se laga doen mèpiya aneng-aneng, aw lima se laga kolang se aneng-aneng dan. ³ Doen solò inibing te lima laga kolang se aneng-aneng dan, meneng wedad pitrolyo inibing dan amon iawop dan diyà te solò dan aw meamin se awop niyan. ⁴ Meneng nengibing se lima laga doen mèpiya aneng-aneng te solò dan aw pitrolyo todà dan iawop. ⁵ Pegtagad dan te pegdateng te meama peipiden, nepilot se kedita dan aw timedogi dan, so nenamay wedà dateng se tinegadan dan.

⁶ “Pegketengà te delem, dinineg dan se otaw minikagi, ‘Na, dimateng den se peipiden. Ayas kaw den songon kandin.’ ⁷ Yan neloka se kedita te laga aw migtodà dan te mitsa te solò dan. ⁸ Minikagi se lima laga kolang se aneng-aneng dan diyà te lima laga doen mèpiya aneng-aneng, ‘Begayi kay bag te pitrolyo, so agpet den mepadeng se solò day.’ ⁹ Meneng minikagi se lima laga doen mèpiya aneng-aneng, ‘Eked kay pemegay, so eked kidon keteped te pitrolyo inibing day. Mèpiya aw domoton kaw te tinda amon mayad kaw.’ ¹⁰ Yan dimoton dan te tinda amon mayad dan. Penga te pegkesayo dan, dimateng se otaw peipiden. Timaking heman se kedita te neketagad, aw dimoton dan te peipid. Penga te peg-awop dan kidoen te balay, tinakep se lelebaran niyan.

¹¹ “Pegkenamay-namay, dimateng se lima laga lekat te tinda. Timawal dan doton te lowà te balay, kagi dan, ‘Sir, owangi bag se tetakep.’ ¹² Meneng minikagi sikandin, ‘Wedà ko sikiyo kilelai.’

¹³ “Yan se doun te keilangan gayed kaw megpeketagad, so wedà niyo ketegahi aw eden eldawi aw orasi se peglikò ko.”

Tegdeyanan tepad te telo otaw binegayan te kwarta
Mat. 25:14-30; Luc. 19:11-27

¹⁴ “Iling heman kani se peglowan te Timanem. Doen otaw dimoton te mediyò ogpeanan. Meneng te wedà pa kesayo, tinawal din se kedita te sineligan din aw imbegay din diyà kandan se kwarta insalig kandan. ¹⁵ Doen kwarta imbegay din diyà te teg sebad-sebad kandan tepad te kebiyasa dan. Lima melalan se imbegay din diyà te sebad otaw, aw dowà melalan se imbegay din diyà te doma otaw, aw sebad melalan se imbegay din diyà te doma otaw. Penga niyan, nesayo sikandin. ¹⁶ Nayan, se otaw binegayan din te lima melalan, mignigosyo sikandin aw doen gamad din lima melalan. ¹⁷ Iling heman kenyan se ininang te otaw binegayan din te dowà melalan, so doen gamad din dowà melalan. ¹⁸ Meneng se otaw binegayan din te sebad melalan, nemangbang sikandin kidoen te tanà aw inlebang din se kwarta imbegay diyà kandin.

¹⁹ “Nayan, pegkenamay, minolì se amo dan, aw tinawal din se sineligan binegayan din te kwarta amon ketegahan din aw doen gamad dan. ²⁰ Pegdateng te sineligan binegayan din te lima melalan, inibing din iyan sipat gamad din lima melalan, aw minikagi sikandin, ‘Sir, lima melalan se imbegay no diyà kanak, aw doen den heman gamad ko lima melalan.’ ²¹ Minikagi se amo din, ‘Mèpiya se ininang nikaw. So keseligan ka, labi pa dakel se ibegay ko diyà kamno. Ibeg ko meluba ka heman onawa te kanak pegkeluba.’ ²² Penga niyan, dimateng se sineligan binegayan din te dowà melalan, aw minikagi sikandin, ‘Sir, dowà melalan se imbegay no diyà kanak, aw doen den heman gamad ko dowà melalan.’ ²³ Minikagi se amo din, ‘Mèpiya se ininang nikaw. So keseligan ka, labi pa dakel se ibegay ko diyà kamno. Ibeg ko meluba ka heman onawa te kanak pegkeluba.’ ²⁴ Penga niyan, dimateng

heman se sineligan binegayan din te sebad melalan, aw minikagi sikandin, ‘Sir, netegahan ko te mebolot ka otaw, so eglegeniyen no se intanem te doma otaw, aw gayed no ipegsawol diyà te pol nikaw se omay trigo impepalid te doma otaw. ²⁵ Yan wedà a pegnigosyo te kwarta nikaw, meneng inlebung ko iyan kidoen te tanà, so nelemitan a kamno. Ioli ko den diyà kamno se sebad melalan imbegay no diyà kanak.’ ²⁶ Minikagi se amo din, ‘Tekahen ka aw ontò medaet se ininang nikaw. Minikagi ka den te eglegeniyen ko se intanem te doma otaw, aw ipegsawol ko diyà te pol ko se omay trigo impepalid te doma otaw. Aw netegahan no iyan, ²⁷ keilangan ipebeles no peden se kwarta ko diyà te doma otaw amon ioli iyan diyà kanak te peg-oli ko sipat batà niyan.’ ²⁸ Penga niyan, minikagi sikandin diyà te menge doma sineligan, ‘Na, ehati niyo se sebad melalan imbegay ko diyà kandin, aw begayi niyo diyà te otaw doen sempolò melalan. ²⁹ Se otaw egkeseligan, yan se begayan ko te labi pa dakel diyà te keilangan din. Meneng se otaw kenà egkeseligan, yan se ebatan ko te imbegay ko diyà kandin. ³⁰ Na, se medaet otaw seini, ibingi niyo sikandin kidoen te lowà doton te kengitngitan amon ipelumun. Ontò megkelag se otaw kidoen, aw megyangget-yangget se ngipen dan tandà te kegemakan dan.’ ”

Peg-okom te kedita te otaw

³¹ “Aw lomikò a Timanem Migpekeotaw amon lomowan a, tekingan a te kedita te anghil. Penga niyan, menenoo a kidoen te melangkaw onsedanan te peglowan amon meg-okom a te kedita te otaw ³² tiponen ko lekat te kebelad te keneyonan. Tepiden ko dan diyà te dowà pongan iling te eg-inangen te telediyaga te karniro aw tepiden din se menge karniro aw kambing, ³³ so egtiponen din se

karniro lenged te kowanan din aw egtiponen din heman se kambing lenged te bibang din. Iling heman kenyan se inangen ko te peg-okom ko, ³⁴ so mikagi a diyà te munge otaw lenged te kowanan ko, ‘Taking kaw den kanak, so pinemallì kaw te Amay ko Timanem amon meluba kaw. Metoman den iyan so megtebò a den lomowan diyà kenyo iling te peglalang te Amay ko te wedà pa inangi se keneyonan. ³⁵ Pegkeballos ko, impekaen a niyo. Pegkelao ko, impeinem a niyo. Pengkey wedà a niyo kilelai te pegdateng ko doton kenyo, meneng impeogpà a niyo doton te balay niyo. ³⁶ Pegkewedad te penenaktun ko, doen imbegay niyo kanak. Pegkesakit ko, mig-ipat kaw kanak. Pegkekeleboso ko, linaoy a niyo.’ ³⁷ Penga niyan, meg-insà se otaw lenged te kowanan ko eg-inang te metòlid, kagi dan, ‘Sir, kano ka lay bellosi, penga niyan impekaen ka day? Kano ka lay kelao, penga niyan impeinem ka day? ³⁸ Kano ka lay dini wedà ka day kilelai, penga niyan impeogpà ka day doton te balay? Kano lay pegkewedad se penenaktun no, penga niyan binegayan ka day? ³⁹ Kano ka lay kesekiti aw kekeleboso, penga niyan mig-ipat kay kamno?’ ⁴⁰ Tomaba a, ‘Eneng-enengi niyo se kagi ko seini. Pineokit te peg-inang niyo kenyan diyà te ontò medanà otaw egtaking kanak, ininang niyo iyan diyà kanak.’

⁴¹ “Penga niyan, mikagi a heman diyà te munge otaw lenged te bibang ko, ‘Ontò kaw ipelumun. Kesayo kaw den lekat kanak. Doton kaw den te kilot doen apoy eked palos kepadeng, so yan se integilan te Timanem amon doen egbelan din ki Satanas aw kedita te anghil din. ⁴² Pegkeballos ko, wedà a niyo pekàni. Pegkelao ko, wedà a niyo peinemi. ⁴³ Pegdateng ko doton kenyo, wedà a niyo peogpai doton te balay niyo. Pegkewedad te penenaktun ko, wedà a niyo begayi. Pegkesakit ko aw

pegkekeleboso ko, wedà a niyo leoyi.’ ⁴⁴ Meg-insà dan heman, ‘Sir, kano kay lay kità te binallos ka, aw nelao ka, aw wedad ogpeanan no, aw wedad penenaktun no, aw nesekitan ka, aw kineleboso ka, penga niyan wedà kay pegtabang kamno?’ ⁴⁵ Tomaba a, ‘Eneng-enengi niyo se kagi ko seini. Pineokit te wedà kaw pegtabang te ontò medanà otaw egtaking kanak, wedà a niyo tebangi.’ ⁴⁶ Penga niyan, ipedeleg dan doton te pelumun wedad temanan. Meneng se otaw eg-inang te metòlid, begayan dan te kaling pedowan wedad temanan.”

26

Peglalang te medaet inangen ki Jesus

Mát. 26:1-5; Mar. 14:1-2; Luc. 22:1-2; Juan 11:45-53

¹ Penga te pegtoladà i Jesus te kedita niyan, minikagi sikandin diyà te minge tinoledaan din, ² “Netegahan niyo den besi te dowa mendad se aldaw te pegdateng te Pista te Pegpelowà, aw metoman a ibegay diyà te belad te otaw meglansang kanak Timanem Migpekeotaw diyà te kros.”

³ Dalem niyan, netipon se minge pengolo te simbahan aw minge obanen te Judiyo doton te balay te ontò pengolo dan si Caifas. ⁴ Miglalang dan te dekepen dan si Jesus te wedad doma otaw metaga-tagà amon imetayan dan. ⁵ Minikagi dan, “Keilangan eked kidon pegdakep kandin dalem te pista, amon eked pegsamok se kedita te otaw.”

Pegtoyong ki Jesus kidoen te Bitanya

Mát. 26:6-13; Mar. 14:3-9; Juan 12:1-8

⁶ Nayan, pegdoton i Jesus te lonsod te Bitanya, limaoy sikandin ki Simon, siyan otaw pinegolian din te tompig. ⁷ Dalem te pegpangaen dan, doen bayi nengibing te lana metinadeg ontò meelagà insawol diyà te deitek botilya mèpiya se bawa. Migpedapag se bayi diyà ki Jesus aw nenoyong te lana diyà te olo din. ⁸ Na, pegkità te minge

tinoledaan i Jesus te ininang te bayi, neopal dan, aw minikagi dan, “Tay law. Pigbàtan din se lana siyan. ⁹ Aw ibeligyà iyan, doen ontò dakel kwarta iteped diyà te menge otaw sagkep.”

¹⁰ Meneng netaga-taga si Jesus te ingkeopal dan, aw minikagi sikandin, “Ikà niyo egsila te bayi siyan, so mèpiya se ininang din diyà kanak. ¹¹ Gayed doen otaw sagkep mebatog niyo tebangan. Meneng eked a gayed peg-ogpà dini kenyo. ¹² Pineokit te pegtoyong din te lana diyà kanak, impetagad a din te peglebeng kanak. ¹³ Eneng-enengi niyo se kagi ko seini. Eked palos sikandin kelibeli, so pengkey kenan toledai se Mèpiya Indan doton te kebelad te keneyonan, iindan heman se ininang te bayi siyan.”

Pegpakang i Judas te pegtolok din ki Jesus

Mat. 26:14-16; Mar. 14:10-11; Luc. 22:3-6

¹⁴ Nayan, doen tinoledaan i Jesus ngadan din si Judas Iscariote. Dimoton sikandin te menge pengolo te simbahan ¹⁵ aw minikagi sikandin, “Aw itolok ko sikandin amon dekepen niyo, pila lay se kwarta ibegay niyo kanak?”

Penga niyan, doen kwarta imbegay dan diyà kandin ketlowan plata. ¹⁶ Lekat niyan, migtagad si Judas te mèpiya aldaw amon itolok din si Jesus.

Pista te Pegpelowà

Mat. 26:17-25; Mar. 14:12-21; Luc. 22:7-14,21-23; Juan 13:21-

30

¹⁷ Nayan, pegdateng te tagnà aldaw te pista te pegpen-gaen te menge Judiyo te pan kenà eglebag, dimoton se menge tinoledaan i Jesus kandin, aw mig-insà dan, kagi dan, “Kenan kay lay peg-inang te kànen tadon te Pista te Pegpelowà?”

¹⁸ Minikagi si Jesus, “Doton kaw te otaw te Jerusalem, aw ikagi kaw diyà kandin, ‘Insogò kay te Pengolo day

amon mikagi kay diyà kanno te agpet den se pegkematay din. Komaen sikandin te Pista te Pegpelowà dini te balay nikaw sipat sikami menge tinoledaan din.’ ”

¹⁹ Penga niyan, timolò dan kandin, aw mig-inang dan te kànen.

²⁰ Pegkedelem niyan, dimoton si Jesus aw kedita te sem-polò teg dowà tinoledaan din, aw kimaen dan. ²¹ Dalem te pegpengaen dan, minikagi si Jesus, “Eneng-enengi niyo se kagi ko seini. Doen sebad kenyo megtolok kanak.”

²² Ontò nelidò se pedowan dan, aw migpetibos-tibosay dan mig-insà, kagi dan, “Pengolo, kenà ko lay lebbò?”

²³ Minikagi si Jesus, “Doen sebad dini megtolok kanak pengkey timogen sikandin kanak. ²⁴ Metoman a imetayan, so yan se insolat gebii tepad kanak Timanem Migpekeotaw. Meneng mekelelayò se otaw megtolok kanak. Mèpiya peden aw wedà sikandin tebaw.”

²⁵ Mig-insà se migtolok kandin si Judas, “Sir, kenà ko lay lebbò?”

Minikagi si Jesus, “Benal se inikagi nikaw.”

Pegkaen te pengilala te pegkematay te Pengolo

Mat. 26:26-30; Mar. 14:22-26; Luc. 22:15-20; 1Ko. 11:23-25

²⁶ Nayan, telobo dan pa kimaen, nengabat si Jesus te pan, aw migpesiontong sikandin diyà te Timanem, aw binelà-belà din se pan, aw inteped din diyà kandan, aw minikagi, “Kàni niyo se pan seini, so yan se lawa ko.”

²⁷ Penga niyan, inabat din heman se tabò, aw migpesiontong sikandin diyà te Timanem, aw impeinem din iyan diyà kandan, aw minikagi, “Kedita niyo minem kani, ²⁸ so seini se dipanog ko, aw pineokit kani, doen den kaling peokit pesalo doton te Timanem. Pineokit te pegkematay ko, pegwedaden din se salà te ontò medita otaw. ²⁹ Mikagi a den diyà kenyo te eked a todà inem te ininem tadon seini

singed aw metoman kidon minem te kaling bino doton te peglowan te Amay ko.”

³⁰ Penga niyan, migdelangan dan tepad te pegduyun dan te Timanem, aw nesayo dan lekat kidoen, aw dimoton dan te bontod te Olibo.

Inikagi i Jesus se pegbolon i Pedro kandin

Mat. 26:31-35; Mar. 14:27-31; Luc. 22:31-34; Juan 13:36-38

³¹ Penga niyan, minikagi si Jesus diyà te menge tinoledaan din, “Kwani seini, tomanan se kedita niyo kanak tandà te kelimahan domateng diyà kanak, so doen kagi te Timanem insolat gebii,

‘Ipeimatay ko se otaw egtonggò te ayam-ayam karniro, aw mebilit se kedita te karniro tinonggoan din.’

³² Meneng penga te pegkeantay ko lekat te nematay, mekeonà a diyà kenyo doton te Galiliya.”

³³ Minikagi si Pedro diyà ki Jesus, “Pengkey tomanan se kedita te doma kamno, meneng eked a palos tanan kamno.”

³⁴ Minikagi si Jesus, “Eneng-enengi se kagi ko kamno seini. Kwani te delem te eked pegkolaak se manok, ibolon a nikaw te meketelo.”

³⁵ Minikagi si Pedro, “Eked a palos pegbolon kamno, pengkey imetayan a sipat kamno.”

Iling heman kenyan se inikagi te kedita te tinoledaan i Jesus.

Migtawal-tawal si Jesus kidoen te Gitsimani

Mat. 26:36-46; Mar. 14:32-42; Luc. 22:39-46

³⁶ Nayan, dimoton si Jesus aw menge tinoledaan din te kekeyowan iningedanan Gitsimani. Pegdateng dan doton, minikagi si Jesus, “Pegtagad kaw dini. Domoton a sida amon megtawal-tawal a.”

³⁷ Impetaking din si Pedro aw sỳan didowa batà i Sebedeo. Penga niyan, ontò den nepuluk se pedowan din,

³⁸ aw minikagi sikandin, “Ontò den nepuluk se pedowan ko, iling te matay a. Peg-ogpà kaw den dini, aw ikà niyo egtedogi.”

³⁹ Penga niyan, dimeleg si Jesus te kenà mediyò, aw limemlem sikandin aw migtawal-tawal, kagi din, “Amà, aw mepakay diyà kamno, eked a no peden peokiti diyà te kelimahan seini. Meneng ibeg ko, kamno ibeg se metoman, kenà kanak.”

⁴⁰ Peglikò din doton te tinoledaan din, timedogi den dan. Linoka din dan aw minikagi sikandin diyà ki Pedro, “Nepela a den kenyo, so wedà kaw peketayod te sebad olò oras, meneng timedogi kaw. ⁴¹ Ikà niyo egtedogi. Meneng pegtawal-tawal kaw amon eked kaw keboyo. Pengkey mèpiya se ibeg te pedowan niyo, meneng wedad kagsen te lawa niyo.”

⁴² Migpekiyò-diyò si Jesus te ikedowa, aw migtawal-tawal, kagi din, “Amà, aw eked kepakay aw eked a okit diyà te kelimahan seini, ibeg ko metoman se kamno ibeg.”

⁴³ Todà limikò si Jesus doton te minge tinoledaan din, aw kinità din dan timedogi, so nepilot dan. ⁴⁴ Todà sikandin nesayo aw migtawal-tawal te iketelo. Onawa heman se intawal-tawal din. ⁴⁵ Penga niyan, limikò sikandin doton te tinoledaan din aw minikagi sikandin, “Nepela a so gayed kaw timedogi. Na, dimateng den se oras te pegtolok kanak Timanem Migpekeotaw, amon dekepen a te minge otaw mededaet. ⁴⁶ Enaw kaw den. Dimateng den se otaw megtolok kanak. Somongon kidon kandin.”

Pegdakep ki Jesus

Mat. 26:47-56; Mar. 14:43-50; Luc. 22:47-53; Juan 18:3-12

⁴⁷ Telobo pa minikagi si Jesus, dimateng si Judas, siyan tinoledaan i Jesus. Ontò medita se otaw timaking kandin, aw migkekamang dan te minge podok aw batota. Insogò

dan te munge pengolo te simbahan aw munge obanen te Judiyo. ⁴⁸ Tapay dan netegahan aw eden se inangen i Judas, so minikagi sikandin, “Se otaw edekan ko, yan se otaw inahà niyo. Dekepi niyo sikandin.”

⁴⁹ Nayan, pegdateng dan doton, wedà peg-alà-alà si Judas, meneng dimoton ki Jesus, aw minikagi, “Sir, mèpiya delem.”

Penga niyan, inedekan din si Jesus. ⁵⁰ Minikagi si Jesus, “Elew, pedelegi den se tod nikaw.”

Penga niyan, migpedapag se doma otaw diyà ki Jesus, aw migdakep dan kandin.

⁵¹ Na, doen doma i Jesus nenagnos te podok din aw tinigbas din se sineligan te ontò pengolo te simbahan, aw nepalot se dibaloy telinga din. ⁵² Meneng minikagi si Jesus, “Olii se podok diyà te lomà. Aw meglegamit se otaw te podok, imetayan heman sikandin pineokit te podok. ⁵³ Wedà no besi ketegahi ini. Aw mengenganay a diyà te Amay ko, isogò din se minelalan anghil din amon megtabang dan kanak. ⁵⁴ Meneng simpana tebang an dan, eked den ketoman se kagi te Timanem insolat gebii te metoman a detengan te kelimahan.”

⁵⁵ Penga niyan, minikagi si Jesus diyà te kedita te otaw netipon, “Kolang se pegkekamang niyo te podok aw batota amon megdakep kaw kanak, so kenà a megdedempasay. Gayed a migtoladà doton te dakel simbahan, meneng wedà a niyo dekepi doton. ⁵⁶ Meneng neinang se kedita nini amon metoman se insolat te munge telekeliat te kagi te Timanem gebii tepad kanak.”

Penga niyan, kimadas se kedita te tinoledaan i Jesus, aw tinenanan dan sikandin.

Inibing si Jesus doton te munge pengolo te simbahan

Mat. 26:57-68; Mar. 14:53-65; Luc. 22:54-55,63-71; Juan 18:13-14,19-24

⁵⁷ Penga niyan, inibing si Jesus te otaw migdakep kandin doton te balay te ontò pengolo te simbahan si Caifas. Tapay netipon kidoen se menenoladà te punù ingkeliwat i Moises aw menge obanen te Judiyo.

⁵⁸ Timelokon heman si Pedro, meneng migpekediyò lamig dimateng sikandin doton te dowangen te balay te ontò pengolo te simbahan. Pegdateng din doton te balay, nenenuo si Pedro doma te menge otaw migtonggò te dakel simbahan, amon ketegahan din aw eden se meinang ki Jesus.

⁵⁹ Nayan, ibeg te menge pengolo te simbahan aw menge doma dan obanen, doen inangan dan si Jesus te salà amon doen tindegan te pegpeimatay dan kandin. ⁶⁰ Pengkey medita se otaw migkebolalaw tepad kandin, meneng kenà botong se in-indan dan tepad kandin. Pegkenamay-namay, doen dowan otaw dimoton kandan, ⁶¹ aw minikagi dan, “Dineng day se inikagi din te mekebatog sikandin megbaet te dakel simbahan sida eg-ogpaan te Timanem, aw todà din iyan ipetindeg dalem te telo se aldaw.”

⁶² Timindeg se ontò pengolo te simbahan aw minikagi, “Eden lay se itaba no kenyan? Indani kay aw benal se inikagi te didowa otaw siyan.”

⁶³ Meneng wedà taba si Jesus. Penga niyan, minikagi se ontò pengolo te simbahan, “Megpunu a den diyà kamno pineokit te ngadan te Timanem eked palos kematay te keilangan meg-indan ka den te kebenalan. Sikona ekon se Misiyas, siyan Batà te Timanem. Indani kay den aw benal iyan.”

⁶⁴ Minikagi si Jesus, “Benal se inikagi nikaw. Mikagi a den kani diyà kenyo. Te eked kenamay, komità kaw kanak Timanem Migpekeotaw egpenenuo kidoen te tangkil te Amay ko metolos amon lomowan a doma din. Lomikò a heman dini lekat te langit tekingan te labon.”

⁶⁵ Penga niyan, miglisi se ontò pengolo te simbahan te saol din tandà te keopal din, aw minikagi sikandin, “Migtompuyus sikandin te Timanem, so migpelingo-lingo sikandin Batà te Timanem. Wedad den kekemowan te peg-indan te doma otaw diyà kenitadon tepad kandin, so dinineg tadon den se pegtompuyus din te Timanem.
⁶⁶ Na, eden lay se aneng-aneng niyo tepad kandin?”

Timaba dan, “Keilangan imetayan sikandin so doen salà din.”

⁶⁷ Penga niyan, tineptepan dan se bawa din, aw sinombag dan sikandin. Doen heman menge otaw nenampeng te mata din aw nenampak te bawa din, ⁶⁸ aw minikagi dan, “Na, aw ontò ka Misiyas, etoki aw sinu se nenombag kamno.”

Imbolon i Pedro si Jesus

Mat. 26:69-75; Mar. 14:66-72; Luc. 22:56-62; Juan 18:15-18,25-27

⁶⁹ Dalem niyan, mig-ogpà si Pedro doton te lowà te balay kidoen te dowangen. Doen bayi egtelaban dimoton kandin aw minikagi, “Sikona se egdoma ki Jesus tege probinsya te Galiliya.”

⁷⁰ Meneng migbolon si Pedro, aw dinineg te kedita dan se kagi din, “Wedà ko ketegahi aw eden se eg-ikegiyen nikaw.”

⁷¹ Penga niyan, minalin si Pedro doton medapag te lelebanan. Doen doma bayi egtelaban kimità ki Pedro, aw minikagi diyà te menge otaw kidoen, “Otwaw seini se egdoma ki Jesus tege Nasarit.”

⁷² Todà migbolon si Pedro. Migsapà sikandin aw minikagi, “Wedà ko sikandin kilelai.”

⁷³ Wedà kenamay, doen menge doma otaw dimoton ki Pedro, aw minikagi dan, “Benal sikona se sebad egdoma te otaw sida dinakep. Netegahan day te sikona se tege

probinsya te Galiliya, so dinineg day se litok te kagi nikaw.”

⁷⁴ Penga niyan, ontò migsapà si Pedro aw minikagi, “Wedà a palos kilala te otaw sida.”

Pegketà, migkolaak se manok. ⁷⁵ Yan neeneng-enengan i Pedro se tapay inikagi i Jesus te ibolon din sikandin te meketelo te eked pa pegkolaak se manok. Penga niyan, nesayo si Pedro aw ontò migkelag.

27

Inibing si Jesus doton ki Pilato

Mat. 27:1-2; Mar. 15:1; Luc. 23:1-2; Juan 18:28-32

¹ Nayan, peglibtak te aldaw siyan, netipon se kedita te pengolo te simbahan aw menge obanen te Judiyo, aw miglalang dan aw eden se idimanda dan diyà te gobirno tepad ki Jesus amon imetayan sikandin. ² Penga niyan, ginapos dan si Jesus, aw inibing dan sikandin doton te gobirnadador si Pilato.

Pegkematay i Judas

Mat. 27:3-10; Ininang 1:18-19

³ Nayan, si Judas, siyan migtolok ki Jesus, pegketagataga din te minikagi se menge pengolo te simbahan aw menge obanen te Judiyo te keilangan imetayan si Jesus, miglama-lama sikandin te medaet ininang din. In-oli din se kedakel te kwarta imbegay dan diyà kandin, ⁴ aw minikagi sikandin diyà kandan, “Doen salà ininang ko, so migtolok a te otaw wedad palos salà din aw imetayan den sikandin.”

Meneng minikagi dan, “Wedad labut day te salà nikaw. Inday den kamno.”

⁵ Penga niyan, insabog din se kwarta doton didalem te dakel simbahan, aw nesayo sikandin aw mig-iket te lieg din.

⁶ Inimon te minge pengolo te simbahan se kwarta insabog din, aw minikagi dan, “Simpana isawol tadon se kwarta seini diyà te solanan te kwarta ibowang diyà te Timanem, mekelàpang kidon te punù ingkeliwat i Moises, so seini se imbayad te pegpengimatay te otaw.”

⁷ Penga niyan, migsebad dan tepad te kwarta siyan, aw yan se imbayad dan te tanà te meneniyonay amon doen lebengan te minge otaw matay kidoen kenà tege Jerusalem. ⁸ Yan se doun te eg-ingedanan se pawà siyan “Pawà te Dipanog” lamig songkani.

⁹ Pineokit kenyan, netoman den se inikagi te telekeliwat te kagi te Timanem gebii si Jeremias, kagi din, “Ketlowan se kwarta plata keelagà din pegsebadan te minge bowad-bowad i Israel, ¹⁰ aw yan se ibayad dan te tanà te meneniyonay, so yan se insogò te Timanem kanak.”

Pig-insà i Pilato si Jesus

Mat. 27:11-14; Mar. 15:2-5; Luc. 23:3-5; Juan 18:33-38

¹¹ Nayan, pegpengibing dan ki Jesus doton te gobir-nador, mig-insà se gobir-nador, “Sikona lay se Selotan te minge Judiyo?”

Minikagi si Jesus, “Ee. Benal se kagi nikaw.”

¹² Meneng pegdimanda te minge pengolo te simbahan aw minge obanen te Judiyo tepad ki Jesus, pengkey wedad salà din, meneng wedà palos sikandin ikagi.

¹³ Penga niyan, minikagi si Pilato, “Medita se indi-manda dan tepad kamno. Nengà lay wedà ka taba kan-dan?”

¹⁴ Meneng wedà palos taba si Jesus, aw yan se doun te ontò nepela se gobir-nador.

Pig-okom si Jesus te imetayan

Mat. 27:15-26; Mar. 15:6-15; Luc. 23:13-25; Juan 18:39-19:16

¹⁵ Nayan, kelikit te Pista te Pegpelowà, doen ketanem te gobirnadór te ipelowà din se sebad otaw kineleboso, pengkey sinu se pemellien te kedita te otaw. ¹⁶ Na, dalem niyan, doen medaet otaw kineleboso ontò nedengeg, ngadan din si Barabas. ¹⁷ Pegketipon te medita otaw, mig-insà si Pilato, “Sinu lay se ibeg niyo ipelowà ko? Si Barabas aw si Jesus egtewalen niyo Misiyas? Sinu lay se pemellien niyo?”

¹⁸ Yan se inikagi i Pilato, so netegahan din te impedakep te munge pengolo te simbahan si Jesus so miningà dan kandin.

¹⁹ Dalem te pegpenenoo i Pilato doton te oseyanan, doen otaw insogò te esawa din amon ikeliwat se kagi din, “Ikà eg-inabut te otaw sìyan, so wedad salà din. Ontò nelemitan se pedowan ko tepad kandin pineokit te tegeinep tidelem.”

²⁰ Dalem niyan, gayed migdeliseg se munge pengolo te simbahan aw munge obanen te Judiyo diyà te otaw netipon kidoen amon memoyò dan ki Pilato te ipelowà din si Barabas aw imetayan si Jesus. ²¹ Wedà kenamay, todà mig-insà se gobirnadór, kagi din, “Sinu lay se pinemallì niyo ipelowà ko?”

Timaba dan, “Si Barabas.”

²² Mig-insà si Pilato, “Menonen ko si Jesus egtewalen niyo Misiyas?”

Timaba se kedita dan, “Imetayi sikandin. Lensangi diyà te kros.”

²³ Mig-insà si Pilato, “Nengà lay? Eden lay se salà ininang din?”

Meneng labi pa dakel se kagi dan aw migbelobansag dan, “Imetayi sikandin. Lensangi diyà te kros.”

²⁴ Nayan, netegahan den i Pilato te eked sikandin penalo diyà kandan, aw agpet den dan megsamok. Yan

se doun te inabat din se wayeg aw mig-onaw te belad din dalem te pegtengteng dan diyà kandin. Minikagi sikandin, “Pineokit te peg-onaw ko te belad, impetagataga ko den kenyo te wedad labut ko aw imetayan niyo se otaw seini. Meneng aw yan se inangen niyo diyà kandin, inday den kenyo.”

²⁵ Minikagi se kedita te otaw, “Mepakay diyà kenami aw ipelumun kay aw menge bowad-bowad day tepad te pegimatay kandin, so salà day iyan.”

²⁶ Penga niyan, impelowà i Pilato si Barabas lekat te keleboso. Impebadas din si Jesus, aw impeibing din amon ilansang diyà te kros.

Tinompuyus te menge sondalo si Jesus
Mat. 27:27-31; Mar. 15:16-20; Juan 19:2-3

²⁷ Penga niyan, inibing te menge sondalo si Jesus doton didalem te balay te gobirnadador, aw migtipon dan te kedita te doma dan sondalo. ²⁸ Penga niyan, linowas dan se saol din lekat kandin, aw pineseolan dan sikandin te melalag saol iling te saol te selotan. ²⁹ Linekò dan se belagen doen tigis, aw yan se insangkob dan diyà te olo din iling te korona te selotan. Doen heman tigbaw impeawid dan kandin iling te bangkà te selotan. Penga niyan, limongken dan diyà kandin aw migpelingo-lingo dan te sikandin se selotan egsegmanen dan. Minikagi dan, “Iduyun sikona Selotan te menge Judiyo.”

³⁰ Penga niyan, tineptepan dan sikandin. Inabat dan se tigbaw lekat kandin, aw yan se imbadas dan te olo din. ³¹ Penga te pegtompuyus dan kandin, linowas dan se melalag saol lekat kandin aw impesaol dan diyà kandin se kandin saol. Penga niyan, inibing dan sikandin lekat te balay te gobirnadador amon ilansang diyà te kros.

*Inlansang si Jesus diyà te kros**Mat. 27:32-44; Mar. 15:21-32; Luc. 23:26-43; Juan 19:17-27*

³² Pegkesayo dan lekat te Jerusalem, netelaan te menge sondalo se tege Sirene ngadan din si Simon. Lineges dan sikandin neniang te kros lensangan ki Jesus. ³³ Dimoton dan te bontod iningedanan Golgota. Se kelebadan niyan, “Tòlan te Olo.” Pegdateng dan doton, ³⁴ imbegay te sondalo diyà ki Jesus se bino sinengedan te bebolong te saka metabang amon eked din imenmani se kesakit. Meneng pegtimtim din kenyan, wedà din pedelegi inemi.

³⁵ Penga te peglansang te sondalo kandin diyà te kros, pigtalad-talad dan se penenaktun linowas din, aw migbonot dan aw eden se penenaktun meabat te teg sebad-sebad kandan. ³⁶ Penga niyan, neneno dan aw migtonggò dan kandin. ³⁷ Doen solat insawol dan diatas te olo din tepad te indimanda kandin, kagi niyan, “Seini si Jesus, Selotan te menge Judiyo.”

³⁸ Doen heman dow megededempasay inlansang diyà te kros kidoen te tangkil din, aw si Jesus diyà te tengà-tengà.

³⁹ Migtompuyus kandin se menge otaw minokit te dalan medapag kidoen. Migkiling-kiling dan te olo dan te peg-otik dan kandin, ⁴⁰ aw minikagi dan, “Minikagi ka te mekebatog ka megbaet te dakel simbahan sida, aw todà no iyan ipetindeg dalem te telo se aldaw. Aw mekebatog ka kenyan, pekitai diyà kenami te doen tolos no pineokit te pegtabang no te kamno pegkeotawun amon eked ka kematay. Aw ontò ka Batà te Timanem, tenà ka den lekat te kros.”

⁴¹ Iling heman kenyan se pegtompuyus te menge pengolo te simbahan, aw menenoladà te punù ingkeliwat i Moises, aw menge obanen te Judiyo. Minikagi dan, ⁴² “Migtabang sikandin te menge doma otaw netigdaan amon eked dan pa kematay. Meneng eked den sikandin

peketabang te kandin pegkeotawun amon eked kematay. Minikagi sikandin te sikandin se Selotan te menge bowad-bowad i Israel. Eked kidon pemenal te kagi din singed aw tomenà sikandin lekat te kros. ⁴³ Timanem ekon se egseligan din. Kitaen tadon den aw dakel se pedowan te Timanem kandin pineokit te pegtabang te Timanem kandin te aldaw seini, so minikagi sikandin, ‘Siaken se Batà te Timanem.’”

⁴⁴ Iling heman kenyan se pegtompuyus te megdedempasay inlansang diyà te kros kidoen te tangkil din.

Pegkematay i Jesus

Mat. 27:45-56; Mar. 15:33-41; Luc. 23:44-49; Juan 19:28-30

⁴⁵ Nayan, pegkealas dosi te aldaw, migkengitngit se langit aw tanà lamig alas tris te meapon. ⁴⁶ Menge alas tris te meapon, timawal si Jesus te dakel se kagi din, kagi te Hebreo, “Eli, Eli, lama sabaktani?” Se kelebadan niyan, “E Timanem ko, nengà lay tinenanan a nikaw?”

⁴⁷ Pegdineg te menge otaw netipon kidoen, minikagi dan, “Nengenganay den sikandin diyà ki Elias, siyan telekeliwat te kagi te Timanem gebii.”

⁴⁸ Doen otaw ayas minangay te ispongha aw inagem din iyan diyà te bino sinengedan te wayeg. Intangen din iyan diyà te toktok te tigbaw, aw impesopsop din iyan ki Jesus. ⁴⁹ Meneng timawal se menge doma otaw, “Pebeyai sikandin, so kitaen tadon aw domini si Elias amon megtabang kandin.”

⁵⁰ Penga niyan, todà timawal si Jesus te dakel se kagi din, aw penga niyan nematay.

⁵¹ Nayan, tigkan nelisì se kayad kidoen te tengà-tengà te dakel simbahan te Jerusalem. Nelisì iyan lekat diatas lamig diyà te ongan. Ontò miglinog, aw doen dedakel bato nelebak. ⁵² Neowang se menge ilib linebengan te otaw nematay, aw medita se otaw sinakop te Timanem neantay

lekat te nematay. ⁵³ Limowà dan lekat te lebeng dan, aw penga te pegkeantay i Jesus lekat te nematay, dimoton dan te Jerusalem, aw medita se otaw kimità kandan.

⁵⁴ Na, se menge sondalo aw kapitan migtonggò ki Jesus, nelemitan dan te pegkayong te linog, aw pegkekità dan te kepelahan neinang te pegkematay i Jesus. Minikagi dan heman, “Ontò Batà te Timanem se otaw sìyan.”

⁵⁵ Medita heman se bayi kidoen kenà mediyò te kros, aw kinità dan se kedita te neinang. Sikandan se tapay timaking ki Jesus lekat te Galiliya taman te Jerusalem amon megtabang dan kandin. ⁵⁶ Sikandan si Maria tege Magdala, aw kesangay din si Maria inay i Santiago aw si Jose, aw sìyan esawa i Sebedeo, aw doen heman menge doma dan.

Peglebeng ki Jesus

Mat. 27:57-61; Mar. 15:42-47; Luc. 23:50-56; Juan 19:38-42

⁵⁷ Pegkeapon niyan, dimateng se meyaman otaw tege Arimatiya, ngadan din si Jose. Sikandin heman se tinoledaan i Jesus. ⁵⁸ Dimoton sikandin ki Pilato, aw pinemoyò din se lawa i Jesus amon ilebeng din. Yan migpunù si Pilato te mepakay aw ebaten din se lawa. ⁵⁹ Penga niyan, inabat din iyan lekat te kros, aw ginakes din te kaling sapot. ⁶⁰ Doen lebeng kaling impeawang i Jose diyà te pangpang, aw yan se linebengan din te lawa i Jesus. Penga niyan, kinelid din se dakel bato amon isampeng te lebeng. Penga niyan, nesayo sikandin. ⁶¹ Kinità iyan i Maria tege Magdala aw kesangay din, so nenenoò dan dapag te lebeng.

Impetonggò se lebeng

⁶² Keeldawan niyan, dalem te aldaw te peg-etod, dimoton ki Pilato se menge Parisiyo aw menge pengolo te simbahan, ⁶³ aw minikagi dan, “Sir, doen neeneng-enengan

day. Te wedà pa kematay se otaw sìyan migpelingo-lingo Misiyas, minikagi sikandin te meantay lekat te nematay te iketelo te aldaw. ⁶⁴ Yan mèpiya aw isogò no se menge sondalo megtonggò te lebeng din te telo se aldaw, amon eked ketakaw te menge tinoledaan din se lawa din lekat te lebeng. Yan eked dan pekeindan te neantay den sikandin lekat te nematay. Medita den se otaw neekalan te sikandin se Misiyas, meneng labi pa medaet aw keekalan dan te neantay den sikandin lekat te nematay.”

⁶⁵ Minikagi si Pilato, “Na, petekingi niyo se menge sondalo doton te lebeng, aw ontò niyo iyan petonggoi.”

⁶⁶ Penga niyan, dimoton dan te lebeng aw impeket dan se pengilala diyà te dakel bato insampeng kenyan amon wedad otaw meg-owang kenyan. Penga niyan, tinonggoan iyan te menge sondalo.

28

Pegkeantay i Jesus

Mat. 28:1-10; Mar. 16:1-10; Luc. 24:1-12; Juan 20:1-10

¹ Nayan, penga te aldaw te peg-etod, te wedà pa libtak se aldaw te iselem te Linggo, dimoton si Maria tege Magdala aw kesangay din te lebeng i Jesus. ² Te wedà dan pa dateng doton, ontò miglinog, so doen anghil te Timanem dimateng lekat te langit, aw nengelid te bato insampeng te lebeng, aw nenenoos sikandin kidoen. ³ Ontò minanyag se bawa din iling te kilem, aw ontò mepotì se penenaktun din. ⁴ Tinegangtang se menge sondalo tandà te lamit dan, aw nekeliyas dan iling te otaw nematay.

⁵ Na, pegdateng te didowa bayi doton te lebeng, minikagi se anghil, “Ikà niyo egkelemitan. Netegahan ko te inahà niyo si Jesus, sìyan inlansang diyà te kros. ⁶ Meneng wedad sikandin dini, so neantay den lekat te nematay.

Yan se tapay din impakang. Awop kaw diyà amon kitaen niyo se linebengan kandin. ⁷ Na, kegaen kaw den doton te menge tinoledaan din, aw indani niyo dan te neantay den sikandin lekat te nematay, aw nekeonà den sikandin diyà kenyo pesalo doton te probinsya te Galiliya. Kitaen niyo sikandin doton. Yan se kagi ko kenyo.”

⁸ Penga niyan, migpekegaen dan se nesayo lekat te lebeng. Pengkey nelemitan dan, meneng ontò heman neluba se pedowan dan. Kimagnan dan amon meg-indan dan kenyan diyà te menge tinoledaan i Jesus.

⁹ Te wedà dan pa dateng doton, kinità dan si Jesus kidoen te dalan, aw minikagi sikandin, “Mèpiya iselem.”

Migpedapag dan diyà kandin, aw limongken dan, aw minawid dan te benis din, aw migsimba dan kandin. ¹⁰ Minikagi si Jesus, “Ikà niyo egkelemitan. Doton kaw den te menge tinoledaan ko. Ikagi kaw diyà kandan te ibeg ko domoton dan te Galiliya, so kitaen a dan doton.”

Kebolalaw te menge otaw migtonggò te lebeng

¹¹ Nayan, pegkesayo te bayi, dimoton te Jerusalem se menge sondalo migtonggò te lebeng. Mig-indan dan diyà te menge pengolo te simbahan te kedita te neinang diyà kandan doton te lebeng. ¹² Penga niyan, tinipon te menge obanen te Judiyo se menge doma dan, aw migpebelaw-belaway dan. Penga niyan, dakel se kwarta imbegay dan diyà te menge sondalo, ¹³ aw minikagi dan, “Peg-indan kaw diyà te doma otaw te dimoton se menge tinoledaan din te delem, aw tinakaw dan se lawa din dalem te pegtedogi niyo. ¹⁴ Aw dinegen iyan te gobirnadador, sikami se megbalaw-balaw kandin amon eked kaw din keopali.”

¹⁵ Penga niyan, kininawà te menge sondalo se kwarta, aw timolò dan te impunù kandan. Iling kenyan se ipeg-indan-indan te keditaan te Judiyo lamig songkani.

Simogò si Jesus te minge tinoledaan din

Mat. 28:16-20; Mar. 16:14-18; Luc. 24:36-49; Juan 20:19-23; Ininang 1:6-8

¹⁶ Nayan, dimoton se sempolò tegusà tinoledaan i Jesus te Galiliya doton te bontod pinedotonan i Jesus kandan. ¹⁷ Pegkità dan kandin, migsimba dan kandin. Meneng doen minge tinoledaan din egdowa-dowa aw benal sikandin. ¹⁸ Migpedapag si Jesus diyà kandan aw minikagi, “Impelowan a den diyà te kedita doton te langit aw dini heman te lanto te tanà. ¹⁹ Yan isogò ko den sikiyo doton te kebelad te keneyonan. Pegtoladà kaw te kedita te otaw amon tomaking dan kanak. Pemonyagi niyo dan diyà te ngadan te Timanem Amay, aw Batà din, aw Espiritu Santo. ²⁰ Pegtoladà kaw kandan te keilangan tomolò dan te kedita te impunù ko diyà kenyo. Na, gayed a meg-ipat kenyo pengkey lamig te temanan te keneyonan.”

Se kaling peokit
New Testament in Manobo, Sarangani

copyright © 1982 Wycliffe Bible Translators, Inc.

Language: Sarangani Manobo (Manobo, Sarangani)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 1982, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Manobo, Sarangani

© 1982, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

